

DAKOTA
WOWAPI WAKAN.
PSALM WOWAPI.

THE
HOLY BIBLE
IN THE
LANGUAGE OF THE DAKOTAS:

TRANSLATED OUT OF
THE ORIGINAL TONGUES;

BY THOMAS S. WILLIAMSON AND STEPHEN R. RIGGS, MISSIONARIES

AMERICAN BIBLE SOCIETY,
INSTITUTED IN THE YEAR 1816,
NEW YORK.

1919

PSALM WOWAPI.

PSALM 1.

- 1 Wicašta cante wašte hinca ;
Tuwe wicašta šica tawowahokonkiye kin ohna mani šni,
Qa wahtanipi sa tacanku kin en inajin šni,
Qa wauncapi oyanke tawapi kin en iyotanke šni :
- 2 Tuka Jehowa toope kin wowiyuškin ya ;
Qa tawoahope kin awacin un kta, anpetu hanyetu koya.
- 3 Unkan he can wan mini wakpa icahda ojupi,
Qa iyehantu eca waskuyeca icahya ece kin he iyecece kta ;
Nakun ape tawa kin šnije kte šni,
Qa taku econ kte cin owasin tanyan yuŝtan kta.
- 4 Wicašta šicapi kin hececapi šni ;
Tuka hena aguyapi ha tate kahbog iyeye cin he iyececapi.
- 5 Heon wicašta šica woyaco kin en najinpi kte šni ;
Qa wahtanipi sa wicašta owotanna tomniciye kin en unpi kte šni.
- 6 Jehowa wicašta owotanpidan tacanku kin he sdonya ;
Tuka wicašta šicapi tacanku kin atakuni kte šni.

PSALM 2.

- 1 Tokeca Ikcewicašta kin oqoyapi,
Qa oyatepi takušni awacinpi kta he.
- 2 Maka wicaštayatapi kin odakonkiciyapi,
Qa wicašta itancanpi witaya wohdakapi,
Jehowa qa Tuwe Sdakiye cin on.
- 3 Wicaške tawapi kin unpapsakapi kta ,
Qa hakahmonpi tawapi ehpeunyanpi kta ce.
- 4 Mašpiya kin en iyotanke cin he iha kta ;
Itancan kin iwicahaha kta.
- 5 Hehan tocanniye en wowicakiyake kta ;

- Qa sínhda hinca en sítkihda wicaye kta.
- 6 Tuka Zion Paha Wakan mitawa kin akan,
Wicaštayatapi mitawa sdawakiya ce.
- 7 Wokonze kin owahdake kta ;
Jehowa hemakiya, Micinksí kin he niye,
Anpe dehan cinca cicaga ce.
- 8 Makida wo, kinhan Ikcewicašta tawa wicayaye kta,
Qa maka ihanke kin nitawa kta e ciçu kta.
- 9 Maza icapsinte wan on wicayakawihnnuni kta ,
Maka wakśica iyecen wicayakamdece kta ce.
- 10 Heon etanhan wicaštayatapi, ksapa po ;
Maka wayacopi, waonspeiçiciya po :
- 11 Wokokipe yuha Jehowa ohoda po ;
Qa wonihinciye on iyaśa po.
- 12 Cinhintku kin i iputaka po,
Okinni sínhda kta, qa tocanniye kitanna ide kinhan,
Canku kin etanhan nitakunipi kte śni.
Tona iye wacinyanpi owasin cante waštepi ece.

PSALM 3.

Dawid tadowan, iye cinhintku Absalom ite kin nakicipa, he ehan.

- 1 Jehowa, toka mayanpi kin hena ota aya ;
Tona takpe maupi kin hena wicota.
- 2 Wicota minagi heciyapi ;
Wakantanka en nikiyapi wanica ce. Sela.
- 3 Unkan Jehowa, mihdukśan wahacanka kin he niye ;
Wowitan mitawa qa pa yuwankan imacu kin.
- 4 Miho kin on Jehowa hoyewakiya ;
Unkan iye Paha Wakan tawa kin etanhan namañon. Sela.
- 5 Miye imunke ça miśtinbe ;
Ake wekta ; Jehowa mayuhe cin heon.
- 6 Oyate kektopawinge wikcemna kowicawakipe kte śni,
Ihdukśan tanhan takpe maupi kin.
- 7 Jehowa inajin wo ;
Wakantanka mitawa nimayan wo ;
Tokamayanpi owasin tapon hu kin en awicayapa ;
Wicašta śica hi kin wicayecamdeca.

- 8 Woehdaku kin he Jehowa tawa ;
Woyawašte nitawa nitaoyate kin en un nunwe. Sela.

PSALM 4.

David tadowan. Candowankiyapi on dowan itancan kin.

- 1 Wakantanka owotanna mitawa,
Houwaye cinhan amayupta wo ;
Makakija en mayadutanka ;
Onśimakida, qa wocekiye mitawa nahon wo.
- 2 Wicašta cinca, tohanyan mitowitan wowištece yayapi kta he ;
Tohanyan takuśni wašteyadapi qa woitonśni ayakitapi kta he. Sela.
- 3 Tuka Jehowa wicašta wacantkiye cin iye on eiçihde e sdonya po ;
Hoyewakiya eca Jehowa namakihon ece kta.
- 4 Kokipa po, qa wahtanipi śni po ,
Nitowinjapi akan nicantepi on awaiçicinpi,
Qa inina yukan po. Sela.
- 5 Wicoowotanna wośnapi kin wośna po,
Qa Jehowa wacinyan po.
- 6 Tuwe taku wašte unkipazopi kta he, wicota eyapi ece :
Jehowa, niye nitohnake iyoyanpa kin unkayuhomni po.
- 7 Wowiyuśkin micante kin en eyahnaka,
Aguyapi qa miniśa wicakiciyuotapi kin he isanpa.
- 8 Wookiye en imunke çā nakun miśtinbe kta ;
Jehowa, niye niśnana wowacinye en ounye mayakiye cin heon.

PSALM 5.

Dawid tadowan. Cotanka on dowan itancan kin kicagapi.

- 1 Jehowa mioie kin nahon wo ;
Mitawacin kin he iyukcan ye.
- 2 Mitawocekiye ho kin he nahon wo,
Wicaštayatapi mitawa, qa Wakantanka mitawa ;
Ceciciye kta heon etanhan.
- 3 Jehowa, hanhanna eca miho kin nayahon kta ;
Hanhanna eca houçiciye çā wankan ewatonwe kta.

- 4 Taku Wakan woahntani en iyuskin kin henica sni ;
Taku sice cin he niciti kte sni.
- 5 Tona witkotkoke cin niista itokam najinpi kte sni :
Tona woahntani econpi kin iyuhpa sice wicayadaka ece.
- 6 Tona itonpiśni kin hena ihangwicayaye kta ;
We wicašta qa wicahnaye sa kin he Jehowa wahteda kte sni.
- 7 Tuka miye nitowaonsida ota kin on yati en wau kte ;
Kocicipe cin on tipi wakan nitawa etkiya ohowada kta.
- 8 Jehowa, nitoowotanna on amayan wo, toka mayanpi kin on etanhan ;
Miite itokam canku nitawa owotanna kaga wo.
- 9 I kin ohna wowicake wanica :
Mahen tanhan wicošice yukan ;
Dotepi kin wicawoha yuhdokapi kin heca ;
Cejipi on wicahnayanpi ece.
- 10 Wakantanka, kakišwicaya wo ;
Wowahokonkiye tawapi on hinhpayapi nunwe ;
Woahtani hduotapi kin on ehpewicaya wo ;
Niye nicipajinpi kin heon etanhan.
- 11 Tuka wacinnianpi kin owasin wiyuskinpi kte ;
Ohinnian wiyuskinyan dowanpi kte ;
Niye awanwicayahdake cin heon etanhan :
Nakun tona nicaje waštedakapi kin hena miyuskinpi kte.
- 12 Wicašta owotanna kin niye dawašte kta ;
Jehowa, wahacanka iyececa, wowašte watešdag yaye kta.

PSALM 6.

Dawid tadowan. Kuya ahiyayapi en candowankiyapi on dowan itancan kin.

- 1 Jehowa, nitocanniye en iyopemaye sni ye ;
Qa šinyahda en kakišmaye sni wo.
- 2 Jehowa, onšimakida ye, wamašake sni ;
Jehowa asnimayan ye, mahuhu tehiya kakija.
- 3 Minagi kin is eya nina kakija ;
Tuka niye Jehowa, tohanyan kta he.
- 4 Jehowa hdicu ye, minagi ehdaku wo ;
Nitowaonsida kin on nimayan wo.
- 5 Wiconte en niksuyapi kin wanica ;
Hades ekta tuwe wopida eniciye kta he.

- 6 Comniwahdazi on waśake śni amayan ;
Hanyetu osan mitowinja amnitan waya ;
Ístamnihanpe amau kin on ipahin spaye wakiya ece.
- 7 Ceyapi on ísta amatakuni śni ;
Tokamayanpi owasin on kan amayan.
- 8 Taku śica ecanonpi kin owasin mitan tanhan ya po ;
Jehowa woceye mitawa ho mamahon kin heon.
- 9 Jehowa hoyewakiye cin he namahon ;
Wocekiye mitawa kin he Jehowa icu kta.
- 10 Tokamayanpi owasin ístecapi qa nihinciyapi kte ;
Ihnuhanna hdicupi qa ístecapi nunwe.

PSALM 7.

Dawid tadowan. Kuś Benjamite oie kin on Jehowa kahtyaye ciqon.

- 1 Jehowa Wakantanka mitawa, niye wacinciye ;
Tehiya makuwapi owasin etanhan nimayan qa emahdaku wo :
- 2 Okinni mnaja iyecen minagi yaśpaśpa qa yahdehdece kta ;
Unkan waehdaku wanice kta.
- 3 Jehowa Wakantanka mitawa, hecen ecamon kinhan ;
Minape ohna taku śica yuke cinhan ;
- 4 Tuwe wookiye en mici un kin itkom taku śica ecawecon kinhan ;
Han, tuwe taku on etanhan śni śicaya makuwa kin he emdaku ece :
- 5 Hehan toka kin minagi tapa qa ehdege kte ;
Han, mitaniya maka kin en namdu kte ;
Qa mitowitan watuśekśeca en ounye kiya nunwe. Sela.
- 6 Jehowa, canniniye cin en inajin wo ;
Tokamayanpi śinhdapi kin on wankan iyeiçiya wo ;
Qa miye on woyaco cajedate cin on ihduhica wo.
- 7 Unkan oyate mniciyapi kin aohduteniyanpi kta ;
Heon etanhan hena on wankan ihdoku wo.
- 8 Jehowa oyatepi kin wicayaco kta ;
Jehowa, mitoowotanna qa mitowašte en maun kin he iyecen mayaco
ye.
- 9 Tokin wicašta śica tohanpi śica hena owihanke yen ;
Tuka wicašta owotanna kin he yusuta wo ;
Taku Wakan owotanna wicacante qa wicapakśin iyukcan kin he niye.
- 10 Wahacanka mitawa kin he Wakantanka etanhan ;

- Tona cante owotanna niwicaye cin hee.
- 11 Wakantanka wayaco owotanna ;
Qa Wakantanka anpetu iyohi canniyan un :
- 12 Ihduhomni śni kinhan isan hdube kta ;
Tinazipe wanna nawinja qa wiyeya ehnaka :
- 13 Qa wiconṭe wipe kin ekta epazo ;
Tunwanhinkpe kin ide kiye kta.
- 14 Wanyaka wo, woahtani on ṭinge ;
Taku śica on ihduśaka, qa woitonśni hiyuya.
- 15 Woḥa wan kage ṇa iye kiṇa ;
Qa oqapi iye kage cin en ohinḥpaya.
- 16 Tohtani iye pa kin en hdi kta ;
Qa tohan śica iye pesdete ahdiḥpaye kta.
- 17 Jehowa toowotanna kin on wakahimdamde kta ;
Qa Jehowa Tehan wankantu caje kin iwadowan kta.

PSALM 8.

Dawid tadowan. Gittith on dowan itancan kin.

- 1 Jehowa Itancan unkitawapi,
Maka kin owancaya nicaje wokitanin hinca ;
Nitowitan maḥpiya kin iwankam eyehde.
- 2 Hokśiyopa qa azin unpi ipi kin etanhan woyatan yakaga ;
Tona toka niyanpi kin hena on,
Toka watokiṇon ko wicaduinina kta heon.
- 3 Maḥpiya nitawa ninapsukaza kage cin he wanmdaka eca ;
Hanyetu wi qa wicanḥpi eyahnake cin ;
- 4 Wicaśta kin taku, hecen ekta ewacanni he ;
Qa wicaśta cinhintku kin, on en yahi kta he.
- 5 Kitan ecinyan Taku Wakan kin ihukuya yakaga ;
Wowitan qa woyuonihan on wateśdag yecaton ;
- 6 Ninape taku kage cin hena idake yakiya ;
Taku owasin iye siha ihukuya eyahnaka ;
- 7 Tahinca optaye, tatanka ko owasin ;
Qa nakun tinta woteca kin ;
- 8 Maḥpiya okinyanpi, qa miniwanca hogan kin,
Taku miniwanca ohna cankuye cin hena.

- 9 Jehowa Itancan unkitawapi,
Maka kin owancaya nicaje wokitanin hinca.

PSALM 9.

Dawid tadowan. Muth-laben on dowan itancan kin.

- 1 Micante ocowasin on Jehowa mdatan kta ;
Taku wowinihan nitawa owasin mdatanin kta.
- 2 Cante mawašte qa niye on wimduškin kta ;
Tehan Wankan yaun nicaje iwadowan kta.
- 3 Tokamayanpi hekta itoheya hdicuyapi kinhan,
Nitokam hicanhanpi qa hinhpayapi kte.
- 4 Woakinica qa woyaco mitawa dusuta ;
Oiyotanke kin akan owotanna wayaco idotanke.
- 5 Ikcewicašta iyopewicayaya, tona šice cin hena ihangwicayaya ;
Ohinniyani qa owihanke wanica cajepi yapajuju.
- 6 Toka woihangye tawapi kin wanna owihanke :
Qa totonwepi kin hena dujuju ;
Ahna wicakiksuyapi kin he atakuni šni.
- 7 Tuka Jehowa owihanke wanica ounye kte ;
Woyaco on oiyotanke tawa wiyeya ekihde.
- 8 Unkan wowašte on maka kin hdaco kta ;
Woowotanna on oyate kin wicayaco kta.
- 9 Nakun šicaya wicakuwapi kin hena Jehowa wowinape yapi kta ;
Wokakije anpetu kin en he wowinape yapi kta.
- 10 Unkan tona nicaje sdonyapi hena wacinniyani kta ;
Niye Jehowa, tona anicitapi kin hena ehpewicayaye šni ece.
- 11 Jehowa Zion en ounye cin he idowan po ;
Tohan tanka oyate kin en oyaka po.
- 12 Tohan wicawe akita eca hena kiksuya ece ;
Tona kakija hoyeyapi kin he akiktonje šni.
- 13 Jehowa onšimakida wo ;
Tona šicemadapi token kakismayanpi kin he wanyaka wo .
Wiconęe tiyopa etanhan imacu kin he niye.
- 14 Hecen Zion cunwintku tatiyopa kin en nitowitan ocowasin omdake
kta ;
Wiconi nitawa on imduškin kta.
- 15 Ikcewicašta woħa wan kagapi kin he ohna ihpayapi ;

- Wohmunke wan iye nahmanpi kin he ohna siha içihmunkapi.
- 16 Woyaco econ kin eciyatanhan Jehowa sonyapi :
Tuwe síce cin he iye nape ohan kin on hmunkapi ece. Higgaon. Sela.
- 17 Wicašta sícapi Hades en hdicuwicayapi kta ;
Oyate Wakantanka akiktonjapi kin iyuhpa.
- 18 Wahpanicapi kin ohinniyan akiktonjapi kte síni ;
Wicašta onsíka wacinyanpi kin he owihanke wanica ihanke kte síni.
- 19 Jehowa inajin ye, wicašta akantu waśake síni nunwe ;
Nitokam Ikcewicašta kin wicayacopi kte.
- 20 Jehowa, wakokipe wicakicaga wo ;
Hecen Ikcewicašta wicašta ikceka hecapi e sdoniçiyapi kta. Sela.

PSALM 10.

- 1 Jehowa, tokeca itehan nayajin he ;
Wokakije anpetu kin en nayakihbe kta he.
- 2 Wicašta síca wahaniçida on kakije cin tehiya kuwa ece ;
Wohnaye awacinpi kin he on içihduzapi nunwe.
- 3 Wicašta síca iye nagi taku cantiheye cin on ihdatan ;
Qa waicucu kinhan ihdawašte ;
Jehowa he wahteda síni tuka.
- 4 Wicašta síca, ite wahaniçida kin on,
Takudan akite kte síni, Wakantanka wanica ;
Hecen tawacin ece.
- 5 Tacanku kin ohinniyan suta ;
Nitawoyaco kin iwankam un, íšta kin itehan ;
Tokawicaye cin owasin awicapogan kta.
- 6 Cante mahen heya ; Icimana mayutokanpi kte síni ;
Wicoicage qa wicoicage hehanyan woyokiśice wanice kta ce.
- 7 Woyaśice, woyahnayan qa woyuśice on i kin ojudan ;
Ceji ihukuya woyaśkiśkapi qa wohtani hiyeya.
- 8 Otonwe en waiyapepi kin hen iyotanke kta ;
Woinahbe oyanke kin en wicašta owotanna wicakte kta ;
Iye íšta wicašta onsíka iyawicape kta.
- 9 Mnaja wan waśun ohna yanka,
He iyecen, woinahbe oyanke kin ohna waiyape un kta ;
Wicašta onsíka yuze kta e iyape kta ;
Wohmunke tawa kin en wicašta onsíka au eca yuza ece.

- 10 Patuś inajin qa makata iwanka,
Hecen wicaśta waśaka wicayuhe cin on wicaśta onśika hinhpayapi kta.
- 11 Cante mahen heya ; Wakantanka akiktonja ;
Ite nakihman ; icimana wanyake kte śni ce.
- 12 Jehowa, najin ye ;
Wakantanka, nape yuwankan ehdaku wo ;
Onśike cin hena akiktonje śni wo.
- 13 Tokeca wicaśta śica Wakantanka wahteda śni he ;
Niye wawinunge kte śni, cante mahen keya he.
- 14 Niye wandaka ; ninape on toyeçon kta e
Wicohan śica wocanniye ko ayatonwan ece :
Tuwe onśike cin he wacinniye kta ;
Wamdenica kin oyakiya ece.
- 15 Wahtani sa isto kin kawega wo ;
Wicaśta śica tośice cin ayakite kta,
Takudan iyeyaye kte śni hehanyan.
- 16 Jehowa Wicaśtayatapi ohinniyan qa owihanke wanice kta :
Makoce tawa kin etanhan Ikcewicaśta kin atakunipi śni.
- 17 Tona onśika taku icekiyapi kin he, Jehowa niye nayahon ;
Cantepi dusuta kta ; ninoge anohyakiye kta.
- 18 Wamdenica qa kakiśyapi kin towicayeciçon kta ;
Hecen wicaśta maka akan icimana wakokipe wicakicage kte śni.

PSALM 11.

Dawid tadowan. Dowan itancan kin kicagapi.

- 1 Jehowa wowinape waye ;
Tokeca minagi heyakiyapi he ;
He nitawapi onakipa po, zitkadan iyececa.
- 2 Wan, wicaśta śicapi tinazipe nakiwinjapi ;
Ikan kin ekta tunwanhinkpe wiyeya ehnakapi ;
Otpaza en wicaśta cante owotanna wicakutepi kta.
- 3 Woahde kin hena yujujupi kta ;
Wicaśta owotanna taku econ okihi kta he.
- 4 Jehowa tipi wakan tawa kin ohna yanka ;
Jehowa oiyotanke tawa mahpiya kin ekta wanka ;
Iye iśta kin wanyaka, iye iśtojuha wicaśta cinca wicayukcan ece.

- 5 Jehowa wicašta owotanna kin yukcan kta ;
Tuka wicašta śica qa tona wawicakipi waštedake cin hena
Iye nagi śicewicadaka ece.
- 6 Wicašta śice cin hena wakanhdi awicamagaju kte,
Peta qa inyanzi, tate iyumni wohitike hinca ;
Miniyatke ohna wicaqupi kin hee.
- 7 Jehowa owotanna un, woowotanna waštedaka ece :
Tona ecetupi kin hena iye ite kin wanyakapi kta.

PSALM 12.

Ísahdogan on dowankiya itancan kin. Dawid tadowan.

- 1 Jehowa wanikiya wo ; wicašta wacantkiye cin he owihanke ;
Wicašta wicake cin Adam cinca kin etanhan atakunipi śni ce.
- 2 Otoyohi iye takodaku kici woitonśni okiciciyapi kta ;
Iha śduśduta qa cante nonpa on iapi kta.
- 3 Jehowa wicaiha śduśduta owasin baśpe kte,
Wicaceji watankaiçidaya ie cin he nakun.
- 4 Hena heyapi ; Uncejipi on wounhitikapi kta ;
Iha unyukanpi ; tuwe itancan unyuhapi he.
- 5 Wicašta onśika kakijapi kin on,
Wicašta wahpanica ceyapi kin on,
Wanna nawajin kta ce, Jehowa eye kta ;
Tuwe he cantokpani hinca kinhan, wankan wapa ewahnake kta ce.
- 6 Jehowa taku eye cin hena wicoie ecedan ;
Mazaska maka oceti ohna yuecedan,
Śakowin akihde śdoyapi.
- 7 Jehowa, niye hena wicayakpatan kta ;
Wicoicage kin de etanhan ohinniyan eyahdaku kta.
- 8 Wicašta cinca wahtepi śni kin wankan ehdepi kinhan,
Wicašta śica owancaya manipi kta.

PSALM 13.

Dowankiya itancan tawa. Dawid tadowan.

- 1 Jehowa, tohanyan amiyektonje kta he, ohinniyan kta he ;

- Tohanyan niite namayakihbe kta he.
- 2 Tohanyan minagi on awacin waun kta,
Anpetu otoyohi cante mašice kta he :
Tohanyan tokamaye cin miwankam un kta he.
- 3 Wanyaka wo, Jehowa Wakantanka mitawa, namañon wo :
Ísta iyoyammayan wo, okinni wiconę en mištinbe kta.
- 4 Okinni tuwe tokamaye cin, Wanna ohiwaya ce, eye kta ;
Mahicahe cinhan śicaya makuwapi kin iyaśapi kta.
- 5 Tuka miye nitowaonśida wacinwaya ;
Micante nitowiconi kin on iyaśa kte.
- 6 Jehowa iwadowan kta,
Tanyan ecamicon heon etanhan.

PSALM 14.

Dowan itancan kin kicagapi. Dawid tawa.

- 1 Witkotkoke cin he, Taku Wakan wanica ce, cante mahen eya.
Hena ihduśicapi, wicohan wahte śni econpi ;
Tuwedan taku wašte econ śni.
- 2 Jehowa mahpiya eciyatanhan Adam cinca kin ahiwiconwan ;
Tuwe wacinksamya ohanyan hecinhan wanyake kta ;
Tuwe Wakantanka akita hecinhan.
- 3 Iyuhpa icunonpa iyayapi ; witaya ihduśicapi ;
Tuwedan taku wašte econ śni ; han, wanjidan śni.
- 4 Taku śica econpi kin owasin takudan sdonyapi śni he ;
Mitaoyate aguyapi iyecen wicayutapi,
Qa Jehowa hoyekiyapi śni.
- 5 Hen wokokipe on kopehdapi ;
Wakantanka wicoicage owotanna kin en un, heon.
- 6 Wicašta onśika tawowacinye kin ištenyayapi kta ;
Jehowa wowinapeye cin heon.
- 7 Tokin Israel woehdaku tawa kin Zion etanhan u nunwe :
Tohan Jehowa taoyate wayaka unpi kin awicahdi kinhan,
Jakob iyuśkin kta, Israel pida kta.

PSALM 15.

Dawid tadowan.

- 1 Jehowa, tuwe nitawakeya en ounye kta he ;
Tuwe paha wakan nitawa kin en ti kta he.
- 2 Tuwe iyaonpepicašniyan mani, qa woowotanna econ,
Qa cante mahen wowicake ia ece :
- 3 Tuwe iye ceji on waaie šni,
Tuwe ikiyedun un kin taku šica ecakicon šni ;
Qa takodaku on woyake šica wan icu šni :
- 4 Iye išta en wicašta wahtešni kin wahtedapi šni :
Tuka tona Johowa kokipapi kin hena wicayuonihan kta :
Iye ičiconza on kiunniičiya ešta hdutokeca kte šni :
- 5 Mazaska tawa ota kamna kta ehnae šni ;
Qa wicašta iyaonpepica šni un kin on wokajuju icu šni ;
Tuwe dena econ kin he ohinniyan pahohopi kte šni.

PSALM 16.

Dawid tawoinahbe.

- 1 Wakantanka makpatan wo ;
Niye wacinciya, heon etanhan.
- 2 Jehowa heyakiya ; Itancan mitawa kin he niye ;
Mitowašte kin he niye ekta iyahde šni :
- 3 Makoce kin en wicašta wacantkiye cin hena ekta,
Qa itancanpi kin, hena en ocowasin wimduškin.
- 4 Tona wanji tokeca wošpapi kin hena woyokišice ota yuhapi kta :
We wošnapi kin hena wapapson kte šni,
Qa cajepi kin miiha ohna iwacu kte šni.
- 5 Jehowa wopamni mitawa qa wiyatke mitawa kin hee ;
Woaihpaye mitawa kin he niye dutanka kta.
- 6 Taku wiciyokipi kin imakiyutapi :
Han, maga wašte hinca mduha.
- 7 Jehowa wahokonmakiye cin he mdatan kta ;
Nakun hanyetu eca mitapakšin onspemakiya ece.
- 8 Mitokam Jehowa ohinniyan ewahde ;
Mietapa ekta un, heon mahohopi kte šni.
- 9 Heon etanhan micante wiyuškin,
Qa mitowitan ipsica ece :

- Han, micehpi wowacinye en wanke kta.
- 10 Minagi Hades en amayaduŝtan kte ŝni ;
Wanji Wakan nitawa kin he wicahwin wanyagyakiye kte ŝni.
- 11 Wiconi canku kin he onspemayakiye kta ;
Niite kin he wowiyuŝkin ojudan ;
Nietapa ekta ohinniyan wiciyokipi.

PSALM 17.

Dawid tawocekiye.

- 1 Jehowa, taku owotanna kin nahon ye ;
Ŗicahowamde cin he anohkiya wo ;
Wocekiye mitawa namakihon ye,
Iha wicahnaye ŝni etanhan u kin he.
- 2 Mayaowotanpidan kin he nitohnake etanhan u kta ;
Niiŝta taku ocitkonza kin hena wanyake kta.
- 3 Cante imayaduta, hanyetu en mayahi ;
Imayadukan, takudan iyeyaye kte ŝni ;
Mii kin mitawacin kakipe kte ŝni.
- 4 Wicaŝta wicohan tawapi ekta, niiha oie kin on,
Waihangye sa ohanpi kin iwanmdaka ece.
- 5 Mioye kin nitacanku yus un ;
Siha ewahde kin naŝdute ŝni.
- 6 Wakantanka houciyiya ; amayadupte kta heon ;
Anohmakiya wo, taku epe cin namakihon wo.
- 7 Tona wacinyanpi niwicayaye nitocantekiye hdutanin wo ;
Tona najinpi kin etanhan, ninape etapa on.
- 8 Wiciŝta su kin iyecen makpatan wo ;
Nihupahu ohanzi ihukuya namayahbe kte ;
- 9 Wicaŝta ŝica ihangmayanpi itepi kin etanhan ;
Minagi tokayapi aohdudemayanpi kin hena.
- 10 Waŝin tawapi kin en aconkaŝkapi ;
Ipi on wahaniciĉidaya iapi ece.
- 11 Wanna unkowepi kin en aohduteunyanpi ;
Iŝta on wanyag iheyapi, hdatapi kta heon.
- 12 Mnaja iyececa, wayapota inahni ;
Qa mnaja koŝka woinahbe en iyotanke cin iyececa.

- 13 Jehowa najin wo, itkokim ya wo, patuśkiya wo ;
 Mazasagye nitawa on wicaśta śica etanhan minagi eyaku wo :
- 14 Jehowa, ninape on, wicaśta kin etanhan ;
 Wicoicage wicaśta etanhan,
 Taku tawapi wiconi kin den un ;
 Qa taku nahmana yahnake cin on tezi ojuwicayakiye kta :
 Hena cinca wipipi kta ;
 Qa taku ohdaptapi kin hokśiyooqopa aihpewicakiyapi kta.
- 15 Tuka miye woowotanna en niite wanmdake kta ;
 Tohan ouncage nitawa yuha wekta kinhan, cante mawašte kta.

PSALM 18.

Dowankiya itancan kin. Dawid Jehowa taokiye kin he kaga : Jehowa tokayapi owasin napepi etanhan, qa Saul nape etanhan eyaku qon, anpetu kin he en odowan oie kin dena Jehowa eciya.

- 1 Unkan heya ;
 Jehowa mitowaśake, nina wašte cidake kta.
- 2 Jehowa imnija mitawa, qa conkaśke mitawa, qa emahdaku ece kin hee :
 Wakantanka mitawa, wowinape mitawa, he wacinwaye kta ;
 Wahacanka mitawa, qa ni makiya he kin, paha tehanwankantu mitawa kin hee.
- 3 Jehowa yatanpi kte cin he hoyewakiye kta ;
 Unkan tokamayanpi etanhan nimayanpi kta.
- 4 Wiconṭe ikan kin on mayuskiskitapi ;
 Qa wicośice wakpa kin mayuśinyaye kta.
- 5 Hades ikan kin aohdudemayanpi ;
 Wiconṭe mazahtakiyapi kin mayuzapi.
- 6 Iyotanhana iyewakiye cin en Jehowa hoyewakiye kta ;
 Qa Wakantanka mitawa cewakiye kta ;
 Tipi wakan tawa kin eciyatanhan miho kin nahon kta ;
 Qa wocekiye mitawa iye itokam u kte, iye noge kin en.
- 7 Hehan maka kin yuhuhuzapi qa cancan ;
 He oahde kin yuhuhuzapi qa śkanśkan ;
 Iye śinhda heon etanhan.
- 8 Canniyan etanhan śota wankan iyaya ;
 Qa i kin etanhan peta wahuhnaga ;

- Heon petaga ideyapi.
- 9 Nakun mahpiya kin patuškiye ça kun u ;
Qa iye siha ihukuya otpaza.
 - 10 Qa Kerub wan akan iyotanke ça kinyan iyaya :
Han, tate hupahu kin akan kinyan.
 - 11 Woinahbe tawa otpaza kin he kaga ;
Ihdukšan tawokeya kin mini otpaza ;
Mahpiya en mahpiya sóka kin hee.
 - 12 Itokam iyoyanpa on mahpiya sóka tawa kin hiyaya ;
Wasu qa petaga.
 - 13 Hehan mahpiya ekta Jehowa wakinyan hotonkiya ;
Qa Iyotan Wankan kin ho hdatanin :
Wasu qa petaga.
 - 14 Unkan tunwanhinkpe kihiyeya qa napewicaya ;
Nakun wakanhdi hiyuye ça yušinyewicaya.
 - 15 Hehan mini sicu kin wanyakapi ;
Qa maka oahde kin yutaninpi ;
Jehowa niye he iyopeyaya ;
Nitocanniye oniya ipogan kin heon.
 - 16 Hehan wankantanhan hiyu qa mayuze kta ;
Mini ota etanhan imacu kta.
 - 17 Tokamaye waśake cin etanhan emayaku kta ;
Qa tona śicemadapi kin etanhan ;
Hena mikapeya waśakapi nakaes.
 - 18 Iyomakiśica anpetu kin en iyamahpayapi kta ;
Tuka Jehowa mayusuta kin hee.
 - 19 Unkan makoce tanka en amahi ;
Iyokipwaye cin heon emayaku kta.
 - 20 Mitoowotanna iyecen Jehowa ecamicon kta ;
Minape ska kin iyecen micicajuju kta.
 - 21 Jehowa tacanku kin hena owape ;
Qa Taku Wakan mitawa śicaya amduśtan śni.
 - 22 Iye tawoyaco kin owasin mitokam un ;
Qa toope kin mitantanhan ehpeyaye kte śni.
 - 23 Nakun iye itokam ecetu waun ;
Qa wawahtani kin etanhan ınsmiçiya.
 - 24 Heon mitoowotanna iyecen Jehowa micicajuju ;
Iye iśta itokam minape ska kin heon.
 - 25 Tuwe wacantkiye cin he kici wacantkiya nihdutanin kta :

- Wicašta owotanna kici oniwotanna kta :
- 26 Tuwe ecedan un kin he kici ecedan nihdutanin kta ;
Qa tuwe pemni un kin he kici nihdupemni kta.
- 27 Niye oyate onśika niwicayaye kte :
Tuka ísta wankantupi kin kun hiyuwicayaye kta.
- 28 Niye petijanjan mitawa ideyaye kta :
Jehowa mita Wakantanka otpaza iyoyammiciye kte.
- 29 Niye on ozuye wan awaimnanke kta ;
Wakantanka mitawa on conkaške wan awapsice kta.
- 30 Iyotan Waśaka tacanku kin he yuśtanpi ;
Jehowa oie kin he yuecepidan ;
Tona wacinyanpi owasin he wahacanka yapi.
- 31 Hecen Jehowa icunonpa tanhan Taku Wakan kin tukte e he ;
Qa Wakantanka unkitawapi icunonpa tanhan tuwe imnija he.
- 32 Iyotan Waśake cin wowaśake on ipiyag makiton ;
Qa mitacanku miciyuśtan.
- 33 Misiha tatokadan iyececa micaga ;
Qa pajodan mitawa akan najin makiya.
- 34 Minape kiczapi onspemakiya,
Hecen miisto mazaśa itazipa kin yuwinja.
- 35 Unkan nitowiconi wahacanka kin mayaqu :
Nakun ninape etapa kin najin makiye kta ;
Qa nitowahbadan tanka makage kta.
- 36 Mihukuya caewahde kin hena mayadutanka kte ;
Hecen miiskahu naśdute kte śni.
- 37 Tokamayanpi tawicawapa qa ewicawehdege kta ;
Qa bowicasotapi śni hehanyan wahdicu kte śni.
- 38 Wicawakahuge kta, hecen najin okihipi śni ;
Misiha ihukuya ihpayapi kta.
- 39 Unkan okicize kta wowaśake on ipiyag mayakiton ;
Tona takpe maupi kin hena mihukuya iyewicayaye kta.
- 40 Nakun tokamayanpi tahupi kin mayaqu ;
Qa tona śice madapi kin hena ihangwicawaye kta.
- 41 Hena howayapi kta, tuka wanikiya wanica :
Jehowa hoyekiyapi kta, tuka awicayupte śni.
- 42 Hehan wicawakamdumdu kta, tate itokam maka mdu iyececa ;
Canku upśija iyecen tankan ehpewicawaye kta.
- 43 Oyate kiczapi kin etanhan emayahdaku kte ;
Ikcewicašta kin en itancan emayahnake kte ;

- Oyate sdonwicawaye śni qon hena wowidagwaye kta.
- 44 Noge on nahonpi kinhan anamagoptanpi kta ;
Wicaśta tokeca cinca kin mayaonihanpi kte.
- 45 Oyate tokeca cinca kin atakunipi kte śni ;
Qa conkaśke tawapi etanhan cancanyan hiyupi kta.
- 46 Jehowa ni un ; qa Imnija mitawa yawaśtepi nunwe ;
Qa Wakantanka Wanikiya mitawa kin he yatanpi nunwe.
- 47 Iyotan Waśaka watokiçonpi maqu ece kin hee ;
Qa nakun mihukuya oyatepi wicaktedan.
- 48 Tokamaye cin etanhan emahdaku ;
Han, tona takpe maupi kin wiciwankam emayahde kta ;
Wicaśta waihangye cin etanhan emayahdaku kta.
- 49 Heon, Jehowa, Ikcewicaśta ehna ciyatan kte ;
Qa nicaje iwadowan kta.
- 50 Wicaśtayatapi tawa kin woehdaku kiciyutanka ;
Qa tuwe Sdakiye cin he wowaonśida ecakicon ece ;
Dawid qa iye cinca kin, owihanke wanica.

PSALM 19.

Dowan itancan kin. Dawid tadowan.

- 1 Maĥpiya kin Wakantanka towitan kin oyaka ;
Qa okotonyan kin iye nape ohan kin yuotanin ece.
- 2 Anpetu wan anpetu iapi okiciyake kta ;
Qa hanyetu wan hanyetu wosdonye kiciyuotanin kta.
- 3 Iapi wanica qa wicoie wanica ;
Hena ho kin ecaca nahonpi śni.
- 4 Hena iyutapi ikan kin maka owancaya iyaya ;
Qa oiepi kin maka ihanke kin ekta.
Hena ehna anpetu wi kin wokeya wan kicaga.
- 5 Unkan he winohinca yuze kte cin wan
Wankan tipi etanhan hdinanpe cin iyececa ;
Wicaśta waśaka iyecen kiinyanka iyuśkin.
- 6 Maĥpiya ihanke kin hetanhan ya ece ;
Qa unma ihanke kin ekta ki :
Qa iyokate cin etanhan takudan nahmanpi śni.
- 7 Jehowa toope kin yuśtanpi, wicanagi kin yuhomni ;
Jehowa tawoyaotanin kin he wowicake,

- Witkotkoke cin wicayuksapa ece.
- 8 Jehowa taku econ wicaśi kin hena ecetu,
Wicacante iyuśkinkiya ;
Jehowa tawoahope kin ecedan, wicaiśta iyoyamya ece.
- 9 Jehowa kokipapi kin he ska, ohinniyan he kta ;
Jehowa tawoyaco kin he wowicake, ocowasin owotanna.
- 10 Hena mazaskazi isanpa waśtedapi kte ;
Han, mazaskazi ecedan ota kin isanpa :
Nakun tuhmaga canhanpi isanpa skuya ;
Qa tuhmaga canhanpi śbu kin.
- 11 Nakun hena on nitaokiye wahokonkiyapi ;
Hena yuhapi kin wokajuju tanka.
- 12 Tuwe wahtani ohdahniaga okihi he ;
Nahmanpi kin hena micicajuju wo.
- 13 Nakun woahntani tanka kin etanhan nitaokiye ehdaku wo ;
Hena wowidagmaye śni nunwe ; kinhan omaowotanna kta,
Qa woahntani ota iyaonpepica śni waun kta.
- 14 Jehowa imnija mitawa qa tuwe opemakiton kin,
Mii oie kin qa micante taku awacin kin,
Hena niye iyonicipi nunwe.

PSALM 20.

Dowan itancan kin on. Dawid tadowan.

- 1 Wicocante śica anpetu kin en Jehowa nanihon kte ;
Jakob ta Wakantanka caje kin wankan enihde nunwe.
- 2 Tipi wakan kin etanhan oniciye kte ;
Qa Zion etanhan niyuwaśake kta.
- 3 Nitawośna owasin kiksuye kte ;
Qa peta on waduśna kin hena icu kta. Sela.
- 4 Nicante yuze cin eciyatanhan niću kte ;
Qa nitawacin owasin ecetuniciciye kta.
- 5 Woehdaku nitawa on unkiyuśkinpi kta ;
Qa Wakantanka unkitawapi caje kin on
Wiyokihedan eunkihdepi kta.
Wocekiye nitawa owasin Jehowa ecetuniciciye kte.
- 6 Jehowa iye Sdakiye cin he nikiya wanna sdonwaya ;
Mahpiya wakan tawa eciyatanhan nakihon kta.

- Nape etapa waniye wowaśake kin he on.
- 7 Hunh canpahmihma qa hunh śuktanka,
Tuka unkiye Jehowa Wakantanka unkitawapi caje on unkiwinktapi
kta.
- 8 Hena e patujapi qa hinhpayapi :
Tuka unkiye naunjinpi qa bosdan unyakonpi.
- 9 Jehowa wanikiya wo ;
Hoyeunyanpi anpetu kin en,
Wicaśtayatapi kin naunkihonpi kte.

PSALM 21.

Dowan itancan kin on. Dawid tadowan.

- 1 Jehowa, nitowaśake on wicaśtayatapi kin cante wašte kta ;
Qa woehdaku nitawa on nina iyuśkin kta.
- 2 Taku cantokpani kin he yaqu ;
Qa iye iha taku da kin he teyahinda śni. Sela.
- 3 Woyawašte wašte kin yuha itkoyakipe kta ;
Mazaskazi wateśdake wan pa akan eyecihnake kta.
- 4 Wiconi nicida, he yaqu ;
Anpetu hanska, ohinniyan qa owihanke wanica.
- 5 Waniyakiye cin on towitan tanka kte ;
Woyuonihan qa wowašte akan eyahnake kta.
- 6 He woyuwašte owihanke wanica yakage kta ;
Niite etanhan wowiyuśkin on iyuśkinyakiye kta.
- 7 Wicaśtayatapi kin Jehowa wacinyan un ;
Unkan Iyotan Wankan un tawocantekiye en kahuhuzapi kte śni.
- 8 Tokaniyanpi owasin ninape iyewicaye kta ;
Tona śicenidapi kin ninape etapa iyewicaye kta.
- 9 Niite itokam maza śdoyapi oceti ide kin iyecen wicayakage kta ;
Jehowa tocanniye on nawicapce kta ;
Qa peta kin huhnaħwicaye kta.
- 10 Taku icaħyapi kin maka etanhan ihangyaye kta ;
Qa cincapi kin Adam cinca kin etanhan.
- 11 Taku śica nihiyohi kta cinpi ;
Taku śica konzapi, tuka okhipi kte śni.
- 12 Heon etanhan wicitokam eyakate cinhan,
Hekta itoheya hdicu wicayaye kta.

- 13 Jehowa, nitowaśake on nihduwankantuya nunwe,
Unkahiyayapi kta, qa nitowaśake unkidowanpi kta.

PSALM 22.

Dowankiya itancan : Anpao tahinca kin on. Dawid tadowan.

- 1 Wakantanka mitawa, Wakantanka mitawa,
Tokeca ehpemayaya he :
Waśicahowamde oie kin en tehan omayakiye śni.
- 2 Wakantanka mitawa, anpetu icunhan hoyewaye kta,
Tuka amayadupte kte śni ;
Nakun hanyetu en, qa inina manke śni.
- 3 Tuka niye niwakan,
Israel yatanpi kin en ounyaye cin.
- 4 Atewicunyanpi wacinniyanpi qon ;
Wacinniyanpi unkan ewicayahdaku.
- 5 Hoyeniciyapi unkan ewicahdakupi ;
Wacinniyanpi unkan ístecapi śni.
- 6 Tuka miye wamdudan hemaca, qa wicaśta hemaca śni ;
Wicaśta ekta wowištece mayanpi, qa oyate kin wahtemadapi śni.
- 7 Tona wanmayakapi owasin wowihaha mayanpi ;
Aikśinmayanpi, apomnamnamakiyapi.
- 8 Jehowa ihduzeze ce ; ehdaku kta ;
Waśtedake cin heon nikiye kta ce, *eyapi*.
- 9 Tuka wicatamni etanhan imacu qon he niye ;
Ina aze kin akan wowacinye mayaqu.
- 10 Wicatamni kin etanhan niye en aihpemayanpi ;
Ina tezi kin hetanhan Wakantanka mitawa he niye.
- 11 Mitehanyan un śni wo, woiyokiśice kiyedan un ;
Nakun waokiya wanica, heon etanhan.
- 12 Tatanka ota aohdudemayanpi ;
Baśan etanhan waśakapi kin ohomni takpe maupi.
- 13 Mnaja ocinśica qa hoton ece kin,
He iyecen aimayukawapi.
- 14 Mini iyecen mapapsonpi ; qa huhu mitawa owasin makap śunpi ;
Micante canśin iyececa, mitezi mahen śdoyapi.
- 15 Maka cega onśpa iyecen nitowaśake śpan ;
Nakun miceji macaka en askapa,
Qa wiconṭe maka mdu kin en amayade kta.

- 16 Śunka ohomni imayayapi ;
Wicaśta śica omniciye kin aohdudemayanpi ;
Minape misiha ko capapi.
- 17 Huhu mitawa owasin wahdawa ;
Ahitonwanpi qa opamahtapi.
- 18 Wokoyake mitawa kicipamnipi ;
Qa mitaśina on kansu kutepi.
- 19 Tuka Jehowa niye mitehanyan un śni ye ;
Mitowaśake he niye, omakiya inahni wo.
- 20 Mazasagye etanhan minagi ehdaku wo ;
Mitawa ecedan kin śunka nape kin etanhan.
- 21 Mnaja i kin etanhan nimayan wo :
Unkan tatanka he kin hetanhan amayadupta.
- 22 Nicaje mihunkawanji owicawakiyake kta ;
Omniciye kin cokaya tanhan icidowan kta.
- 23 Jehowa kokipa yaunpi kin, he idowan po ;
Jakob cinca owasin, he yuonihan po :
Qa Israel cinca owasin, kokipa po.
- 24 Tuwe onśika kakije cin he ihaha śni qa śicedake śni ;
Nakun ite inakiħbe śni ; tuka hoyekiya eca nakihon ece.
- 25 Omniciye tanka kin en niye on wadowan kta ;
Tona kokipapi wicitokam wośna mitawa wahdajuju kta.
- 26 Wahbapidan kin hena wotapi qa imnanpi kta ;
Tona Jehowa akitapi kin hena idowanpi kte :
Nicantepi owihanke wanin ni kte.
- 27 Maka ihanke kin owasin kiksuyapi qa Jehowa ekta ihduhomnipi kta ;
Qa Ikcewicaśta en wicowazi owasin nitokam ohodapi kta.
- 28 Wokiconze kin he Jehowa tawa ;
Qa iye Ikcewicaśta kin wowidagwicaya ece.
- 29 Maka akan tona cepapi owasin wotapi qa ohodapi kta ;
Watuśekśeca ekta kun yapi kin iyuhpa he itokam patujapi kta :
Qa tuwe iye nagi nikiya okihi śni kin.
- 30 Wicacinca wowidagwicaye kta ;
Hena Itancan kin wicoicage wicahdawa kta.
- 31 Upi qa toowotanna kin oyakapi kta ;
Oyate wan tonpi kte cin en ;
Iye hecon kin heon.

PSALM 23.

Dawid tadowan.

- 1 Wonmakiye cin Jehowa hee :
Takudan imakakije kte śni.
- 2 Peji toto en iwanke maye kta ;
Wicoozi mini kin icahda yus amaye kta.
- 3 Minagi yuecetu kte ;
Woowotanna canku kin ohna amaye kta ;
Iye caje kin on.
- 4 Han, wiconṭe ohanzi kaksiza kin en mawani kinhan,
Taku śica kowakipe kte śni, niye mici yaun heon ;
Cansakadan nitawa qa cansagye nitawa, hena cantohnagmaye kta.
- 5 Tokamayampi wicitokam wahna wotapi wan wiyeya miyecihnake kta ;
Wihdi on pa sdamayakiye ;
Wiyatke mitawa iyatahde.
- 6 Awicakehan wani kta anpetu owasin,
Wowašte wowaonśida ko miyahna un kta :
Qa Jehowa ti kin en ounwaye kta, anpetu hanskaska.

PSALM 24.

Dawid tadowan.

- 1 Maka kin Jehowa tawa, qa woojudan kin ;
Makowancaya qa tona ounyanpi kin.
- 2 He iye miniwanca kin akan ehde ;
Qa wakpa kin iwankam sutaya kaga.
- 3 Jehowa Paha tawa kin tuwe ekta ye kta he ;
Qa oyanke wakan tawa ohna tuwe yanke kta he.
- 4 Tuwe nape kin ska, qa cante kin ecedan ;
Tuwe takuśniśni ekta nagi yeiçiye śni ;
Qa wohnyaye on ičiconze śni kin.
- 5 He Jehowa etanhan woyawašte icu kta ;
Qa woowotanna, Wakantanka Wanikiya tawa kin etanhan.
- 6 Wicoicage okide unpi kin he dee :
Niite akitapi kin hena Jakob eepi. Sela.
- 7 Tiyopa kin, pa yuwankan ehdaku po ;
Qa tiyopa ohinniyan un wankan iyeiçiya po :

- Unkan Wowitan Wicaštayatapi kin tīn hiyu kta.
- 8 Wowitan Wicaštayatapi kin he tuwe he :
 Jehowa waśake ɕa waditake ;
 Jehowa kiczapi en mdetahunka.
- 9 Tiyopa kin, pa yuwankan ehdaku po ;
 Qa tiyopa ohinniyan un wankan iyeiɕiya po :
 Unkan Wowitan Wicaštayatapi kin tīn hiyu kta.
- 10 Wowitan Wicaštayatapi kin he tuwe he :
 Jehowa Sabaoth,
 Wowitan Wicaštayatapi kin hee. Sela.

PSALM 25.

Dawid tawa.

- 1 Jehowa, niye ekta,
 Minagi wankan wahdomde kta.
- 2 Wakantanka mitawa, niye wacinciya ;
 Imaštece śni nunwe ;
 Tokamayanpi ohimayanpi śni nunwe.
- 3 Nakun tona anipepi owasin ištecapi kte śni :
 Takuśni on wahtanipi kin hena ištecapi kta.
- 4 Jehowa, nitacanku kin hena makipazo wo ;
 Niohan kin hena onspemakiya ye.
- 5 Nitowicake en omani makiye ɕa onspemakiya wo ;
 Wakantanka Wanikiya mitawa kin he niye ;
 Anpetu owasin niye acipe waun.
- 6 Jehowa, nitowaonśida qa nitocantekiye kiksuya ye ;
 Hena otokahe wanica heon etanhan.
- 7 Komaśka ehan wawahtani qa taku śica ecamon qon hena kiksuye śni
 ye ;
 Wawacinkta duza tanka eciyatanhan miksuya wo ;
 Jehowa, nitowašte kin heon etanhan.
- 8 Jehowa wašte qa owotanna ;
 Heon canku kin ohna wahtanipi sa onspewicakiye kta.
- 9 Tona onśihanpi kin woyaco en yus awicaye kta ;
 Qa onśihanpi kin iye tacanku onspewicakiye kta.
- 10 Jehowa tohan kin owasin wowaonśida qa wowicake,
 Tona wicotakuye tawa qa woyaatanin tawa opapi kin hena en

- 11 Jehowa, nicaje kin on etanhan,
Wawahtani micicajuju ye, he tanka nakaes.
- 12 Wicašta Jehowa kokipe cin tukte e he ;
Canku hdahnige kte cin he onspekiye kta.
- 13 Iye nagi wowašte en wanke kta ;
Qa cinca kin makoce kin tawayapi kte.
- 14 Tona Jehowa kokipapi kin hena kici wohdakapi ece ;
Unkan wicotakuye tawa kin sonyewicakiye kta.
- 15 Miišta ohinniyan Jehowa ekta ;
Wohmunke etanhan misiha eyaku kta, heon.
- 16 Miye ekta ihduhomni qa onśimakida ye ;
Miśnana waun qa makakija, heon etanhan.
- 17 Micante iyotanhan iyekiye cin yutankapi ;
Makakije cin etanhan emayaku wo.
- 18 Iyomakiśica qa wamayazan kin wanyaka wo ;
Qa wawahtani owasin micicajuju ye.
- 19 Tokamayanpi kin wanwicayaka wo ; hena otapi ;
Qa wośicedake wohitika on śicemadapi ece.
- 20 Minagi micipatan qa emayaku wo ;
Imaštece śni nunwe ; wacinciya heon.
- 21 Woyuecetu qa wicoowotanna mapatanpi kta ;
Acipe waun kin heon etanhan.
- 22 Wakantanka, wicokakije owasin etanhan
Israel ewicahdaku wo.

PSALM 26.

Dawid tawa.

- 1 Jehowa woyaco maqu wo :
Mitoecetu kin ohna mawani, heon :
Nakun Jehowa wacinyan waun ;
Maħicahe kte śni.
- 2 Jehowa mayukcan qa imayutan wo ;
Mapakśin micante ko yuecedan ye.
- 3 Nitowaonśida miišta itokam un ;
Qa wowicake nitawa ohna mawani.
- 4 Wicašta itonpiśni om imdotanke śni ;
Qa wanakihmanpi kin en mde kte śni.

- 5 Śicaya econpi omniciye kin śice wadaka ;
Qa wahtanipi sa om imdotanke kte śni.
- 6 Wiyaonpepicaśni ohna nape wahdujaja ;
Hecen Jehowa, owayuśna nitawa ohomni mde kta.
- 7 Wopida ho kin on eyanwapaha kta ;
Qa niohan wakan owasin omdake kta.
- 8 Jehowa, yati ounyanpi kin he wašte wadaka ;
Qa nitowitan wokeya oyanke kin he nakun.
- 9 Wahtanipi sa om minagi mnakiye śni wo ;
Qa mitaniya, we wicašta kin om.
- 10 Hena napepi ohna wicowicašta śni ;
Qa nape etapapi wiyopeyapi ojudan.
- 11 Tuka miye qe mitoecetu ohna mawani kta :
Opemakiton qa onśimakida wo.
- 12 Misiha makomdaya ohna han :
Mniciyapi kin en Jehowa mdawašte kta.

PSALM 27.

Dawid tawa.

- 1 Jehowa iyoyanpa mitawa qa Wanikiya mitawa hee, tuwe kowakipe kta
he ;
Jehowa wiconi mitawa wowaśake kin hee, tuwe on kopewahda kta he.
- 2 Wicašta śica micehpi yutapi kta e mikiyedani upi qehan,
Tokamayampi qa śicemadapi kin hena eepi hicahanpi qa hinhpayapi.
- 3 Wicota en ahimawanka ešta, micante kokipe kte śni ;
Ozuye wan ahimanajin ešta, de wacinyan waun.
- 4 Taku wanji Jehowa wakida, he awakita ece kta ;
Anpetu tona wani kin owasin Jehowa ti kin en waun kta ;
Jehowa toiyokipi wanmdake kta,
Qa tipi wakan tawa kin ohna wawimunge kte.
- 5 Anpetu śice cin en tawokeya ohna namahbe kta ;
Iye tawakeya onahbe kin en inahbe makiye kta ;
Imnija wan akan wankan emahnake kte.
- 6 Unkan nakaha mapa kin toka mihdukśan hiyeya wiciwankam un kte ;
Heon iye tawakeya ohna wowiyuśkin wośna kin wawakiyuśna kta ;
Wadowan kta, han, Jehowa odowan wakahiyaye kte.
- 7 Jehowa anagoptan wo, miho on wahowamde ;

- Hecen onśimakida qa amayupta wo.
- 8 Miite akita po : Micante heniciya ;
Jehowa, niite awakite kta ce.
- 9 Niite inamakihibe śni wo ;
Canniniyan nitaokiye ehpeye śni ye ;
Omakiye cin he niye ; amayuśtan śni wo ;
Qa ehpemaye śni, Wakantanka Wanikiya mitawa.
- 10 Tohan ate qa ina ehpemayanpi kinhan,
Hehan Jehowa imacu kte.
- 11 Jehowa, nitacanku kin onspemakiya ye ;
Qa ocanku owotanna ohna amayan wo,
Tona iwanmayakapi kin hena on.
- 12 Tokamayanpi tawacinpi kin en wicamaqu śni wo ;
Wayaanin itonpi śni kin itkom mahinajinpi,
Qa tona wośitkihda apoganpi kin.
- 13 Wiconi makoce kin en,
Jehowa towašte opahta wacinwaye śni kinhan.
- 14 Jehowa wacinyan wo ;
Waditaka wo, kinhan cante niyuwaśake kte :
Han, Jehowa wacinyan wo.

PSALM 28.

Dawid tawa.

- 1 Jehowa, niye hoyeciciye kta ;
Imnija mitawa, miye on inina yanke śni wo ;
Miye on noge nikpe cinhan,
Hehan wicahapi ekta yapi kin iyemacece kta.
- 2 Houciciya eca wocekiye mitawa ho kin nahon wo ;
Nitawakeya wakan ektakiya nape mdugata eca.
- 3 Wicašta śica om ehpemaye śni wo ;
Qa tona woahntani econpi kin om ;
Hena wicikiyedani unpi kin om wookiye eyapi ;
Tuka cantepi en woyuśica yukan.
- 4 Taku econpi kin iyecen wicaqu wo ;
Qa śicaya ohanyanpi kin iyececa ;
Iye nape ohanpi kin on niye wicaqu wo ;

- Taku econpi kin iyecen wicakicu wo.
- 5 Jehowa tohan kin hena awacinpi kte śni,
Qa iye nape taku kage cin hena,
Heon wicakawanke kta, qa icahwicaye kte śni.
- 6 Jehowa yawaštepi nunwe ;
Wocekiye mitawa ho nahon kin heon.
- 7 Jehowa mitowaśake qa wahacanka mitawa kin hee :
Micante wacinyan un, unkan omakiyapi :
Heon micante nina iyuśkin kta ;
Qa odowan mitawa on mdatan kte.
- 8 Wowaśake tawapi kin Jehowa hee ;
Qa wiconi conkaśke wan iye Sdakiye cin tawa.
- 9 Nitaoyate niwicakiya wo ;
Qa taku nitawa kin hdawašte wo :
Nakun wonwicaya wo,
Qa owihanke wanica hehanyan wicahduha ye.

PSALM 29.

Dawid tadowan.

- 1 Waśakapi cinca kin, Jehowa qu po ;
Jehowa wowitan wowaśake ko qu po.
- 2 Iye caje towitan kin Jehowa kicu po ;
Wokoyake wakan un Jehowa ohoda po.
- 3 Jehowa ho kin mini kin akan ;
Wowitan Wakantanka wakinyan hotonkiya ;
Jehowa mini tanka kin akan un.
- 4 Jehowa ho kin wowaśake en ;
Jehowa ho kin wowitan en un.
- 5 Jehowa ho kin hanteśa bowehwega ;
Han, Jehowa Lebanon hanteśa kin kawehwega :
- 6 Qa ptejincadan wan iyecen psipsinwicaya ;
Lebanon qa Sirion, tatanka cinca iyececa.
- 7 Jehowa ho kin peta ide kin yapta ece.
- 8 Jehowa ho contanka kin yahuhuze kta ,
Qadeś contanka kin Jehowa yuhuhuze kta.
- 9 Jehowa ho kin tawiyedan hokśiksuye kiya ;
Qa can kin kahna okihi kta :

- Unkan iye ti kin ohna owasin, Wowitan, eyapi ece.
- 10 Jehowa mini tanka kin akan iyotanka ;
Han, Jehowa Wicaštayatapi iyotanka, owihanke wanica.
- 11 Jehowa iye taoyate wowaśake wicaqu kte :
Jehowa iye taoyate wookiye on wicayawašte kta.

PSALM 30.

Odowan. Tipi yuwakanpi kin on downapi. Dawid tawa.

- 1 Jehowa, iyotan ciyawa kta, niye wankan emayahde ;
Qa tokamayanpi miye on iyuśkinwicayaye śni heon.
- 2 Jehowa Wakantanka mitawa,
Hoyeciciya, unkan niye asnimayaya.
- 3 Jehowa, Hades etanhan minagi iyacu ;
Woħa ekta yapi kin etanhan nimayaya.
- 4 Wicašta wacantkiye tawa, niye Jehowa kahiyaya po ;
Qa iye towakan kiksuyapi kin on wopida eya po.
- 5 Tocanniye kin išta kakpapi hehanyan ;
Toiyokipi kin he wiconi :
Htayetü eca wicaceya yuke kta,
Tuka hanhanna downapi kta.
- 6 Unkan miye tanyan waun kin en,
Owihanke wanin mapahohopi kte śni ce, epa.
- 7 Jehowa, nitoyokipi kin on paha mitawa wowaśake yakaga ;
Niite nayakihbe, unkan mayuśinyaya.
- 8 Jehowa, niye hoyeciciye kta ;
Qa Jehowa wocekiye ewakiye kta.
- 9 Mawe kin en wokamna yukan he,
Woħa ekta kun mde cinhan :
Maka mdu kin niyatan kta he ;
Nitowicake kin oyake kta he.
- 10 Jehowa, anagoptan qa onśimakida ye ;
Jehowa, omakiye cin he niye nunwe.
- 11 Waśinwahda kin he wacipi miyecaga ;
Heyake śica mayakiduśdoke ĉa wowiyuśkin on ipiyag mayakiton.
- 12 Heon wowitan inidowan kta, qa inina un kte śni ;
Jehowa Wakantanka mitawa, owihanke wanin wopida eciciye kta.

PSALM 31.

Dowan itancan kin on. Dawid tadowan.

- 1 Jehowa niye wacinciya :
Owihanke wanin imaštece śni nunwe :
Nitoowotanna on emahdaku wo.
- 2 Anohmakiya ye ; emayaku inahni wo :
Wowaśake imnija mitawa kin he niye nunwe ;
Qa conkaśke tipi on nimayanpi kte.
- 3 Imnija mitawa qa conkaśke mitawa kin he niye ;
Heon nicaje on napata mayaduze ça yus amayade kta.
- 4 On hmunkapi nahmana emakionpapi kin etanhan mayadusdute kta ;
Wowaśake mitawa kin he niye, heon etanhan.
- 5 Mitaniya ninape en owehnake kta ;
Jehowa wowicake Wakantanka, niye opemayakiton.
- 6 Tona takuśni itonśni awacinpi kin hena śicewicawadaka ;
Tuka Jehowa wacinwaya ece.
- 7 Nitowaonśida on piwada qa induśkin kte :
Woyokiśice mitawa niye wandaka ;
Wokakije en minagi sdonyaye ciqon.
- 8 Nakun toka nape en onamayatake śni ;
Makoce tanka en siha emayahde.
- 9 Jehowa, onśimada wo, makakija heon :
Woyokiśica on išta maśica amayan ;
Minagi qa mitezi nakun.
- 10 Wani kin woyokiśica on masote ;
Qa waniyetu mitawa comnihdazipi on ;
Wawahtani on waśake śni amayan ;
Qa mahuhu kin hena śihtin.
- 11 Tokamayanpi owasin wowahteda śni mayanpi,
Nakun mikiyeddan unpi kin hena iyotan ;
Qa tona sdonmayanpi kin wokokipe mayanpi ;
Tona tankan wanmayakapi kin hena namakipapi.
- 12 Taku ta iyecen cante on amiktonjapi ;
Wakśica kamdecapi wan iyemaceca.
- 13 Wicota waaiapi kin nawahon ;
Ihdukśan wokokipe, wiyamaonpapi kin icunhan,
Mitaniya icupi kta akitapi.

- 14 Tuka Jehowa, niye wacinciya ;
Wakantanka mitawa kin he niye ce, epa.
- 15 Mitaanpetu ninape ohna un ;
Tokamayanpi qa sícaya makuwapi napepi etanhan emahdaku wo.
- 16 Niite nitaokiye aiyehkiya ye ;
Nitowaonída on nimayan wo.
- 17 Jehowa, imaštece síni nunwe, hoyeciciye cin heon :
Tona sícapi kin hena ístecapi nunwe, Hades en inina unpi kte.
- 18 Woitonási ihapi kin inina unpi nunwe ;
Hena wahaníçidaya qa wawoštehdaya
Ikceya wicašta owotanna aiapi.
- 19 Tona konicipapi nitowašte wicayecihnake cin he tanka hinca ;
Wicašta cinca itokam tona wacinniyampi kin en he wicayakidutanin.
- 20 Hena nitohnake woinahbe kin en nawicayahbe kta,
Wicašta mniciyapi kin etanhan ;
Wicaceji wakinicapi etanhan wokeya wan ohna wicayakpatan kta.
- 21 Otonwe suta wan ohna wowinihanyan cantemakiya,
Heon Jehowa yawaštepi nunwe.
- 22 Tuka miś imanihan qehan,
Niišta itokapatanhan makaşpapi ce, epa :
Hececa ešta cewakiya ho kin namayakihon,
Hoyeciciye çehan.
- 23 Wicašta wacantkiye tawa kin owasin, Jehowa waştedaka po :
Tona wicakapi kin hena Jehowa wicakpatan ;
Qa tuwe wahanháníçidaya ohanye cin he iyakiçuya kicicajuju ece.
- 24 Waşaka po, hecen cante niyuşinzapi kte ;
Jehowa wacinyayapi kin owasin.

PSALM 32.

Wowahokonkiye odowan. Dawid tawa.

- 1 Tuwe taku síca econ kin kicicajujupi,
Qa wahtani akaşpapi kin he cante wašte :
- 2 Wicašta kin he cante wašte,
Tuwe Jehowa woahani kiciyawa síni,
Qa taniya en wohnyan wanice cin he.
- 3 Inina manke çehan mahuhu seca aya,

- Anpetu osan wašicahowamde çehan.
- 4 Anpetu hanyetu ko ninape amahdaskin yanka ;
Mawe kin mdoketu puze cin iyecen aya. Sela.
- 5 Wawahtani niye ociciyake kta ;
Qa taku šica ecamon kin anawakihbe šni :
Taku šica ecamon kin hena Jehowa owakiyake kta ce, epe :
Unkan wawahtani šice cin miyecicajuju. Sela.
- 6 He on tona wacantkiye cin owasin ceniciyapi kta,
Tohan iyeniyampi kte cinhan :
Awicakehan mini ota apašboka ešta,
He hiyohipi kte šni.
- 7 Woinahbe mitawa kin he niye ;
Wokakije etanhan emayahdaku kta ;
Woehdaku odowan on aohdutemayaye kta. Sela.
- 8 Wahokonciciye ça canku ohna de kte cin he onspeciciye kta ;
Miišta opacihta wahokonciciye kta.
- 9 Ihnuhan šuktanka qa šonšonna wan iyenicecapi kinhan ;
Hena takudan okahnigapi šni ;
Iiyuwi qa ikan oiyokipi on i pawicahtapi ;
Nikiyedani upi šni heon etanhan.
- 10 Tona šice cin wokakije ota yuhapi kte :
Tuka tuwe Jehowa wacinye cin he wowaonšida aohduteye kta.
- 11 Tona owotanna yaunpi, Jehowa on pidapi qa iyuškin po ;
Qa tona cante ecetu yaunpi owasin, wiyuškinyan iyaša po.

PSALM 33.

- 1 Wicašta owotanna yaunpi, Jehowa on wiyuškin po :
Yatanpi kin tona ecetupi iyokipipi ece.
- 2 Candowankiyapi on Jehowa wopida eciya po ;
Candowankiyapi ikan wikcemna on idowan po.
- 3 Odowan teca wan kahiyaya miye ;
Ho tanka on wayupiya yajo po.
- 4 Jehowa oie kin he ecetu ;
Qa ohan kin owasin wowicake.
- 5 Woowotanna qa wokonze waštedaka ;
Maka kin Jehowa towaonšida on ojudan.
- 6 Jehowa oie on mahpiya kin kagapi ;

- Qa iye i taniya on hena obe kin owasin.
- 7 Miniwanca mini kin kawitaya, paha iyececa ;
Ośbe kin mazopiye en ekihnaka.
- 8 Maka kin ocowasin Jehowa kokipapi kte ;
Maka akan ounyanpi iyuhpa itokam inihanpi nunwe.
- 9 Iye ia, unkan ecetu ;
Iye kaken eya, unkan sutaya han.
- 10 Ikcewicaśta tawacinpi kin Jehowa ecetu śni ya ;
Oyate token wakiconzapi kin he yujuju ece.
- 11 Jehowa tawokonze kin ohinniyan he kta ;
Iye cante yuze cin wicoicage qa wicoicage hehanyan.
- 12 Oyate wan Jehowa Taku Wakan yuhapi kin he cante waśtepi ;
Wicaśta iye tawawicaye kta wicahdahnige cin hena.
- 13 Jehowa mahpiya eciyatanhan ahitonwan ;
Adam cinca kin owasin wanwicayaka.
- 14 Tukten ounye cin hetanhan etonwan,
Maka akan ounyanpi owasin ekta :
- 15 Cantepi kin owasin wicakaga ;
Wicohan tawapi owasin awacin un.
- 16 Wicaśtayatapi tuwedan ozuye tanka on niyanpi śni :
Wicaśta waśaka keś wowaśake tanka on ihduśke kte śni.
- 17 Niwicayapi kta on śuktanka kin wacinyepica śni ;
Qa iye towaśake tanka on waeyaku kte śni.
- 18 Iho, Jehowa iśta kin tona kokipapi kin hena awicatonwan ;
Tona iye towaonśida apeci kin hena.
- 19 Wiconṭe etanhan nagipi ewicahdaku kta ;
Qa wicaakihan en niwicaye kta.
- 20 Unnagipi Jehowa wacinyanpi ;
Ounkiyapi qa wahacanka unkitawapi kin he iye.
- 21 Iye on uncantepi iyuśkin kte ;
Iye caje wakan wacinunyanpi heon.
- 22 Jehowa, nitowaonśida unkiyepi en un nunwe ;
Unkanipepi kin heon etanhan.

PSALM 34.

Dawid tawa. Abimelek itokam togye ohanyan ; unkan hdeśi hehan kihda, he ehan.

- 1 Anpetu owasin Jehowa mdawaśte kta ;

- Iye idowanpi kin ohinniyan mii ohna un kta.
2 Jehowa on minagi itan kta :
Tona onśihanpi nahonpi kta qa iyuśkinpi kta.
3 Jehowa mici yatanka miye ;
Qa yuwitaya iye caje kin unyawankantupi kte.
4 Jehowa awakita, unkan amayupta ;
Qa wakowakipe cin owasin etanhan emahdaku.
5 Ekta etonwanpi, unkan iyoyamyapi ;
Qa ite naśapi śni nunwe.
6 Onśike cin de howaya, unkan Jehowa nahon,
Qa tokakije owasin etanhan ehdaku.
7 Tona kokipapi kin hena wicihdukśan,
Jehowa taohnihde kin iwanka,
Qa ewicayaku ece.
8 Uta miye, qa Jehowa wašte e wanyaka po :
Tuwe wacinye cinhan wicašta kin he cante wašte.
9 Wacantkiya yaunpi tawaniyanpi, Jehowa kokipa po ;
Tona kokipapi kin hena takudan icakijapi kte śni.
10 Mnaja cinca wicakiś unpi qa wotektehdapi ;
Tuka Jehowa akitapi kin hena taku wašte takudan icakijapi kte śni.
11 Iho po, micinca, anamagoptan po ;
Jehowa tokokipe kin onspeciciyapi kta.
12 Wicašta wiconi cin, qa taku wašte
Wanyake kta e anpetu waštedake cin he tuwe he.
13 Taku śica etanhan niceji ehdaku wo ;
Qa niiha wohnyayan eyapi kte śni.
14 Taku śica ehpeya wo, qa taku wašte e econ wo :
Wookiye akite ça kuwa aya wo.
15 Jehowa išta wicašta owotanna awicatonwan ;
Qa howayapi eca anohwicakiya ece.
16 Tona taku śica econpi Jehowa ite kin itkowicakim un ;
Maka kin etanhan wicakiksuyapi kin icu kte.
17 Hoyeyapi, unkan Jehowa nahon,
Qa tokakijepi iyuhpa etanhan ewicahdaku.
18 Jehowa cante kicaksapi kin wicikiyedani un ;
Qa tona taniya onśike cin hena niwicaya ece.
19 Wicašta owotanna tokakije kin ota ;
Tuka owasin etanhan Jehowa eyaku kta.
20 Huhu tawa owasin awankiciyaka ;

- Hecen wanjidan kaeś kawegapi śni.
- 21 Wośice tona śice cin hena wicakte kta ;
Qa wicaśta owotanna śice wicadakapi kin hena yacopi kta.
- 22 Jehowa taokiye nagipi kin opewicakiton ;
Qa tona iye wacinyanpi kin tuwedan yacopi kte śni.

PSALM 35.

Dawid tawa.

- 1 Jehowa, tona makigepi kin hena wicakige wo ;
Tona makizapi kin hena wicakiza wo.
- 2 Mazamakuakahpe wahacanka ko ikikcu,
Qa omakiya inajin wo.
- 3 Nakun wahukeza ehdaku,
Qa tona śicaya makuwapi wicakagi wo ;
Wiconi nitawa kin he miye ce, minagi eciya wo.
- 4 Minagi odepi kin hena inihanpi qa ístecapi nunwe ;
Tehiya amawacinpi kin hena hekta hdicuwicayapi qa ístenwicayapi
nunwe.
- 5 Aguyapi ha tate itokam hena iyececapí nunwe ;
Qa Jehowa taohnihde hena wicakaśtake kte.
- 6 Tacankupi kin otpaza qa śduśduta nunwe ;
Qa Jehowa taohnihde kin kuwa awicaye kte.
- 7 Taku on etanhan śni wohmunke wan miye on nahmana eonpapi ;
Taku on etanhan śni minagi on woħa wan qapi.
- 8 Sdonye śni kinhan woihangye kin en u nunwe ;
Qa wohmunke nahbe cin he iye içihmunka nunwe ;
Woihangye kin hee en ohinhpaya nunwe.
- 9 Hehan minagi Jehowa on iyuśkin kta ;
Wiconi tawa kin idowan kta.
- 10 Mahuhu owasin heyapi kta ;
Jehowa, tuwe iyeniceca he ;
Tuwe isanpa waśaka etanhan onśike cin eyahdaku ;
Han, onśike ĉa wahpanica kin, tuwe wamakinon kin etanhan.
- 11 Itonśniyan woyakapi kin hinajinpi ;
Taku sdonwaye śni kin hena on imawangapi.
- 12 Taku wašte on taku śica maqupi ;
On minagi kakiśyapi kta.

- 13 Tuka miye qe, wayazankapi qehan, wakihdaka komdaka ;
Akihanmiçiya on minagi kakişwaye :
Unkan wocekiye mitawa mamaku en hdihan.
- 14 Mitakoda se, misunka hee, he iyecen mawani ;
Tuwe hunku akiceye cin iyecen waşihda pamahdedan waun.
- 15 Tuka nakaha nawaşduta, hehan iyuşkinpi qa witaya mniciyapi ;
Waaie sa kin hena miye en mniciyapi, unkan sdonwaye şni :
Wayahdehdecapi qa inina unpi şni.
- 16 Wota ia şicapi kin hena om ;
Hi amahdakinskinzapi.
- 17 Itancan, tohanyan opahta nanke kta he :
Woihangye tawapi etanhan minagi hdohdi wo ;
Waştewakidake cin, mnaja kin etanhan.
- 18 Omniciye tanka kin en wopida eciciye kta ;
Oyate waşaka om ciyatan kta.
- 19 Tokamayanpi itonpişni kin hena miye on iyuşkinpi şni nunwe :
Tona taku on etanhan şni şicemadapi kin hena išta kakpanpi.
- 20 Hena wookiye iapi kte şni ;
Tuka tona makoce kin en, inina unpi kin
Hena wohnyan wicoie wicakicagapi kta.
- 21 Han, hena nina i makapapi :
Qa heyapi ; Hoho, hoho,
Išta on wanunyakapi ce.
- 22 Jehowa niye wandaka, inina yanke şni wo ;
Itancan, mitehanyan un şni wo.
- 23 Ihduhica ye, qa mayacopi kte cin on kikta wo ;
Makiyuşepi kin on,
Wakantanka mitawa, qa Itancan mitawa.
- 24 Jehowa Wakantanka mitawa,
Nitoowotanna eciyatanhan mayukcan wo ;
Qa hena miye on iyuşkinpi şni nunwe.
- 25 Cante mahen, Hoho, hecen uncinpi ce, eyapi şni nunwe ;
Naunkipcapi ce, eyapi şni nunwe.
- 26 Tona makakija on iyuşkinpi kin hena iştécapi,
Qa witaya ite naşapi nunwe ;
Tona miye on ihdatankapi kin hena wowahteda şni,
Qa wowiştece koyakapi nunwe.
- 27 Tona mitoowotanna cinpi kin hena iyaşapi,
Qa wiyuşkinpi nunwe ;

- Han, ohinniyan heyapi kte ; Jehowa tanka ce,
Iye taakiye wookiye kicicin kin hee.
28 Unkan miceji nitoowotanna cajeyate kta ;
Niyatanpi kin anpetu osan.

PSALM 36.

Dowan itancan kin on. Jehowa taakiye wan kaga. Dawid tawa.

- 1 Micante mahen, wicoŕice wicaŕta ŕica heciya ;
Iye iŕta itokam Taku Wakan kokipapi wanica ce.
- 2 Iye iŕta kin en ihdawaŕte ;
Tuka wahtani kin iyeyapi qa ŕicedapi kta.
- 3 Iye i oie kin hena woitonŕni qa wohmayan ;
Wacinksamya waŕteya econ kta he ayuŕtan.
- 4 Towinja akan woitonŕni awacin un kta ;
Canku waŕte ŕni wan ohna iyahe kta ;
Taku ŕica ayuŕtan kte ŕni.
- 5 Jehowa, nitowaonŕida kin he maŕpiya ekta un ;
Nitowicake maŕpiya ŕapa iyahde.
- 6 Nitoowotanna kin he Iyotan Waŕaka ta he kin iyececa :
Wokonze nitawa kin he woŕbe tanka :
Jehowa, wicaŕta woteca ko ni wicayaya.
- 7 Wakantanka, nitowaonŕida kin he waŕte hinca ;
Heon Adam cinca nihupahu ohanzi kin en wacinyanpi kta.
- 8 Yati wasna kin on imnanpi kte ;
Qa wowaŕte nitawa wakpa kin etanhan yatke wicayaye kta.
- 9 Wiconi minihdoka wan nici wanke :
Iyoyanpa nitawa en iyoyanpa wanunyakapi kta.
- 10 Tona sdonniyanpi kin hena nitowaonŕida iyohi wicakiya wo :
Qa nitoowotanna, tona cante ecepidan kin.
- 11 Wahaniŕidapi siha kin anamatan ŕni nunwe ;
Qa ohan ŕica nape kin napemaye ŕni nunwe.
- 12 Hen wicohan ŕica econpi kin hinhpayapi ;
Hena makata ehpeyapi, qa najin okhipi kte ŕni.

PSALM 37.

Dawid tawa.

- 1 Wicohan síca econpi kin hena on iyokişiniçiye şni wo ;
Qa woahntani econpi kin on winawizi şni wo.
- 2 Hena ecadan kaşdapi kta, peji iyececa ;
Qa wato iyecen şnijapi kta.
- 3 Jehowa wacinyan wo, qa taku waşte econ wo :
Makoce kin en ounye ça wowicake akita wo :
- 4 Nakun Jehowa en iyokipiiciya wo ;
Kinhan taku iceyakiye cin hena niçu kta.
- 5 Nitacanku kin Jehowa yuhekiya wo ;
Nakun wacinyan wo ; kinhan ecetuye kta ;
- 6 Qa nitoowotanna iyoyanpa iyecen yutanin kta ;
Qa wokonze nitawa kin wiyotanhan iyececa.
- 7 Jehowa en inina un, qa wacintankaya ape wo ;
Tuwe canku ohna wapiya un kin he on iyokişiniçiye şni wo ;
Tuwe wicotawacin síca hduacetu kin on.
- 8 Wocanniye ayuştan qa woşihda ehpeya wo ;
Taku síca ecanon kta e iyokişiniçiye şni wo.
- 9 Tona taku síca econpi kin hena ihangwicayapi kta ;
Tuka Jehowa wacinyanpi kin hena makoce kin yuhapi kta.
- 10 Ehake cistiyedan hehan wicašta síca en un kte şni ;
Han, tohe kin opahta yaun kta, tuka en un şni.
- 11 Tuka tona onşiiçidapi kin hena makoce kin tawayapi kta ;
Qa wookiye ota on iyuşkiniçiyapi kta.
- 12 Wicašta síca wicašta owotanna iyape un ;
Qa hi ahdakinskinza ece.
- 13 Itancan kin ihaħa kta ;
Taanpetu u kta wanyake cin heon.
- 14 Wicašta şicapi mazasagye ehdakupi ;
Qa tinazipepi nakiwinjapi ;
Onşika qa wahpanica kin makata ehpewicayapi kta ;
Qa tona oħan owotanna kin wicaktepi kta.
- 15 Mazasagye tawapi kin on iye cante caiçipapi kta ;
Qa tinazipepi kin kawegapi kta.
- 16 Taku cistinna wicašta owotanna tawa kin he waşte ;
Wicašta síca ota wowijice yuhapi kin isanpa.
- 17 Wicašta síca isto kawegapi kta :
Tuka Jehowa wicašta owotanna najin wicakiya ece.

- 18 Wicašta ecetu taanpetu kin hena Jehowa sdonya :
Qa taku yuhapi kin he owihanke wanice kta.
- 19 Anpetu síca en ístecapi kte śni ;
Qa wicaakihan anpetu kin en imnahan wotapi kta.
- 20 Tuka wicašta síce cin hena atakunipi kte śni ;
Qa Jehowa tokayapi kin ;
Tahinca cinca śin kin iyecen huhnagapi ;
Śota en taninpi śni.
- 21 Wicašta síca wodota keś wicakicu kte śni :
Tuka wicašta owotanna wacantkiye ça wawicaqu ece.
- 22 Tona wicayawašte kin hena makoce kin tawapi kta :
Qa tona wicayaśice cin hena ihangyapi kta.
- 23 Jehowa eciyatanhan wicašta caehde kin yuecetupi ;
Qa tacanku kin on iyuśkin kte.
- 24 Hinhpaye kta, tuka makata ehpeyapi kte śni ;
Jehowa nape yuze cin heon etanhan.
- 25 Homakśidan waun, qa wanna wimacahinca ;
Tuka wicašta owotanna kin ehpeyapi,
Qa cinca woda unpi wanmdake śni.
- 26 Anpetu osan waonśida qa owicaqu ece :
Unkan cinca kin hena woyawašte.
- 27 Taku síca ayuśtan qa taku wašte e econ wo ;
Qa owihanke wanin onunyan wo.
- 28 Jehowa wokonze waśtedaka ece ;
Qa wicašta wacantkiye tawa kin hena ehpewicaye kte śni ;
Hena ohinniyan wicakpatanpi :
Tuka wicašta síca cinca kin hena ihangwicayapi.
- 29 Wicašta owotanna makoce kin tawayapi kta ;
Qa owihanke wanin en onunyanpi kte.
- 30 Wicašta owotanna i kin woksape ie kta ;
Qa ceji wokonze iwohdake kte.
- 31 Iye ta Wakantanka tawoahope kin cante mahen un ;
Caehde tawa kin kaktihanhan kte śni.
- 32 Wicašta síca wicašta owotanna iwanyaka ;
Qa kte kta akita ece.
- 33 Tuka nape en Jehowa ehpeye kte śni ;
Qa aiapi kinhan yaco kte śni.
- 34 Jehowa ape un wo, qa tacanku patan wo ;
Unkan makoce tawayaye kta e yuwankan inicu kta ;

- Wicašta síca ihangyapi kinhan wandake kta.
35 Wicašta síca wohitika wan wanmdaka ;
Qa ihdutanka, can teca icage cin iyececa :
36 Tuka tanin śni iyaya, unkan inyun en un śni ;
Han owade, tuka iyeyapi śni.
37 Wicašta ecetu kin he iyukcan, qa owotanna kin wanyaka wo ;
Wicašta kin he owihanke kin wookiye.
38 Tuka wawakipajinpi kin witaya ihangyapi kte ;
Wahtanipi sa owihanke kin he baśpa iyeyapi.
39 Tuka wicašta owotanna niwicayapi kin he Jehowa etanhan :
Wokakije anpetu kin en wowaśake tawapi kin hee.
40 Unkan Jehowa owicakiye ça ewicahdaku :
Wicašta síca etanhan ewicayaku qa niwicaye kta ;
Iye wacinyanpi, heon etanhan.

PSALM 38.

Dawid tadowan. Wokiksuye on.

- 1 Jehowa, wocanniye nitawa en iyopemaye śni wo ;
Qa śinyahda hinca en makapsinpsinte śni wo.
2 Nitunwanhinkpe kin bomahdokapi ;
Qa ninape sutaya amapaskica.
3 Nitocanniye on micehpi zaniyan un śni ;
Wawahtani on mahuhu en woozi wanica.
4 Wawahtani kin hena pa iwankam imayaya ;
Waqin tke hinca iyecen on mduśaka ece.
5 Amapapi kin tonyan qa śicamna ;
Wimatkotkoke cin heon etanhan.
6 Mahnaśkinyan, nina patuś nawajin ;
Anpetu osan waśihda waun.
7 Wowayazan síca wan on pakśin omajudan ;
Qa micehpi tuktedan zani śni.
8 Wamaśake śni qa nina makaśuśujapi ;
Cante mayazan heon waśicahowamda ece.
9 Itancan, token cantowakpani owasin nitokam un ;
Qa waśicahowamde cin he nanicihmanpi śni.
10 Cante mahniyanyan, waśake śni amayan ;

- Nakun miišta iyoyanpa kin hee kaeś iyemacetu śni.
- 11 Tona waśtemadapi qa mitakuye wamayazan kin en najinpi kte śni ;
Qa mikiyedani unpi qon itehanyan inajinpi.
- 12 Unkan minagi akitapi kin hena mahmunkapi ;
Qa tona śicaya waun kta cinpi kin hena taku śica eyapi ;
Qa anpetu osan wohnyan awacinpi kta.
- 13 Tuka miye, noge tpa iyececa, nawahon kte śni ;
Qa ia okitpani i hdukawa kte śni kin iyemaceca.
- 14 Hecen wicašta wanahon śni kin iyecen waun ;
Qa tuwe i ohna iyopeyapi wanice cin.
- 15 Jehowa niye acipe waun kin heon,
Niye waadupte kte, Itancan Wakantanka mitawa.
- 16 Unkan hepa ; Okinni miye on iyuśkinpi kta ;
Siha nawaśduta eca miye on ihdatanpi ece.
- 17 Miye humašte waun kin heon ;
Qa iyomakiśice cin ohinniyan mitokam un.
- 18 Miohan śice cin owahdake kta ;
Qa wawahtani kin on iyokiśinmiçiye kta.
- 19 Tuka tokamayampi ni unpi kin hena waśakapi ;
Qa tona taku on etanhan śni śicemadapi kin hena ota aya.
- 20 Tona taku wašte on taku śica econpi kin hena,
Taku wašte awakite cin on makiyuśepi kta.
- 21 Jehowa, amayuśtan śni wo :
Wakantanka mitawa, mitehanyan un śni ye.
- 22 Omakiya inahni wo ;
Itancan, Wanikiya mitawa.

PSALM 39.

Jeduthun dowan itancan kin on. Dawid tadowan.

- 1 Miohan iwanwahdake kta, epa ;
Hecen miceji on wawahtani kte śni :
Ionatake wan mii on mduhe kta ;
Wicašta śica mitokam unpi icunhan.
- 2 Ia okitpani iyecen inina manka ;
Taku wašte ee kaeś ie śni waun ;
Qa mitoiyokiśica yuśośapi.
- 3 Cante mahen makate hinca ;

- Waawacin waun icunhan peta itkon :
 Hehan miceji on iwaa :
- 4 Jehowa, omawihanke kin sdonye makiya wo ;
 Qa mitaanpetu kin tohanyan kta hecinhan ;
 Tohan en waun kte śni sdonwakiye kte.
 - 5 Wan, mitaanpetu kin nape hdakinyan yakaga ;
 Qa nitokam wani kin he takuśni iyececa :
 Awicakehan wicaśta otoiyoŋi, sutaya najin eśta, ocowasin takuśni. Sela.
 - 6 Awicakehan wicaśta kin ohanzi wan en omani ;
 Awicakehan takuśni on nihinciyapi ece :
 Waeju ece, tuka tuwe hena yuhe kta sdonye śni.
 - 7 Unkan nakaha, Itancan, taku e ape waun he :
 Niye hinca wacinciya ece.
 - 8 Wawahtani owasin etanhan emayaku wo ;
 Wicaśta witkotkoka wowihahamayanpi kta makage śni wo.
 - 9 Inina waun, i wahdukawa kte śni ;
 Niye hecanon kin heon etanhan.
 - 10 Amayape cin he imicicu wo ;
 Ninape makaśtake cin on atakuni śni amayan.
 - 11 Iyopeyapi on wicaśta wahtani kin on iyopeyaya ;
 Qa wayapote sa iyecen taku iyokipi kin dutakuni śni :
 Awicakehan wicaśta otoiyoŋi takuśni. Sela.
 - 12 Jehowa, wocekiye mitawa nahon wo ;
 Qa houwaye cin anohkiya ye :
 Iśtamnihanpe amau kin on inina yanke śni wo ;
 Niye kici wicaśta matokeca,
 Unhdaka waun, atewicawaye cin owasin iyececa.
 - 13 Makpatan wo, hecen waśagmiçiye kta,
 Imdamde śni qa en waun śni itokam.

PSALM 40.

Dowan itancan kin on. Dawid tadowan.

- 1 Apepi on Jehowa ape waun ;
 Unkan anohmakiye a hoyewaye cin namakihon.
- 2 Nakun wicotakuniśni woħa wan etanhan hiyu makiya, upśija hinca etanhan ;
 Qa misiha imniya wan ahan makiye ; mioye miciyusuta.

- 3 Qa odowan teca wan mii kin en ohnaka ;
Wakantanka unkitawapi yatanpi kin ;
Wicota wanyakapi qa kokipapi kta ;
Qa Jehowa wacinyanpi kte.
- 4 Wicašta wan cante wašte hinca,
Jehowa wowinape yuhe cin hee ;
Qa tona wahanhaničidapi kin,
Woitonšni opapi kin hena koya ekta etonwe šni.
- 5 Jehowa mita Wakantanka taku ota ecanon ;
Niohan wakan qa unkiyepi on nitawacin kin,
Hena owecinhan niciyawapi kte šni ;
Cajemdate ča omdake kta ešta, hena yawapica šni.
- 6 Wošnapı qa wawicaqupi kin hena iyonicipi šni ;
Noge mayakiduhdoka :
Wahuhnahyapi qa woahťani on wošnapı kin yada šni.
- 7 Hehan hepa ; Wanyaka wo, wau ce ;
Wowapi yuhmihmapi kin en hecen omiciwapi :
- 8 Wakantanka mitawa nitawacin ecen ecamon kta iyomakipi ;
Qa nitoope kin micante mahen un.
- 9 Omniciye tanka kin en woowotanna eyanwapaha :
Wanyaka wo, miiha wakpatan kte šni ;
Jehowa niye sdonyaya.
- 10 Nitoowotanna micante mahen nawahbe šni ;
Wacinniyepica qa waniyakiya omdaka ;
Nitowaonšida qa nitowicake omniciye tanka kin etanhan nawahbe šni.
- 11 Jehowa niye,
Nitowaonšida temiyeciɦda kte šni ;
Nitocantekiye qa nitowicake ohinniyan mapatan kte.
- 12 Taku šica yawapica šni aohdudemayanpi ;
Wawahtani kin hena emihdegapi,
Qa hecen wawanyaka owakihi šni ;
Hena mapa hin isanpa ota ;
Qa on cante mawanica.
- 13 Jehowa, emahdaku iyonicipi nunwe ;
Jehowa, omakiya inahni ye.
- 14 Tona minagi ihangya akitapi kin
Hena witaya cante toketu taninšni qa ištecapi kte ;
Tona šicaya waun kta cinpi kin
Hena hekta hdicupi qa ištecapi kte.

- 15 Tona, Hanhan, hanhan, emakiyapi kin
Hena wowištece on atakunipi kte śni.
- 16 Tona anicitapi kin hena owasin cante waštepi qa iniciyuśkinpi kte ;
Tona wiconi nitawa waštedapi kin hena, Jehowa yatankapi nunwe,
eyapi kte.
- 17 Tuka miye onmaśike ça mawahpanica ;
Itancan kin amawacin un kta :
Tuwe omakiye ça emahdaku kin he niye ;
Wakantanka mitawa yutehan śni ye.

PSALM 41.

Dowan itancan kin on. Dawid tadowan.

- 1 Tuwe wicašta onśika en ewacin kin he cante wašte ;
Anpetu śice cin en Jehowa ehdaku kte.
- 2 Jehowa awanhdake ça nikiye kta ;
Maka akan tanyan un kte ;
Qa tokayapi tawacin kin en wicayaqu kte śni.
- 3 Wowayazan ohe akan Jehowa yuwaśake kta ;
Wayazanka icunhan towinja ocowasin piyaya.
- 4 Miye hepe ; Jehowa onśimakida wo ;
Minagi asniyan wo ; wacicihtani kin heon.
- 5 Tokamayanpi kin hena taku śica emakiyapi kta ;
Tohan ƚe kta qa caje atakuni kte śni he.
- 6 Qa wanmayag hi kinhan woitonśni oyaka ece kta ;
Cante mahen woahntani mnakiya ;
Tokiya ye kte ça oyake kta.
- 7 Tona śicemadapi owasin witaya amajijipi kta ;
Hena śicaya cante makiyuzapi kta.
- 8 Taku śice hinca wan aokaśtanpi ce :
Qa tuwe makata wanke cin he ake kinajin kte śni.
- 9 Han, wicašta kici wowakiye, wacinwakiye ciqon,
Aguyapi mitawa yute cin he siyete on namahtaka.
- 10 Tuka, Jehowa niye, onśimada qa najinmakiya wo ;
Hecen wicawecicajuju kta.
- 11 Detanhan waštemayadaka sdonwakiya ;
Tokamaye cin maktedan śni kin heon.
- 12 Unkan miye, mitoecetu kin en mayadusuta ;

- Qa ohinniyan niite itokam najin mayakiya.
13 Jehowa, Israel ta Wakantanka, yawaštepi nunwe ;
Otokahe wanica qa owihanke wanica.
Amen qa amen.

PSALM 42.

Dowan itancan kin. Qora cinca wahokonwicakiyapi.

- 1 Tatokadan mini wakpadan cantokpani,
He iyecen, Wakantanka, minagi cantonikpani ece.
- 2 Wakantanka on minagi ipuza, Wakantanka ni un kin ;
Tohan wau qa Wakantanka ite kin en mihdutanin kta he.
- 3 Ístamnihanpe amau kin hena woyute waye, anpetu hanyetu koya ;
Nita Wakantanka tukten un he, ohinniyan emakiyapi heon.
- 4 Dena weksuye ça minagi amihdapson kta ;
Wicota om imdamde cinhan ;
Hena om Wakantanka ti kin ekta wai ;
Wowiyuśkin qa woyatan ho kin yuha ;
Wicota anpetu wakan opapi kin hena om.
- 5 Minagi, tokeca pamahdedan yaun,
Qa tokeca miye mahen iyonicisica he ;
Wakantanka wacinyan wo, ake mdatan kte,
Miite omakiye ça mita Wakantanka kin hee.
- 6 Mahentanhan minagi iyokisica un ;
Heon ciksuye kta, Jordan makoce kin etanhan,
Qa Hermon he, paha cistinna kin hetanhan.
- 7 Mini tanka nitawa ho kin on, mini śma kin mini śma kipan ;
Taja nitawa qa mini ihaha nitawa owasin miwankam iyaya.
- 8 Anpetu icunhan Jehowa towaonsida kin ekihde kta ;
Qa hanyetu eca iye tadowan kin mici un ;
Wakantanka nimaye cin he cewakiye kte.
- 9 Wakantanka imnija mitawa hewakiye kta ;
Tokeca amiyektonja he ;
Tokeca waśihda imdamda he,
Toka śicaya makuwapi kin on.
- 10 Tokamayanpi kin iyopemayanpi, mahuhu kaśuśujapi kin iyececa ;
Anpetu otoyohi, Nita Wakantanka toki un he, emakiyapi kinhan.

- 11 Minagi, tokeca pamahdedan yaun,
Qa tokeca miye mahen iyonicišica he ;
Wakantanka wacinyan wo, ake mdatan kta,
Miite omakiye ça Wakantanka mitawa kin hee.

PSALM 43.

- 1 Wakantanka mayaco qa imakiya wo ;
Oyate wacantkiye šni kin on ;
Wohnayan wicašta qa wahtani sa etanhan emayahdaku kte.
- 2 Wakantanka conkaške mitawa kin he niye ;
Tokeca ehpeyaya he ;
Tokeca wašihda imdamde kta he,
Toka šicaya makuwapi kin on.
- 3 Iyoyanpa nitawa qa wowicake nitawa u kiya wo ;
Hena yus amaye kte ;
Paha wakan nitawa kin en hi makiye kte ;
Qa nakun wokeya nitawa ekta.
- 4 Hehan Wakantanka owayušna tawa ekta wau kte ;
Taku Wakan mitowiyuškin tanka ekta.
Unkan candowankiyapi on icidowan kta,
Wakantanka, Wakantanka mitawa.
- 5 Minagi, tokeca pamahdedan yaun,
Qa tokeca miye mahen iyonicišica he :
Wakantanka wacinyan wo, ake mdatan kta ;
Miite omakiye ça Wakantanka mitawa kin hee.

PSALM 44.

Dowan itancan kin on. Qora cinca wahokonwicakiyapi.

- 1 Wakantanka, noge on naunhonpi,
Atewicunyanpi unkokiyakapi,
Iye taanpetu kin en wicohan ecanon qon,
Wanakaja anpetu kin en.
- 2 Niye ninape on Ikcewicašta hamwicayaya,
Qa iyepi en owicayakiju ;
Oyatepi kin ihangwicayaya,

- Qa iye icahwicayakiya.
- 3 Mazasagye tawapi on makoce kin icupi śni ;
Qa iye isto kin he on eiçihdakupi śni ;
Tuka ninape etapa, qa niisto, qa niite iyoyanpa kin ;
Niye cantowicayahnake cin heon.
 - 4 Wakantanka, Wicaştayatapi mitawa kin he niye ;
Jakob woehdaku kiconza wo.
 - 5 Niye on tokaunyanpi kin paha iyewicunyanpi kta ;
Nicaje on tona itkounkipapi kin nawicunpanpi kta.
 - 6 Mitinazipe wacinwakiye kte śni ;
Qa mazasagye mitawa nimaye kte śni.
 - 7 Tuka niye tokaunyanpi kin etanhan eunyahdakupi ;
Qa tona śiceundapi kin ištenwicayaya.
 - 8 Anpetu osan Wakantanka unkidowanpi ;
Qa nicaje ohinniyan unyatanpi kta. Sela.
 - 9 Hececa ešta, ehpeunyayapi qa wowištece unyakagapi ;
Qa ozuye unkitawapi kin om de kte śni.
 - 10 Toka kin itokapatanhan hdicuunyayapi kta :
Qa tona śiceundapi kin hena wakte hdapi.
 - 11 Tahinca wanunyanpi yutapi kte cin iyececa unyakagapi kta :
Qa Ikcewicašta ehna enanakiya iyeunyayapi.
 - 12 Nitaoyate inyunwin codan wiyopeyakiye kta :
Qa iyopeyapi on takudan yakamna śni.
 - 13 Unkikiyepidan unpi kin en wowištece unyakagapi kta ;
Unkihdukšan unpi kin en wowihahaunyanpi qa poptanptanunkiyapi.
 - 14 Ikcewicašta ekta oweštepi unyakagapi kta ;
Oyatepi en pomnamnaunkiyapi kte.
 - 15 Anpetu osan ištenmayanpi kin mitokam un ;
Qa miite ištece cin he amahdahpa :
 - 16 Tuwe wawiyopeye ça wayaśica ho kin on ;
Toka ite qa waihangye cin on etanhan.
 - 17 Dena owasin unkakipapi, tuka unkaniktonjapi śni ;
Qa wicotakuye nitawa unhnayanpi śni.
 - 18 Uncantepi hekta hdicu śni ;
Qa unkoyepi nitacanku icunonpa ye śni.
 - 19 Unktehi owanka kin en unyakawehwegapi ;
Qa wiconęe on unkayakahpapi.
 - 20 Wakantanka unkitawapi caje unkakiktonjapi,
Qa taku wakan tokeca ekta nape unhdugatapi kinhan ;

- 21 Wakantanka he ode kte śni he ;
Wicacante woinahbe kin hena iye sdonya nakaes.
- 22 Niye on anpetu osan unktepi unyakonpi ;
Tahinca wanunyanpi wicaktepi kte cin iyecen unyawapi.
- 23 Itancan, ihduhica wo, tokeca niśtinma he ;
Kikta wo, hecehin ehpeunyanpi śni po.
- 24 Tokeca niite nayakihbe kta he ;
Iyounkiśicapi qa śicaya unkuwapi kin ayektonje kta he.
- 25 Unnagipi watuśekśeca ekta patuś yanka ;
Untancanpi maka kin ahdaskin wanka.
- 26 Ounyakiyapi kta on inajin wo ;
Qa nitowaonśida on opeunkiton po.

PSALM 45.

Mnahcahca on dowan itancan kin. Qora cinca wahokonwicakiyapi. Wowašte odowan.

- 1 Micante wicoie wašte on ipiga ;
Miohan wicaštayatapi kin owakimdake ;
Wowapi icage wowapi kaga wayupika tawa miceji kin hee.
- 2 Adam cinca ehna niye iyotan owanyag niwašte ;
Niiha en wowašte okaśtanpi ;
Heon Wakantanka ohinniyan niyawašte.
- 3 Iyotan Waśaka, mazasagye nitawa ceca en iyahdaśka wo ;
Nitowitan qa nitoyokipi ahna :
- 4 Qa nitowitan hduha śuktanka akan iyoopta ya wo ;
Wowicake qa woowotanna onśike cin hena on ;
Unkan nape nietapa taku wowinihan onspeniciye kta.
- 5 Wanhinkpe nitawa pepe hinca ;
Nitokam oyatepi hinhpayapi kta ;
Tona Wicaštayatapi tokayapi cantepi kin en.
- 6 Wakantanka, oiyotanke nitawa ohinniyan qa owihanke wanica ;
Nitokiconze sagye kin he woowotanna sagye.
- 7 Woowotanna wašteyadaka, qa woahtani śiceyadaka ;
Heon Wakantanka, nita Wakantanka kin,
Wowiyuśkin wihdi on sdaniciya,
Kodawicayaye cin isanpa.
- 8 Nitawokoyake owasin canśin, qa canhaśa, qa pejihuta waštemna ;

- Huhu tipi wašte kin etanhan wiyuškinnianpi.
- 9 Wicaštayatapi cunwintkupi kin winohinca waštešte nitawa om unpi ;
Wicaštayatapi tawicu kin nietapa ekta najin,
Mazaskazi Ophir etanhan en.
- 10 Cunś, anagoptan qa wanyaka qa on anohkiya wo ;
Qa nitaoyate niyate ti ko akiktonja wo :
- 11 Unkan wicaštayatapi kin nitowašte waštedake kte :
He itancan nitawa, hecen itokam patuja wo.
- 12 Tuos cunwintku taku ituhanpi wan on niite akite kta ;
Oyate kin en wijicapi kin hena.
- 13 Ti mahen wicaštayatapi cunwintku kin ocowasin wowitan ;
Tawokoyake kin mazaskazi kazontapi.
- 14 Śina ipatapi in wicaštayatapi kin en ahipi kta ;
Wikoškapi takodawicaye ihakam unpi kin hena niye en awicahipi kta.
- 15 Wowiyuśkin qa wopida yuha en awicahipi kta ;
Wicaštayatapi ti kin timahen hipi kte.
- 16 Niyatepi eekiya nicinkśipi yuke kta ;
Hena maka kin owancaya wicašta itancan ewicayahde kte.
- 17 Wicoicage qa wicoicage owasin en nicaje kiksuyewicawaye kta :
Heon oyatepi kin niyatanpi kta, owihanke wanica.

PSALM 46.

Qora cinca on ; dowan itancan kin. Wikoška dowanpi.

- 1 Wowinape qa wowaśake unkitawapi kin Wakantanka hee ;
Awicakehan wokakije en waokiye iyeyapi ece.
- 2 Heon etanhan kopeunhdapi kte śni, maka kin yutokecapi,
Qa he kin miniwanca cante en ayapi ešta.
- 3 Mini kin hotanin qa śkanśkan kte ;
Taś tanka on he kin yuhuhuzapi kte. Sela.
- 4 Wakpa wan - adetka kin Wakantanka totonwe kin iyuśkinye kta ;
Tipi wakan kin - Iyotan Wankan un ounye cin he.
- 5 Wakantanka cokaya un, heon pahohopi kte śni ;
Anpao hinanpa hehan Wakantanka okiye kta.
- 6 Ikcewicašta oqoyapi, wicokiconze kin śkanśkanpi ;
Iye ho hdutanin, maka kin skan kta.
- 7 Jehowa Sabaoth unkicipi un ;
Jakob ta Wakantanka wowinape unyanpi. Sela.

- 8 U miye, Jehowa tohan kin wanyaka po ;
Makoce kin en woihangye kaga ece.
- 9 Maka ihanke hehanyan ozuye ayuŕtan kiya ;
Itazipa kin kawege kta, qa wahukeza kakse kta ;
Canpahmihma kin peta on huhnahye kta.
- 10 Ayuŕtan po, qa Wakantanka kin he miye e sdonya po ,
Ikcewicaŕta ehna mayatanpi kte, maka akan mayatankapi kte.
- 11 Jehowa Sabaoth unkicipi un :
Jakob ta Wakantanka wowinape unyanpi. Sela.

PSALM 47.

Dowan itancan kin on. Odowan ; Qora cinca tawapi.

- 1 Oyate owasin, nape hdaskapa miye ;
Wowiyuŕskin ho kin on Wakantanka iyaŕa po.
- 2 Jehowa Tehan Wankan kin he wowinihan ;
Wicaŕtayatapi tanka, maka kin owancaya.
- 3 Unkihukun wicaŕta kin ewicahnake kta ;
Qa oyatepi unsihapi ihukuya.
- 4 Makoce wan unkicicahnigapi kte ;
Jakob waŕtedake ciqon toiyokipi kin hee. Sela.
- 5 Iyaŕapi yuha Wakantanka wankantkiya ikiyopta ;
Jehowa mazayahotonpi ho kin hduha.
- 6 Dowan po, Wakantanka idowan po ;
Dowan po, Wicaŕtayatapi unkitawapi idowan miye.
- 7 Wakantanka maka kin owancaya Wicaŕtayatapi ;
Wowahokonkiye wan on dowan miye.
- 8 Wakantanka Ikcewicaŕta kin wowidagwicaya ;
Wakantanka oiyotanke wakan kin akan kiyotanka.
- 9 Oyatepi en itancanpi kin mniciyapi ;
Abraham ta Wakantanka taoyate kin :
Makoce wahacanka kin hena Wakantanka tawa :
Iye nina tehanwankan un.

PSALM 48.

Qora cinca tawapi. Psalm odowan.

- 1 Jehowa he tanka, qa nina yatanpi kte ;
Taku Wakan unkitawapi totonwe, Paha wakan tawa kin en.
- 2 Oyanke wašte hinca, maka ocowasin wowiyuśkin ;
Zion Paha kin, waziyata opapun ekta ;
Wicaśtayatapi tanka totonwe kin.
- 3 Tipi waštešte tawa kin ohna,
Wakantanka wowinape yapi kta sdoniyapi.
- 4 Iho, maka wicaśtayatapi kin mniciyapi ;
Witaya en hiyayapi :
- 5 Hena wanyakapi, unkan inihanpi ;
Kopehdapi qa najica iyayapi.
- 6 Hen cancan hinhdapi ;
Wayazan hdapi, wihohinca hokśiksuya iyececa.
- 7 Wiyohianpa tanhan tate kin on,
Tarśiś wita wata kin yakajuju kta.
- 8 Naunhonpi qon he iyecen wanunyakapi ;
Jehowa Sabaoth totonwe kin en,
Wakantanka unkitawapi totonwe ohna ;
He Wakantanka ohinniyan hdusuta kte. Sela.
- 9 Wakantanka, tipi wakan nitawa ohna,
Nitocantekiye kin awauncinpi.
- 10 Wakantanka, nicaje iyececa,
Niyatanpi maka ihanke kin hehanyan ;
Ninape etapa woowotanna ojudan.
- 11 Zion Paha kin iyuśkin kte ;
Juda cunwintkupi cante waštepi kte ;
Woyaco nitawa kin on etanhan.
- 12 Zion ihdukśan ya miye, ohomni mani po ;
Canpasotka kin hena yawa po :
- 13 Conkaśke tawa kin ekta cante yekiya po ;
Tipi waštešte kin hena awacin miye ;
Hecen wicoicage u kte cin owicayakidakapi kte.
- 14 Taku Wakan kin de Wakantanka unkitawapi, owihanke wanica :
Wiconte hehanyan yus unkayapi kte.

PSALM 49.

Dowan itancan kin. Odowan Qora cinca tawapi.

- 1 Oyate owasin, de nahon miye ;
Maka akan oonyanpi kin owasin, anagoptan po :
- 2 Adam cinca, nakun wicašta cinca,
Wijicapi wahpanicapi kin om.
- 3 Mii woksape oyake kta ;
Qa micante taku awacin kin he wookahnige.
- 4 Wiyacinpi wan ekta minoge yewaye kta ;
Candowankiyapi on mitadowan mduotanin kta.
- 5 Anpetu śica en tokeca kopewahda kta he ;
Tona amahanpi wahtanipi kin aohdudemayan kinhan.
- 6 Iye towaśakepi kin wacinkiyapi ;
Qa taku ota tonpi kin on ihdatanpi ece :
- 7 Wicašta wan iye sunkaku ecaca opekiton kte śni :
On wiyopeyapi Wakantanka qu kta okihi śni.
- 8 Unkan nagipi opekitonpi kin he tehika ;
Qa owihanke wanica okihipica śni :
- 9 Hecen hinyahin ohinniyan ni un kta ;
Qa wicahwin wanyake kte śni.
- 10 Wicašta ksapa tapi kte cin he wanyake kta ;
Nakun witkotkoka wacintonśni ko atakunipi kte śni ;
Qa taku tonpi kin toktokeca aihpewicakiyapi kte.
- 11 Cante mahen, tipi tawapi owihanke wanice kta, kecinpi ;
Ohna yukanpi kin wicoicage qa wicoicage hehayan ;
Makoce tawapi iye cajepi icajeyatapi ece.
- 12 Tuka wicašta woyuonihan en yanke kte śni ;
Woteca iyecen kagapi ; hena atakunipi śni.
- 13 Hecen ohanyanpi ; hecen witkotkokapi :
Tuka tona ihakam upi kin hena
Token eyapi qon he waśtedakapi kta. Sela.
- 14 Optaye wan iyecen Hades ekta awicayapi ;
Wiconę wonwicaye kta ;
Qa wicašta owotanna, anpao kinhan, wowidagwicayapi kta :
Nakun towaśakepi kin Hades yusote kta ;
Iye tipi kin etanhan tawawicaya.
- 15 Tuka Wakantanka minagi Hades nape etanhan opemakiton kta ;
Iye emahdaku kta, heon.
- 16 Wicašta wan wijica icage cinhan kopehda śni wo ;
Tipi tawa wowitan tanka aye cinhan :
- 17 Tohan ę cinhan takudan hduha ye kte śni ;

- Towitan ihakam kun ye kte śni.
- 18 Tuka ni un icunhan nagi hdawašte kta :
Nakun tanyan nićicuwa kinhan niyatanpi kta.
- 19 Atewicaye wicoicage kin ekta ye kta :
Hena icimana iyoyanpa wanyakapi kte śni.
- 20 Wicašta yuonihanpi, tuka okahnige śni kin
He woteca kin iyacinpi, hena atakunipi kte śni.

PSALM 50.

Asaph tadowan.

- 1 Jehowa Wakantanka Iyotan Waśake cin ia,
Qa maka kin kipan,
Wihinanpa etanhan wi iyaye cin hehanyan.
- 2 Zion woiyokipi iyotan hince cin etanhan
Wakantanka iyega.
- 3 Wakantanka unkitawapi u kta, qa inina un kte śni ;
Itokam peta wahuñnahye kta ;
Qa ihdukśan nina icamna kte.
- 4 Wankan mañpiya kin kipan kta,
Qa nakun maka kin, iye taoyate wicahdaco kta.
- 5 Wicašta cante wicawakiye cin miye en awicau po ;
Tona wośnapi on wicotakuye micagapi kin.
- 6 Unkan mañpiya kin iye toowotanna kin oyake kta ;
Wakantanka wayaco un kin heon. Sela.
- 7 Mitaoyate nahon po, kinhan iwae kta ;
Qa Israel, wahokonciciye kta ;
Wakantanka, Wakantanka nitawa kin he miye.
- 8 Nitawośnapi kin on iyopeciye kte śni ;
Qa peta on waduśnapi kin ohinniyan mitokam un :
- 9 Yati etanhan tatanka wan iwacu kte śni ;
Optaye nitawa etanhan tamdoka kin :
- 10 Contanka en wamanica otoiyo hi mitawa ;
Qa woteca paha kektopawinge akan unpi kin.
- 11 He ekta taku kinyan un kin otoiyo hi sdonwaya ;
Qa makomdaye en woteca owasin miciun.
- 12 Wotektewahda ešta ociciyake kte śni ;
Maka kin he mitawa qa taku ohnaka kin.

- 13 Tatanka conica wate kta he ;
Qa tamdoka we mdatke kta he.
- 14 Wakantanka woyatan wakiyuśna wo ;
Qa Iyotan Wankan un kin taku iwahoyaya hdajuju wo.
- 15 Hehan woiyokiśica anpetu kin en, houmakiya wo ;
Kinhan ecihdaku kta, hecen imayadowan kta ce.
- 16 Tuka Wakantanka wicaśta śica heciya ;
Token on mitoope kin odate kta ;
Qa wicotakuye mitawa tokeca cajedate kta he.
- 17 Wahokonkiyapi kin he śice yadaka ;
Qa mioie kin niheyata ehpeyaya.
- 18 Wamanon sa wan wandaka eca takodayaya ;
Qa wawiciahapi econpi kin owicayapa ece.
- 19 Nii taku śica en owicayaqu ;
Qa niceji wohneye kazonte kta.
- 20 Nisunka akiia idotanke kta ;
Nihun cinhintku kin waayape kta.
- 21 Hena hecen ecanon, tuka inina manke :
Niye yaun kin ocowasin iyemaceca kecanni :
Iyopekiye kta, qa niśta itokam hena ewahde kta.
- 22 De awacin po, Wakantanka ayektonjapi kin ;
Okinni waehdaku wanin ciyaśpaśpapi kta.
- 23 Tuwe woyatan wayuśna kinhan, he mayuonihan kta :
Qa tuwe tacanku hduacetu kin
He Wakantanka towiconi kin wakipazo kta.

PSALM 51.

Dowan itancan kin. Dawid tadowan : Nathan wicaśta wokcan en hi qehan, iye Bathśeba en hi qon iyececa.

- 1 Wakantanka, nitocantekiye on onśimada ye ;
Nitowaonśida ota on wawahtani micicajuju wo.
- 2 Taku śica ecamon kin on ocowasin mayujaja ye ;
Qa wawahtani kin hena makipakinta wo.
- 3 Wawahtani kin hena sdonwakiya ;
Qa taku śica ecamon kin ohinniyan mitokam un.
- 4 Niye niśnana en wacicihtani,
Qa niśta kin en taku śica ecamon ;

- Hecen iyae cin en oniwotanna kte ;
Wadaco kinhan iyaonpepica śni yaun kta.
- 5 Wanyaka ye, taku śica en matonpi ;
Qa woahntani en ina mahduha.
- 6 Wanyaka ye, tanmahen tanhan wowicake yacin ece :
Qa woinahbe ekta woksape sdonye mayaye kte.
- 7 Ceyakata on mayakipakinte kta, unkan ecedan waun kta ;
Mayadujaja kta, kinhan wa isanpa maska kte.
- 8 Wicocante wašte wowiyuśkin ko nahon mayaye kte ;
Hehan huhu yakaśuje cin hena iyuśkin kta.
- 9 Wawahtani etanhan niite nakihman ye ;
Qa taku śica ecamon kin owasin micicajuju wo.
- 10 Wakantanka, cante ska micaga ye ;
Qa miye mahen woniya yuśtanpi miciyuteca wo.
- 11 Niite etanhan ehpemaye śni ye ;
Qa Nitaniya Wakan kin emicihdaku śni wo.
- 12 Wiconi nitawa wowiyuśkin kin he micu ye ;
Qa woniya wašte wan yuhe makiya wo.
- 13 Hehan śicaya econpi kin nitacanku onspewicawakiye kta ;
Qa wahtanipi sa niye ekta ihduhomnipi kta.
- 14 Wakantanka, wicawe etanhan emahdaku wo ;
Wakantanka, Wanikiya mitawa ;
Miceji nitoowotanna iyuśkinyan idowan kte.
- 15 Itancan, miiha miyecidukawa kta ;
Hecen mii woyatan nitawa oyake kte.
- 16 Wośnapi kin yacin kte śni, he waqu kta tuka ;
Peta on wośnapi kin iyonicipi śni.
- 17 Wośnapi Wakantanka tawa woniya kicaksapi kin hena ee ;
Wicacante kicaksapi qa kaśuśujapi kin,
Wakantanka, śiceyadake kte śni.
- 18 Nitoyokipi kin en Zion taku wašte ecakicon wo :
Jerusalem conkaśke kin niye yecage kta.
- 19 Hehan woowotanna wośnapi kin iyonicipi kta ;
Peta on wośnapi qa wośnapi ocowasin huhnahyapi :
Hehan tatanka owayuśna nitawa adipi kte.

PSALM 52.

Dowan itancan kin on. Dawid tawowahokonkiye. Doeg Edomi kin en hi qa Saul wokiyaka

qa heciya ; Dawid Ahimelek ti en hi ce, eye ciqon.

- 1 Wicašta waśaka, tokeca taku śica on nihdatan kta he ;
Iyotan Waśaka towaonśida kin he anpetu osan.
- 2 Niceji wicoħan śica kicanye kta ;
Wohnayan kaga, putinhin icasan yumanpi iyececa.
- 3 Taku śica wašteyadaka, taku wašte isanpa ;
Qa woitonśni, woowotanna oyakapi kin isanpa. Sela.
- 4 Wicoie waihangye cin owasin wašteyadaka,
Wicaceji wicahnayan yaun kin.
- 5 Heon etanhan Wakantanka owihankeśniyan ihangniye kta ;
Yutokan iyeniye kta, qa wakeya etanhan inicu kte ;
Qa wiconi makoce kin etanhan yujun ehpeniye kta. Sela.
- 6 Unkan wicašta owotanna wanyakapi qa kokipapi kta ;
Qa he on ihapi kta :
- 7 Wanyaka po, wicašta kin he
Wakantanka wowaśake yuhe kte śni ;
Tuka iye towijice icage cin wacinkiye kta ;
Qa tohan śice cin on waśagiçiye kte.
- 8 Tuka miye Oliwe can teca wan iyemaceca,
Wakantanka ti kin ohna ;
Wakantanka tocantekiye wacinwaya,
Owihanke wanica hehayan.
- 9 Niye hecanon kin heon ohinniyan ciyatan kta ;
Qa nicaje wacinwakiye kta ;
He wicašta wacantkiya nitawa itokam wašte kin heon.

PSALM 53.

Dowan itancan kin on. Wowayazan on Dawid tawowahokonkiye.

- 1 Taku Wakan wanica ce, witkotkoke cin cante mahen eya :
Ihduśicapi qa wicoħan śica wahte śni econpi ;
Tuwedan taku wašte econ śni.
- 2 Wakantanka mahpiya eciyatanhan Adam cinca kin ahiwiconwan ;
Tuwe wacinksamya ohanyan hecinhan,
Tuwe Wakantanka akita hecinhan, he wanyake kta.
- 3 Iyuhpa nunipi, witaya hwinpi ;
Tuwedan taku wašte econ śni ; han, wanjidan śni.

- 4 Woahtani econpi kin hena takudan sdoniyapi šni he ;
Aguyapi iyecen mitaoyate wicayutapi ;
Qa Wakantanka hoyekiyapi šni.
- 5 Wokokipe wanica ešta hen nina wikopapi ;
Tuwe en ahiniwanka huhu kin Wakantanka enanakiya ehpeya ;
Íštenwicayaya, Wakantanka wahtewicada šni nakaes.
- 6 Tokin Israel woehdaku tawa kin Zion etanhan u nunwe :
Tohan Wakantanka taoyate wayaka unpi kin en wicahdi kinhan,
Jakob iyuškin kta, Israel pidapi kte.

PSALM 54.

Candowankiyapi on dowan itancan kin. Dawid tawowahokonkiye. Ziph oyate upi qa Saul heciyapi ; Dawid unkcipi inahbe šni he, eyapi qon he ehan.

- 1 Wakantanka, nicaje on nimayan wo :
Qa nitowašake on woyaco ecamiyecon kte.
- 2 Wakantanka, wocekiye mitawa nahon ye ;
Mii oie kin hena anohkiya wo,
- 3 Wicašta tokeca en ahimanajinpi heon ;
Qa tehiya wakuwapi kin minagi akitapi :
Iye itokam Wakantanka ehdepi šni. Sela.
- 4 Wanyaka wo, Wakantanka omakiya ece :
Itancan kin tona minagi wašagyapi kin hena om un.
- 5 Wošice kin tokamayanpi en awicahdi kte :
Nitowicake en hena ihangwicaya wo.
- 6 Taku ituhanpi on waciciyušna kte ;
Jehowa, nicaje wašte heon mdatan kta.
- 7 Wokakije owasin etanhan emahdaku ;
Qa miišta tokamayanpi kin opawicahta, heon.

PSALM 55.

Dawid tawa. Candowankiyapi on dowan itancan kin. Wowahokonkiye odowan.

- 1 Wakantanka, mitawocekiye anohkiya wo ;
Qa hoyewaye cin on naiçihbe šni ye.
- 2 Namahton qa amayupta wo ;

- Awacin waun qa howamde kta :
- 3 Toka ho kin on, wicašta śica śicaya kuwapi kin on ;
Hena woahntani aomakawinhyapi kta ;
Qa śinhdapi en tokamayanpi kte.
 - 4 Mitan mahen micante śkanśkan ;
Qa wiconṭe ikopapi kin amahinhpaya.
 - 5 Kopehdapi qa cancanpi kin mahiyohi ;
Qa wonihinciye amakaḥpa.
 - 6 Unkan hepe ; Tuwe wakiyedān iyecen hupahu wan maqu kta he :
Kinyan imdamde ḥa ozimiḥiye kta.
 - 7 Ho, tehan wanuni kte ;
Hewoskan owati kta. Sela.
 - 8 Wowinape onawakipa inawahni kta ;
Tateyanpa hinca etanhan, icamna kin etanhan.
 - 9 Itancan, nawicapca wo, cejipi wicakiyuśkiśka wo :
Otonwe kin en wicokicize qa wicokicige wanmdaka heon.
 - 10 Anpetu hanyetu ko otonwe conkaśke akan ohomni yapi kte ;
Qa wicośice wicoiyokiśice ko mahen un.
 - 11 Woahntani cokaya un,
Qa śicaya wicakuwapi wohṇayan ko tahocoka kin ayuśtan kte śni.
 - 12 Toka wan iyopemaye kte cin hee śni ;
Kinhan inina manke kta tuka :
Tuwe miye on wahaniḥida śicemadake cin hee śni ;
He heca unkanś etanhan namiḥihbe kta tuka.
 - 13 Tuka he niye, wicašta kici iakinimaskokeca ;
Mitakoda qa wacinwaye ciqon hee.
 - 14 Unkiye okonwanjidan wicotawacin skuya unkiḥicaga :
Wicota om Wakantanka ti kin en unye ciqon.
 - 15 Woihangye awicakipa nunwe ;
Niyake Hades ekta kun yapi kte :
Tipi tawapi ohna wicoḥan śica yukan,
Iye cantepi kin en.
 - 16 Miye qe Wakantanka hoyewakiye kta ;
Unkan Jehowa nimaye kte.
 - 17 Hṭayetū qa hanhanna qa wioytanhan, cewakiye ḥa hoyewaye kta :
Unkan iye miho kin nahon kte.
 - 18 Makizapi etanhan, wookiye en, nagi opemakiton ;
Wicota om ecamon kin heon etanhan.

- 19 Iyotan Waśake cin he nawicahon qa awicayupte kte ;
 Qa tuwe wanakajatanhan ounye cin he. Sela.
 Tona wicayutokanpi wanin unpi,
 Qa Wakantanka kokipapi śni kin hena.
- 20 Tona om wookiye en un qon hena nape awicahnaka ;
 Wicotakuye tawa kin he hdaksa.
- 21 Pteasanpi ihdi iyecen i kin śduśduta ;
 Tuka cante kin he okicize :
 Wihdi isanpa iye oie kin śduśduta ;
 Tuka hena mazasagye ecedan.
- 22 Taku niçu kin he Jehowa aihpeya wo ;
 Unkan iye awanniyake kta :
 Wicaśta owotanna wicapahohopi kta tohinni iyowinye kte śni.
- 23 Tuka niye, Wakantanka, wicotakuniśni woħa en kun iyaye wicayaye
 kta :
 Wicawe wicaśta qa wicahnaye sa kin
 Hena anpetu tawapi cokaya iyohipi kte śni.
 Hececa tuka miye qe wacinciye kte.

PSALM 56.

Wicaśta tokeca om wakiyedana inina un kin on, dowa itancan kin kicagapi. Dawid
 tawoinaħbe. Gath ekta Philistine yuzapi qon he ehan.

- 1 Wakantanka, onśimakida ye, wicaśta i amahdukawa ;
 Anpetu osan watemya kin he kuwa amau ece.
- 2 Anpetu osan tona iwanmayakapi kin hena i amahdukawapi ;
 Waħanħaniçidapi ota temmakiyapi kta tuka.
- 3 Anpetu kin en kopewahda kinhan,
 Hehan wacinciye kta.
- 4 Wakantanka en iye oie kin mdatan kte ;
 Wakantanka wacinwaya, kopewahda kte śni ;
 Wicaceħpi taku ecamicon kta okihi he.
- 5 Anpetu otoiyoħi mioie yapemnipi ;
 Amawacinpi kin owasin śica.
- 6 Witaya mniciyapi, waiyape yukanpi kta ;
 Mioye kin hena awanyakapi kta ;
 Minagi iyapepi kin iyececa.
- 7 Woħtani on ihduśkapi kta he ;

- Wakantanka, wocanniye en oyatepi kun ehpewicaya wo.
- 8 Wanuni kin hena dawa ece :
 Ístamnihanpe mitawa ojuha nitawa en ohnaka wo :
 Hena nitawowapi en un śni he.
- 9 Anpetu en hoyewaye cinhan,
 Hehan tokamayanpi kin namnipi kta :
 He sdonwaya ; Wakantanka miciun kin he.
- 10 Wakantanka en oie kin mdatan kta ;
 Jehowa en iye oie kin iwadowan kta.
- 11 Wakantanka wacinwaya ; kopewahda kte śni ;
 Wicaśta taku ecamicon kta okihi he.
- 12 Wakantanka, taku iwahociye cin hena mduha ;
 Woyatan wośnapi kin ciçu kte.
- 13 Wiconṭe etanhan minagi edaku ;
 Misiha hinhpaye kte śni :
 Wakantanka itokam mawani kta ;
 Wiconi iyoyanpa kin en.

PSALM 57.

Dowan itancan kin kicagapi. Waihangye śni wo. Dawid tawoinahbe. Makoħdoka en Saul
 ite kin etanhan najice ciqon he ehan.

- 1 Onśimakida wo, Wakantanka onśimakida wo ;
 Minagi wacinniyan, heon etanhan ;
 Han, nihupahu ohanzi kin en wowinape awakite kta ;
 Wośice kin iyoopte kte cin hehanyan.
- 2 Wakantanka Iyotan Wankan hoyewakiye kta ;
 Iyotan Waśaka tanyan miciyuśtan kin hee.
- 3 Maħpiya eciyatanhan u wicaśi qa emahdaku kta ;
 Tuwe amapogan kin he iyopeye kta. Sela.
 Wakantanka iye towaonśida towicake ko hiyuye kta.
- 4 Minagi mnaja wicehna un ;
 Ideya unpi kin hena ehna imunke kta ;
 Wicaśta cincapi hi kin wahukeza qa wanhinkpe ;
 Qa cejipi kin mazasagye pe hinca.
- 5 Wakantanka, maħpiya kin iwankam niyatanpi nunwe ;
 Nitowitan maka kin ocowasin iwankam.
- 6 Wohmunke wan misiha on wiyeya ehnakapi ;

- Minagi kin patuś ya ;
Mitokam woha wan qapi ;
He en iye ohinhpayapi. Sela.
- 7 Micante wiyeya, Wakantanka, micante wiyeya un ;
Wadowan kta qa mdatan kta.
- 8 Mitowitan, kikta wo, cotanke candowankiyapi ko kikta miye :
Miye qe anpao kin mduhice kta.
- 9 Itancan, oyate kin ehna ciyatan kte ;
Oyatepi wicehna icidowan kta.
- 10 Nitocantekiye tanka kin mahpiya iyapaŕo ;
Qa nitowicake kin mahpiya śapa iyahde.
- 11 Wakantanka, mahpiya kin iwankam niyatanpi nunwe ;
Nitowitan maka kin ocowasin iwankam.

PSALM 58.

Waihangye śni wo. Dawid tawoinahbe.

- 1 Wicaśta cincapi, awicakehan ia oyakitpanipi he ;
Hecen taku owotanna odakapi kte śni,
Taku ecetu kin dukcanpi kte śni.
- 2 Han, cante mahen taku śica ecanonpi kta ;
Makoce kin en ninapepi wicowicaśtaśni kin tkeuyatapi kte.
- 3 Wicaśta śicapi wicatamni etanhan nunipi ;
Itonpiśni, tonpi ehantanhan śicaya econpi.
- 4 Wamduśka tage śica he iyecen tage śica wicakiyukan ;
Sintehda noge kpe cin he iyecen noge ohmus hduza :
- 5 He wajijipi ho nahon kte śni ;
Wayupiya wajijipi econ eśta.
- 6 Wakantanka, hena ipi ohna hi wicakicaksa wo ;
Jehowa, mnaja kośka hi kin kaśuśuja wo.
- 7 Mini ohinniyan kaduze cin iyecen skan ayapi nunwe ;
Tunwanhinkpe nakiwinje kte, kawegapi iyececa.
- 8 Tusda skan aye cin iyecen tanin kte śni :
Winohinca hinyahinke śni cinca ton kin iyecen,
Anpetu wi kin wanyakapi śni.
- 9 Cega nitawapi wapepeka sdonye śni,
Saka qa iś śpan, ecen kahin iyeye kta.

- 10 Tokiçonpi kin he wicašta owotanna wanyake cinhan iyuşkin kte :
Wicašta şica we kin en siha hdujaja kte.
- 11 Hecen wicašta wan heye kta ;
Han, wicašta owotanna waskuyeca ton ;
Han, Taku Wakan maka akan wayaco yanka ce.

PSALM 59.

Dowan itancan kin kicagapi. Waihangye şni wo. Dawid tawoinahbe. Saul yewicaşı qehan,
qa Dawid ti kin awanyaka, kte kta e heon.

- 1 Wakantanka mitawa, tokamayanpi kin etanhan makiyuşka wo ;
Tona takpe maupi kin on wankan emayahde kta.
- 2 Tona woahntani econpi kin etanhan makiyuşpa wo ;
Qa we wicašta kin etanhan nimayan ye.
- 3 Wan, minagi iyape yukanpi ;
Waşakapi kin miye on mniciyapi ;
Jehowa, wawahtani şni qa taku şica ecamon şni ye.
- 4 Miohan şice şni ešta anamatanpi qa eiçihdepi :
Kikta wo, itkomayakipa qa wandake kte.
- 5 Heon niye, Jehowa, Wakantanka Sabaoth,
Israel ta Wakantanka, kikta wo,
Oyatepi owasin wanwicadake kte ;
Wicašta şica wahnayanpi kin owasin wicakpatan şni wo.
- 6 Htayetu kinhan hdicupi kte ; şunka iyecen hdopi kte ;
Qa otonwe ohomni inyankapi kte.
- 7 Inyun, ipi kin etanhan hiyuyapi ;
Ihapi kin en mazasagye yukan ;
Qa tuwe nahon kta he, eyapi.
- 8 Tuka Jehowa, niye iwicayahaha kta ;
Ikcewicašta owasin wowihaha wicayaye kte.
- 9 Towaşake kin on acipe waun kta ;
Conkaşke mitawa Wakantanka hee.
- 10 Mita Wakantanka iye towaonşida on iikomakipe kta ;
Tokamayanpi kin Wakantanka opawicahta makiye kta.
- 11 Itancan, wahacanka unkitawapi,
Hena wicakte şni wo, okinni mitaoyate akiktonjapi kte :
Nitowaşake on onuniwicaye ça kun ehpewicaya wo.
- 12 Ihapi oie kin hena ipi woahntani kin hee :

- Hecen wahanicidapi kin on wicayuzapi kte ;
 Woitonśni qa iapi śica eyapi kte cin hena on.
- 13 Waihangya wo, wocanniye on wicayusota wo ;
 Qa en unpi kte śni ;
 Hecen Jakob en Wakantanka wicaśtayatapi yanka e sdonyapi kte ;
 Maka ihanke kin hehanyan. Sela.
- 14 Unkan htayetu kinhan hdicupi kta ;
 Śunka iyecen hdopi kte ;
 Qa otonwe kin ohomni inyankapi kte.
- 15 Taku yutapi imani unpi kta ;
 Imnanpi śni eśta hanyetu osan wankapi kta.
- 16 Tuka miye nitowaśake iwadowan kta ;
 Qa hanhanna nitowaonśida mdatan kta ;
 Conkaśke mitawa kin he niye ;
 Qa iyomakiśica anpetu kin en wowinape mitawa.
- 17 Wowaśake mitawa, niye icidowan kta :
 Wakantanka conkaśke mitawa kin hee,
 Woweonśida Wakantanka mitawa.

PSALM 60.

Dowan itancan kin kicagapi. Woyaotanin Mnaħcaħca kin on. Dawid tawoinaħbe.
 Waonspekiyapi kta. Aram wakpa nonpa otahedan, qa Aram Zoba ohiwicaya qon, hehan
 Joab hdicu qa Miniskuya kaksiza en, Edom etanhan kektopawinge akenonpa wicakte.

- 1 Wakantanka, ehpeunyayapi, unyakawehwegapi ;
 Canniniyan ; tuka ake onyakiyapi kta.
- 2 Maka kin duśkanśkan qa naptuśyaya,
 Naptuptujapi kin yuecetu wo, cancan nakaes.
- 3 Nitaoyate taku tehika wanyagwicayakiya ;
 Miniśa on cekcegyapi kin yatke unyakiyapi.
- 4 Tona konicipapi kin wiyokihedan wan wicayaqu,
 Wowicake on yuwankan iyeyapi kta. Sela.
- 5 Tona cantewicayakiye cin wicayukcapi kta ;
 Heon ninape etapa on niunkiyapi qa naunhon po.
- 6 Wakantanka iye towakan kin en ia ;
 Wakte wahdi kta ;
 Śekem wapamni kta ;
 Qa Sukoth kaksiza kin imdute kta.

- 7 Gilead he mitawa, qa Manassa he mitawa ;
Ephraim nakun mapa wowaśake kin ;
Juda woope kaga mitawa kin hee.
- 8 Moab cega oyujaja mitawa kin hee ;
Edom en mitahanpe ehpewaye kta ;
Philistia, miye on iyaśa wo.
- 9 Tuwe otonwe aconkaśkapi kin en amaye kta ;
Tuwe Edom ekta amai he.
- 10 Wakantanka, ehpeunyayapi qon he niye kte śni he ;
Qa Wakantanka, ozuye unkitawapi om de kte śni qon.
- 11 Toka kin on etanhan ounkiya miye :
Qa wicaśta akantu waehdakupi kin he taku śni.
- 12 Wakantanka en wowaśake unkićicagapi kte :
Unkan iye tona tokaunyanpi kin nawicapan kte.

PSALM 61.

Dowan itancan kin kicagapi. Candowankiyapi Dawid tawa on.

- 1 Wakantanka, houwaye cin nahon ye ;
Wocekiye mitawa awacin un wo.
- 2 Micante iyokiśica en, maka ihanke kin etanhan houcíciye kta :
Imnija wan miwankam tehanwankantu kin he en amayai kte.
- 3 Wowinape mitawa qon he niye ;
Toka kin itokam, conkaśke suta hinca.
- 4 Ohinniyan nitawakeya ohna wati kta ;
Nihupahu ohanzi kin en inawape kta.
- 5 Wakantanka, niye taku iwahowaye cin he nayahon :
Tona nicaje kokipapi taku tawa kte cin he mayaqu.
- 6 Wicaśtayatapi taanpetu kin en anpetu yecage kta ;
Waniyetu tawa kin wicoicage qa wicoicage iyececa.
- 7 Ohinniyan Wakantanka itokam iyotanke kte ;
Wowaonśida wowicake ko yuhe yakiye kte ;
Hena patanpi kta.
- 8 Heon ohinniyan nicaje iwadowan kta :
Anpetu eca taku iwahowaye cin wakajuju ece kta.

PSALM 62.

Jeduthun eciyatanhan dowan itancan. Dawid tadowan.

- 1 Wakantanka ecedan en minagi inina yanka ;
Iye eciyatanhan nimayanpi.
- 2 Iye isnana imnija mitawa qa Wanikiya mitawa ;
Conkaške suta mitawa kin hee ;
Nina mapahohopi kte sni.
- 3 Tohanyan wicašta wan inihanyayapi kta he ;
Niyepi owasin nicamdecapi kte ;
Conkaške takinyan yanka,
Mahinatake yujujupi kin iyececa.
- 4 Wankan yanke cin etanhan isnana kun ehpeye wacinpi ;
Woitonśni waštedakapi ;
Ipi kin on wayawaštepi kta,
Qa tanmahentanhan wayašicapi kta. Sela.
- 5 Wakantanka ecedan en, minagi, inina un wo ;
Wowacinye mitawa kin he iye eciyatanhan.
- 6 Iye isnana imnija mitawa qa Wanikiya mitawa ;
Conkaške mitawa kin hee ;
Mapahohopi kte sni.
- 7 Wiconi mitawa qa wowitan mitawa kin
Wakantanka eciyatanhan ;
Imnija suta mitawa qa wowacinye mitawa
Wakantanka en un.
- 8 Oyate kin, anpetu otoiyohi he wacinyan po ;
Itokam nicantepi tpapson po :
Wowacinye unkitawapi kin Wakantanka hee. Sela.
- 9 Adam cinca kin takuśni ecedan,
Wicašta cincapi kin hena woitonśni ;
On tkeutapi kin en wankan yapi ece ;
Hena witaya takupiśni.
- 10 Wowidagyapi kin wacinyanpi sni po ;
Qa wawicakipi on wahanicidapi sni po ;
Wowijice icage cinhan cantohnakapi sni po.
- 11 Wakantanka wancadan ia ;
Nonpakiya de nawahon ;
Wowašake he Wakantanka tawa :
- 12 Nakun Itancan, wocantekiye kin he nitawa ;

Tuka otoiyohi iye ohan kin eciyatanhan,
Wicayaqu ece kta.

PSALM 63.

Dawid tadowan - Juda hewoskan en un qehan.

- 1 Wakantanka, Taku Wakan mitawa kin he niye ;
Hanhanna hinca ocide kta ;
Niye on minagi ipuza , micehpi cantonikpani ;
Makoce puza en, qa mini codan en mdokita.
- 2 Tipi wakan kin ohna wanciyaka qon iyecen,
Nitowaśake qa nitowitan kin wanmdake kta.
- 3 Nitocantekiye kin wiconi isanpa wašte ;
Heon miiha niyatanpi kta.
- 4 Hecen wani kin en icidowan kta ;
Nicaje on nape wahdugate kte.
- 5 Tacupe qa wasna on iyecen minagi imna kte ;
Qa iha wiyuśkin on mii niyatan kta.
- 6 Mitowinja akan ciksuye cinhan,
Hanyetu osan niye awacicin kta.
- 7 Omakiye cin he niye ;
Unkan nihupahu ohanzi kin en imduśkin kta.
- 8 Minagi kiyedan onicihan un ;
Ninape etapa sutaya mayuza.
- 9 Tuka tona minagi ihangya akitapi kin
Hena kun yapi kta, maka cokaya ekta.
- 10 Mazasagye nape kin en ehpewicayapi kte ;
Hena śungidan taku tawa unpi kta.
- 11 Tuka wicaśtayatapi kin Wakantanka en iyuśkin kta ;
Tona he cajeyatapi owasin ihdatanpi kta ;
Tona itonpiśni kin hena iohmus icupi kta.

PSALM 64.

Dowan itancan kin kicagapi. Dawid tadowan.

- 1 Wakantanka, wocekiye mitawa en miho nahon wo ;

- Toka kokipapi kin etanhan wiconi mitawa yapatan kte.
- 2 Wicašta śica takodakiciyapi etanhan namayahbe kta ;
Śicaya econpi oqoyapi kin etanhan.
- 3 Hena, mazasagye iyecen, ceji hdumanpi ;
Wanhinkpe iyecen, oie pa kin ekatapi ;
- 4 Wicašta ecetu kin nahmana kutepi kte ;
Ihnuhanna kutepi kta, qa kokipapi kte śni.
- 5 Wicoie śice cin en waśagiçiyapi kta ;
Nahmana on hmunkapi eonpapi kin he ohdakapi kta ;
Tuwe wanwicayake kta he, eyapi.
- 6 Wicohan śica nina akitapi ;
Wiyeya unkanpi ; tanyan yuŝtanpi ce :
Unkan mahen wicašta tawacin qa cante kin temahentu.
- 7 Tuka Wakantanka ihnuhanna wanhinkpe on wicakute ;
Hen taopi wicayukan.
- 8 Hecen naŝna wicakiyapi ; iye cejipi kin en wicahdi ;
Tona opawicahtapi kin owasin najicapi kta.
- 9 Heon wicašta owasin nihinciyapi kta ;
Qa Wakantanka ohan kin he oyakapi kte ;
Qa taku econ kin awacinpi kta.
- 10 Wicašta owotanna Jehowa en iyuŝkin kta,
Qa he wacinye kta ;
Qa tona cante ecetupi kin owasin witanpi kta.

PSALM 65.

Dowan itancan kin kicagapi. Psalm odowan. Dawid tawa.

- 1 Wakantanka, Zion en ainina yatanpi kin he nitawa ;
Qa taku iwahoyapi kin niçupi kte.
- 2 Wocekiye nayahon ece kin,
Niye ekta wicacehpi owasin u kte.
- 3 Woahtani wicoie kin iyakapemayanpi ;
Taku śica econkupi kin hena niye yakajuju kta.
- 4 Tuwe yakahnige çã kiyedan ayau kin he cante wašte ;
Tihocoka nitawa kin en ounye kta ;
Yati wowašte on iunmnanpi kte ;
Tipi wakan nitawa kin he.

- 5 Woowotanna en taku wowitonpe on unkayaduptapi kta,
Wakantanka Wanikiya unkitawapi ;
Niye maka ihanke kin owasin wacinniyampi ;
Qa tona miniwanca ekta tehan unpi kin.
- 6 Towaśake on he kin sutaya ehde ;
Wookihi ipiyagkiton kin heon.
- 7 Miniwanca sa kin yuinina ;
Taja sa qa oyate owodutaton kin.
- 8 Nakun tona ihanke ekta tipi kin
Hena wowapetokeca nitawa kin kokipapi ;
Wiinanpe qa wiiyaya oenape kin hena dowanyakiye kta.
- 9 Maka kin en yahi qa aminitanyaya :
Wašte hinca yakage kta ;
Wakantanka tawakpa kin mini ojudan :
Aguyapi icahwicayeciciye kta ;
Wiyeya yakaga nakaes.
- 10 Maka yumdupi kin duspaya ;
Cankuyetonton kin boyamdaya ;
Magaju on panpanna yakaga ;
Taku aicaga ece kin he dawašte kta.
- 11 Nitowašte omaka kin wateśdag yecatón ;
Qa nitacanku wasna śbuya.
- 12 Tinta makoskantu kin śbuya ;
Qa pajodan kin wowiyuśkin ipiyagkiton.
- 13 Tahin optaye kin cincota ogekiton ;
Qa omdaye kin aguyapi aihdahpa :
Wowiyuśkin on iyaśapi kta ;
Han, dowanpi kta.

PSALM 66.

Dowan itancan kin kicagapi. Woyatan odowan.

- 1 Maka kin ocowasin,
Wakantanka on iyaśa po.
- 2 Iye caje wowitan kin idowan miye ;
Iye yatanpi wowitan kin qu po.
- 3 Wakantanka heciya po ;
Niohan wowinihan hinca ce ;

- Nitowaśake tanka on tokaniyanpi kin
Niye en itonpi kte śni :
- 4 Maka kin ocowasin ohonidapi kta,
Qa inidowanpi kta ;
Nicaje kin idowanpi kte. Sela.
 - 5 U miye, Wakantanka ohan kin wanyaka po ;
Wicaśta cinca kin en wowinihanyan ohanyan.
 - 6 Miniwanca kin he puza kaga ;
Wakpa kin opta huinyun yapi kta :
Hen iye on unkiyuśkinpi kte.
 - 7 Towaśake on ohinniyan iye wicaśtayatapi ;
Iye iśta Ikcewicaśta kin iwanwicayaka :
Wahanhaniçidapi kin wankan yeiçiyapi kte śni. Sela.
 - 8 Oyatepi, Wakantanka unkitawapi yawašte po ;
Iye yatanpi ho kin nahon wicakiya miye.
 - 9 Unnagipi wiconi en ehnaka ;
Qa unsihapi hicahe kta iyowinkiye śni.
 - 10 Wakantanka, niye iyutanunyayapi ;
Mazaska śdoyapi iyecen unyaduecepidan.
 - 11 On hmunkapi kin en unkayaupi ;
Pakśin unkitawapi en wokakije eyahnaka.
 - 12 Pa unkitawapi akan wicaśta yanke wicayakiya ;
Peta qa mini ehna unhiyupi :
Hehan taku utkanna en inanpe unyakiyapi.
 - 13 Peta wośnapi kin yuha yati en hibu kte ;
Taku iwahociye cin hena cicicajuju kta.
 - 14 Miiha hdaotanin qon hena ;
Qa makakija en mii taku eye ciqon.
 - 15 Tahinca cepa peta wośnapi waciciyuśna kta,
Tamdoka wasna kin iyahna :
Tatanka tatokadan kici wamduśna kta. Sela.
 - 16 U miye, tona Wakantanka koyakipapi kin, nahon po ;
Unkan taku minagi ecakicon kin he ociciyakapi kte.
 - 17 Mii on hoyewakiya ;
Qa woyatan miceji ihukuya un.
 - 18 Micante en woahtani awacanmi kinhan,
Itancan kin nahon kte śni.
 - 19 Tuka awicakehan Wakantanka nahon ;
Wocekiye mitawa ho kin he anagoptan.

- 20 Wakantanka yawaštepi nunwe,
Wocekiye mitawa yutokan iyeye śni,
Qa iye tocantekiye kin emicihdaku śni.

PSALM 67.

Candowankiyapi on dowan itancan kin. Woyatan odowan.

- 1 Wakantanka onśiunkidapi qa unyawaštepi kte ;
Qa iye ite on iyounyanpapi nunwe. Sela.
- 2 Hecen maka akan nitacanku sdonyapi kte ;
Wiconi nitawa, oyatepi owasin ehna.
- 3 Wakantanka, oyatepi kin wopida eniciyapi kta ;
Oyatepi owasin wopida eniciyapi kte.
- 4 Oyatepi wiyuśkinpi qa iyaśapi kta ;
Oyate kin owotanna wicadaco kta heon ;
Qa maka akan oyatepi yus awicade kta. Sela.
- 5 Wakantanka, oyatepi kin wopida eniciyapi kte ;
Oyatepi iyuhpa wopida eniciyapi kta.
- 6 Maka kin waskuyeca aicage :
Wakantanka, Wakantanka unkitawapi unyawaštepi kte :
- 7 Wakantanka unyuwaštepi kta ;
Qa maka ihanke owasin iye kokipapi kte.

PSALM 68.

Dowan itancan kin kicagapi. Woyatan odowan. Dawid tawa.

- 1 Wakantanka inajin kta ;
Tokayapi kin hena enanakiya yapi kta ;
Qa tona śicedapi iye itokapatanhan najicapi kta.
- 2 Śota kahboka he iyecen wicayakahape kta ;
Peta en cansin śdo kin he iyecen,
Wicašta śica Wakantanka itokam taninpi kte śni.
- 3 Unkan wicašta owotanna pidapi kta ;
Wakantanka itokam iyaśapi kte ;
Qa wowiyuśkin on iyuśkinpi kte.
- 4 Wakantanka idowan po, iye caje kin yatan miye ;
Tuwe hewoskan śunka wakan akan ye cin he canku kicaga po ;

- He Jah eciyapi, heon itokam wiyuśkin po.
- 5 Wamdenica ateyapi, qa wiwazica wayaco tawapi,
Wakantanka hee, wowakan oyanke tawa ohna.
- 6 Tona tanśnana unpi kin hena Wakantanka tipi en owicahnaka ;
Tona kaśka yakonpi kin hena wowašte en hiyu wicakiya ece :
Tuka toka kin hena makoce puza en ounyanpi kta.
- 7 Wakantanka, nitaoyate wicitokam idade ciqon ;
Hewoskan makoce kin ehna mayani qehan ; Sela.
- 8 Maka kin śkanśkan ;
Han, maħpiya kin śbuyapi, Wakantanka itokam ;
Sina kin de, Wakantanka itokam,
Israel ta Wakantanka kin.
- 9 Wakantanka, taku ituħanpi kin magajuyaya :
Nitaoyate qa mdokiħa kin he niye duwaśaka.
- 10 Optaye nitawa kin hen ounyanpi ;
Wakantanka, nitowašte on wicašta onśika taku wicayecamna kta.
- 11 Itancan kin wicoie kin wicaqu kta :
Tona eyanpahapi kin wicota ħinca.
- 12 Ozuye wicaštayatapi kin najicapi kta, najicapi kta ;
Unkan winoħinca mdogyanke cin he taku icupi kin pamni kta.
- 13 Tohan makoce opapun kin en inunkapi kinhan,
Wakiyedana ħupahu mazaska apawintapi kin iyenicecapi kta ;
Qa śun kin mazaskazi on wiyatpatpa.
- 14 Hen Iyotan Waśake cin wicaštayatapi najice wicaye ħehan,
Zalmon en wapa iyececa.
- 15 Baśan paha kin he Wakantanka paha tawa ;
Baśan paha kin he imnija ħe kin heca.
- 16 Paha imnija kin, tokeca aikśinya eyatonwanpi ħe ;
Paha ohna Wakantanka ti kta hdaħnige cin hee ;
Han, Jehowa ohinniyan en ounye kta.
- 17 Wakantanka canpahmihma tawa kin
Hena woyawa tanka nonpa, kektopawinge yuotapi ;
Itancan kin he en owicapa ;
Tawokeya wakan kin Sina en un.
- 18 Wankan wapa yakiyahda ;
Wayaka awicahdapi kin hena ayahdi ;
Wicašta kin ehna taku wicaqupi kin iyacu ;
Han, tokapi kin ehna ;
Jehowa Wakantanka en ounye kte.

- 19 Anpetu qa anpetu Itancan kin yawaštepi nunwe :
Waqinunkiyapi, tuka Iyotan Waśake cin niunkiyapi kin hee. Sela.
- 20 Taku Wakan kin de wiconi Wakantanka unkitawapi kin hee ;
Qa wiconę oenape kin hena Jehowa Itancan tawa.
- 21 Han, Wakantanka tona tokayapi pa wicakahdehdece kta ;
Tuwe woahani en mani un paha kin.
- 22 Itancan kin heya ;
Baśan etanhan awicawaku kte ;
Miniwanca ośbe kin etanhan awicawahdi kta :
- 23 Hecen nisiha toka we kin en śayapi kta ;
Nitaśunke ceji kin he nakun.
- 24 Wakantanka, iniyopte cin he wanyakapi ;
Mita Wakantanka iyoopte cin ;
Wicaśtayatapi mitawa, owanka wakan kin ohna.
- 25 Tona dowanpi kin hena tokaheya yapi ;
Hektam candowankiyapi kin ;
Wicihdukśan wikośka cancega kabupi.
- 26 Omniciye kin en Wakantanka yawašte po ;
Itancan kin, Israel minihdoka kin etanhan.
- 27 Benjamin cistinna kin hen un, ohiwicaya ;
Juda itancanpi kin, inyan on wakininpi ;
Zebulon itancanpi ; Naphtali itancanpi kin.
- 28 Nita Wakantanka nitowaśake kiconza ;
Wakantanka, taku unkoyecihanyanpi kin he yuwaśaka wo.
- 29 Jerusalem en tipi wakan nitawa kin on,
Wicaśtayatapi kin taku nicahipi kta.
- 30 Woteca psa ehna unpi kin hena niye iyopewicaya wo ;
Wicota waśakapi kin, oyate ptejicadan om ;
Mazaska onśpaśpa yuha ahi patujapi kin ;
Oyate okicize waśtedapi kin wicayumdeca wo.
- 31 Egupta etanhan wicaśta cepa upi kta ;
Kuś Wakantanka ekta nape hdugate kta.
- 32 Maka wokiconze kin, Wakantanka yatan po ;
Itancan kin idowan miye : Sela.
- 33 Tuwe mahpiya kin akan iyotanka,
Mahpiya wanakaja kin ;
Inyun, ho hdaotanin, wowaśake ho kin.
- 34 Wakantanka yawaśaka miye ;
Iye towitan Israel akan un,

Qa towaśake kin mahpiya kin ekta.
35 Wakantanka, oyanke wakan nitawa etanhan wowinihan yaun ;
Israel ta Wakantanka ;
Wowaśake qa wookihi kin oyate wicaqu ece.
Wakantanka yawaśtepi nunwe.

PSALM 69.

Mnahcahca kin on dowan itancan kin. Dawid tawa.

1 Wankantanka, nimayan wo ;
Mini kin minagi ee kaeś hiyohi, heon.
2 Upśija temahentu mahen imdamde,
Tukten najinpica śni ;
Mini śma kin en wau ;
Qa mini kin iwankam imayaya.
3 Waceya on mihduśihtin ; dote masaka ;
Wakantanka mitawa ape waun kin on iśta mayazan.
4 Tona taku on etanhan śni śicemadapi kin
Hena mapa hin isanpa ota ;
Tona ihangmayanpi kta,
Tokamayanpi itonpiśni kin hena waśakapi ;
Taku iwacu śni kin he wicawecu kta.
5 Wakantanka, wimatkotkoke cin he sdonyaya ;
Qa wawahtani kin hena nanicihmanpi śni.
6 Tona anipepi kin hena miye on ištecapi śni nunwe ;
Itancan Jehowa Sabaoth :
Tona anicitapi kin hena miye on ištenwicayapi śni nunwe ;
Israel ta Wakantanka kin.
7 Niye on amaiapi waun ;
Wowištece ite amakahpa.
8 Mihunkawanji ehna togmahdapi waun ;
Qa ina cincawicaye cin hena om wicaśta matokeca.
9 Yati cantokpanipi kin he mayutakuni śni ;
Qa tona iyopeniyanpi wawiopeyapi kin he amahinhpaya.
10 Unkan waceya, minagi woteśni un ;
Qa he nakun on amaiapi ece.
11 Unkan wakihdaka ogeweton ;
Qa heon oweśtepi makagapi.

- 12 Otonwe tiyopa en iyotankapi kin hena amaiapi ;
Qa tona woyatke suta yatkanpi kin hena downpi.
- 13 Tuka, Jehowa, miye wocekiye eciciya ;
Woiyokipi anpetu kin en,
Wakantanka, nitowaonśida untkana on ;
Namahon wo, wiconi nitawa wowicake kin on.
- 14 Upśija kin etanhan emayaku ye,
Qa mahen imdamde kta iyowinmaye śni ye ;
Tona śicemadapi kin etanhan emayakupi nunwe,
Mini śma kin etanhan.
- 15 Mini tanka kin aomakahpe śni nunwe ;
Qa mini śma kin namapce śni nunwe ;
Qa woha i kin aokibe maye śni nunwe.
- 16 Jehowa, namahon ye, nitowaonśida wašte kin on ;
Wawacinkta duza tanka ota kin on miye ekta ihduhomni ye.
- 17 Qa niite nitaokiye nakicihbe śni wo :
Makakija he on namahon inahni wo.
- 18 Minagi ikiyedani u wo, he opekiton ye ;
Tokamayanpi kin on etanhan makiyuśka wo.
- 19 Amaiapi qa ištenmayanpi qa iyopemayanpi kin, niye sdoniyaya ;
Tokamayanpi owasin nitokam yakonpi.
- 20 Waaiapi kin micante kaksa ; heon wamayazan ;
Unkan onśimadapi kta ape waun, tuka wanica ;
Qa cantohnagmayanpi kta, tuka tuwedan iyewaye śni.
- 21 Nakun wate kta on pizi maqupi ;
Qa imapuza hehan miniskuya yatkemakiyapi.
- 22 Wicitokam wahna wotapi kin he wohmunke eekiyapi nunwe ;
Qa tanyan yukanpi kin he mazahtakiyapi kte.
- 23 Išta tawapi aotpasyapi nunwe ;
Wawanyakapi kte śni ;
Qa nitepi ohinniyan patuświcakiya wo.
- 24 Nitocanniye kin awicakaśtan wo ;
Qa wośihda kata nitawa iyahdewicaya nunwe.
- 25 Hocoka tawapi kin he otiwota ehpeyapi kte ;
Qa tawakeyapi ohna tuwedan ti śni nunwe.
- 26 Tuwe yakaśtake cin he śicaya kuwapi ;
Qa wicayapahdoke iyokiśicapi kin he oyakapi ece.
- 27 Wahtanipi on wohtani wicaqu wo ;
Qa nitoowotanna kin en upi śni nunwe.

- 28 Wiconi wowapi kin etanhan wicapajujupi nunwe ;
Qa wicašta owotanna om owicawapi kte śni.
- 29 Tuka miye iyomakišice ça makakija ;
Wakantanka, wiconi nitawa wankan emahde kte.
- 30 Odowan wan on Wakantanka caje kin mdatan kta ;
Woyatan dowanpi on mdatanka kta.
- 31 Unkan he Jehowa iyokipi kta,
Tatanka, tatangmdoka he śake ko yuhe cin isanpa.
- 32 Wicašta wahbadan he wanyakapi, qa iyuškinpi kta ;
Qa Wakantanka ayakitapi kin niye nicantepi ni kte :
- 33 Tona onśike cin hena Jehowa nawicahon ;
Qa wicakaškapi tawa kin hena śice wicadake śni.
- 34 Mahpiya qa maka kin he yatanpi nunwe ;
Miniwanca qa taku ohna śkanśkan owasin.
- 35 Wakantanka Zion nikiye kta ;
Qa Juda totonwe kin hena piya kage kta :
Hecen en ounyanpi kta qa tawayapi kta.
- 36 Nakun iye taokiye cinca kin tawapi kta ;
Qa tona iye caje waštedapi kin hena hen tipi kta.

PSALM 70.

Dowan itancan kin kicagapi. Dawid tawa. Wokiksuye kta.

- 1 Wakantanka, emahdaku wo :
Jehowa, omakiya inahni wo.
- 2 Tona minagi odepi kin hena token cante yuzapi taninśni qa ístecapi
nunwe ;
Tona śicaya waun kta cinpi kin hena namnipi qa ístenwicayapi kte.
- 3 Ístecapi on namnipi kta ;
Tona, Hanhan, hanhan, eyapi kin.
- 4 Tona anicitapi kin owasin iyuškinpi qa pidapi kte ;
Qa, Jehowa yatankapi nunwe, ohinniyan eyapi kta ;
Tona wiconi nitawa waštedapi kin hena.
- 5 Tuka miye makakije ça onmaśika ;
Wakantanka en mahi inahni wo ;
Tuwe omakiye ça emahdaku kin he niye ;
Jehowa yutehan śni ye.

PSALM 71.

- 1 Jehowa niye wacinciya ;
Icimana ístenmayanpi śni nunwe.
- 2 Nitoowotanna on emayahdaku qa inapemayakiye kta :
Anohmakiye ça nimayan wo.
- 3 Tokin imnija tipi ciciyuhen, ohinniyan en waku kte ;
Nimakiyapi kta econwicayaśi :
Imnija mitawa qa conkaśke mitawa kin he niye.
- 4 Mita Wakantanka, wicaśta śica nape etanhan emahdaku wo ;
Śicaya ohanye ça wahteśni kin napcokaya etanhan.
- 5 Itancan, wowacinyeciya heon etanhan ;
Jehowa, homakśiyopa ehantanhan wacinciya.
- 6 Wicatamni etanhan niye en imunka ;
Ina tezi kin etanhan yus amau kin he niye ;
Niye en ohinniyan mitadowan.
- 7 Wicota wowinihan mayanpi ;
Tuka wowinape suta mitawa kin he niye.
- 8 Niyatanpi kin on mii ojudan kta ;
Qa, anpetu osan, nitowitan kin on.
- 9 Wimacahinca kinhan ehpemaye śni ye ;
Waśake śni amayan en amayuśtan śni wo.
- 10 Tokamayanpi kin hena amaiapi ;
Qa tona minagi iyapepi kin hena witaya wohdakapi ;
- 11 Qa heyapi ; Wakantanka ehpeya ce ;
Kuwa aye ça yuza wo, tuwedan eyaku kte śni.
- 12 Wakantanka, mitehanyan un śni ye ;
Mita Wakantanka omakiya inahni wo.
- 13 Tona minagi tokayapi kin,
Hena ístecapi qa atakunipi śni nunwe ;
Tona śicaya waun kta cinpi kin,
Hena waaiapi qa wowištece koyakapi nunwe.
- 14 Tuka miye ohinniyan ape waun kta ;
Qa niyatanpi kin owasin mdaota kta.
- 15 Nitoowotanna kin mii oyake kta ;
Anpetu osan, wiconi nitawa kin ;
Tonakeca sdonwaye śni nakaes.
- 16 Jehowa Itancan ohan waśake cin hena en wau kta ;
Nitoowotanna omdake kta, nitawa ecedan.

- 17 Wakantanka, homakásiyopa ehantanhan niye onspemayakiya :
Unkan dehanyan niohan wakan kin mdaotanin kta.
- 18 Nakun wimacahinca qa pa maska hehanyan,
Wakantanka, amayuśtan śni ye ;
Hecen niisto kin wicoicage kin de owakiyake kta ;
Nitowaśake, tona u kta owasin en.
- 19 Nitoowotanna nakun, Wakantanka, tehanwankantu ;
Taku tanka hinca ecanon ece ;
Wakantanka, tuwe iyeniceca he.
- 20 Niye wokakije ota qa tanka wanyag unyakiyapi :
Yahdicu qa niunyakiyapi kta ;
Qa maka ośbe kin etanhan hdicu unyakiyapi kta.
- 21 Niye mayadutanka kte ;
Qa ake cante wašte mayakage kta.
- 22 Nakun candowankiyapi on ciyatan kta ;
Nitowicake on, Wakantanka mitawa :
Israel Taku Wakan tawa, cotanka on ciciyajo kta.
- 23 Tohan ciciyajo kinhan miiha iyuśkin kta ;
Qa minagi opeyakiton kin he nakun.
- 24 Nakun miceji, anpetu osan, nitoowotanna cajeyate kta :
Tona tanyan waun kte śni cinpi qon,
Hena ístecapi, hena ite naśapi, heon.

PSALM 72.

Solomon tawa.

- 1 Wakantanka, nitawoyaco wicaśtayatapi kin qu wo ;
Qa nitoowotanna, wicaśtayatapi cinhintku kin.
- 2 Woowotanna on nitaoyate wicayukcan kta ;
Qa onśikapi nitawa kin, woyaco on.
- 3 Hehan he kin oyate wookiye icahwicakiciye kta ;
Qa paha kin, woowotanna on.
- 4 Oyate en tona onśikapi kin on wayaco kta ;
Wahpanica cinca kin hena niwicaye kta ;
Qa tehiya wicakuwa kin he kamdemdece kta.
- 5 Konicipapi kta, tohanyan anpetu wi,
Qa hanyetu wi kin yuke kta,
Wicoicage qa wicoicage hehanyan.

- 6 Maga kaşđapi kin amagaju he iyecen hdihe kta ;
Magaju maka bospaya kin he iyececa.
- 7 Iye taanpetu kin en wicaşta owotanna icage kta ;
Qa wookiye untkanna, hanyetu wi henakeca kta hehanyan.
- 8 Unkan iye miniwanca etanhan miniwanca ekta wicaştayatapi kta ;
Qa wakpa kin etanhan maka ihanke kin hehanyan.
- 9 Iye itokam Ikcewicaşta kin patujapi kta ;
Qa tona tokayapi kin hena maka mdu kin iputakapi kta.
- 10 Tarşis wicaştayatapi qa wita kin
Hena wopida woşna ahiyupi kta ;
Şeba qa Seba wicaştayatapi kin taku itukihanpi kta.
- 11 Han, wicaştayatapi owasin iye itokam makipusdiyapi kta ;
Oyatepi owasin wowidagwicaye kta.
- 12 Wahpanica hoyekiye cin he ehdaku kta ;
Qa onşike cin, qa nukun tuwe okiyapi şni.
- 13 Wicaşta onşika wahpanica ko wicakpatan kta ;
Qa wahpanica nagipi kin niwicaye kta.
- 14 Wohnayan qa wicokicize etanhan nagi opewicakiton kta ;
Qa hena wepi kin tehike kta, iye işta kin en.
- 15 Unkan ni kta, qa mazaska Şeba etanhan qu kta ;
Nakun ohinniyan wocekiye ekiciye kta ;
Anpetu osan yawaşte kta.
- 16 Makoce kin en wamnaheza napohnaka wanjidan eşta, he ipa kin en ;
Waskuyeca icage cin Lebanon iyecen kahnahnapi kta ;
Unkan otonwe etanhanpi kin maka wato iyecen hca aye kta.
- 17 Iye caje kin owihanke wanice kta ;
Anpetu wi itokam iye caje icage kta :
Unkan iye on wicaşta ihdawaştepi kta ;
Oyate owasin iye yawaştepi kta.
- 18 Jehowa Wakantanka yawaştepi nunwe ;
Israel ta Wakantanka kin ;
Işnana wowinihan wicohan econ ece.
- 19 Qa iye caje wakan kin ohinniyan yawaştepi nunwe ;
Qa iye towakan kin on maka kin ocowasin ojudan kte.
Amen qa amen.
- 20 Dawid Jesse cinhintku tawocekiye kin henakeca.

PSALM 73.

Asaph tadowan.

- 1 Awicakehan Wakantanka Israel wicakiciwašte ;
Tona cante ecepidan kin hena.
- 2 Tuka miye qe misiha naśdute kta ikeyedan ;
Mioye kin kaicucuya hiyeya tuka.
- 3 Wahanhaniçidapi kin inawawizi ;
Wicašta śica wookiye en unpi wanmdake çehan.
- 4 Hena tapi kinhan wicakaškapi śni ;
Qa wowaśake tawapi kin he cepa.
- 5 Wicašta iyotanhan iyekiyapi kin en opapi śni ;
Qa wicašta tokeca om kakijapi śni.
- 6 Heon etanhan wahanhaniçidapi kin he wanapin kiyapi ;
Qa wicokicize wokoyake iyecen awicakaħpa.
- 7 Cepapi on išta pajoya unpi ;
Token canteyuzapi ahinanpa ece.
- 8 Owehanhanpi qa taku śica eyapi ;
Wankantanhan wicokicize cajeyatapi ece.
- 9 Ipi kin mahpiya iyahdekiyapi ;
Qa cejipi kin maka kin omani un.
- 10 Heon etanhan iye taoyate dehanyan ahdi ;
Qa mini ojudan hdaħepapi.
- 11 Unkan heyapi ; Tokiyatanhan Wakantanka sdoneye kta he :
Qa Iyotan Wankan kin he wookahnige yuha he.
- 12 Wanyaka po, dena wicašta śicapi ;
Tuka ohinniyan tanyan unpi,
Sanpa wijica ayapi.
- 13 Awicakehan ituya micante wahduska ;
Qa wiyaonpepicaśni en nape wahdujaja.
- 14 Nakun anpetu otoiyohi makaštakapi ;
Qa hanhanna eca iyopemayanpi ece.
- 15 Hecen omdake kta ce, epe cinhan,
Iho, nicinca wicoicage kin iyokiśinwicawaye kta.
- 16 Unkan de okahnih awacanmi qehan,
Miišta kin en tehike :
- 17 Tipi wakan Wakantanka tawa kin en hibuh kinhan,
Hehan owihankepi kin wanmdake kta.

- 18 Awicakehan canku sduśduta en ewicayahde kta :
Woihangye en ohinhpaye wicayaye.
- 19 Inyun, ihnuhanna wicotakuniśni en iyohpayapi :
Wanna taninpi śni, wonihinciye on atakunipi śni :
- 20 Wihamnanpi wan ogungapi ekta he iyececa ;
Itancan, yekta kinhan, touncagepi kin śiceyadake kta.
- 21 Hecen cante śinmiçiya ;
Qa mapakśin wakpahdoka :
- 22 Qa wimatkotkoka qa takudan sdonwaye śni ;
Niye en woteca iyemaceca.
- 23 Tuka miye hinyahin cici waun ;
Minape etapa kin yus mayaun.
- 24 Nitowahokonkiye on yus amayade kta ;
Qa iyohakam wowitan iyahdemayaye kta.
- 25 Mahpiya ekta tuwe mduha he ;
Qa maka akan niye kici tuwedan wacin śni.
- 26 Micehpi qa micante atakuni śni ;
Micante imnija, qa taku ohinniyan mitawa kin Wakantanka hee.
- 27 Iho, tona nitehanyan unpi kin hena atakunipi kte śni ;
Tona ehpeniyan wicin iyayapi kin owasin ihangwicayaya.
- 28 Tuka miye qe Wakantanka mikiyedana u kin he wašte :
Jehowa Itancan kin wacinwaye :
Niohan owasin omdake kta.

PSALM 74.

Waonspekiyapi kta. Asaph tawa.

- 1 Wakantanka, tokeca ohinniyan waayakta śni he ;
Tinta nitawa optaye kin en nitocanniye ide kta he.
- 2 Omniciye nitawa kiksuya wo,
Wanakajatanhan opeyaton ;
Taku nitawa cansakadan opeyakiton qon ;
Zion Paha kin de en ounyaye cin.
- 3 Ohinniyan ihangyapi kin ekta caehde nitawa hiyuya wo ;
Toka taku śica owasin econ, tipi wakan nitawa ohna.
- 4 Tokaniyanpi nitomneciye kin en hotonpi ece ;
Wiyokihedan tawapi kin wiyokihedan ehdepi.
- 5 Tuwe contanka en onspe yuwankan ikikcu kin

- He sonyapi tuka qon.
- 6 Tuka nakaha ayuco pagopi kin witaya
Onspe maziya ko on kawankapi.
 - 7 Tipi wakan nitawa kin ideyapi ;
Nicaje ohna ti qon he makata ehpeyapi.
 - 8 Witaya ihangunyanpi kta ce, cante mahen eyapi ;
Makoce kin owancaya Wakantanka tomniciye kin huhnahyapi.
 - 9 Wowakta wanunhdakapi śni ;
Wicaśta wokcan wanica ;
Qa tohanyan kta hecinhan sonya unkokhipi śni.
 - 10 Wakantanka, tohanyan toka owehanhan kta he ;
Toka kin ohinniyan nicaje wahteda kte śni he.
 - 11 Tokeca ninape, han ninape etapa kin, eyahdaku kta he ;
Nimaku cokaya tanhan ihangwicaya wo.
 - 12 Tuka Wakantanka wanakajatanhan
Wicaśtayatapi mitawa ;
Makoce cokaya wiconi kaga ece.
 - 13 Niye nitowaśake on miniwanca kin duptuja ;
Mini akan hogan tankinyanyan pa kin yakaksaksa.
 - 14 Niye unktehi pa kin yakahuhuga ;
Oyate yutapi kta wicayaqu kta, makoskan unpi kin.
 - 15 Niye miniyowe qa mini tanka kin dukinukan ;
Wakpa ohinniyan minitan kin dupuza.
 - 16 Anpetu kin nitawa, han, hanyetu kin nitawa ;
Iyoyanpa qa anpetu wi kin niye yakaga :
 - 17 Niye maka opapun kin owasin eyahnaka ;
Mdoketu qa waniyetu, hena niye yakaga.
 - 18 De kiksuya wo ; toka wan Jehowa yaśica ;
Qa oyate witkotkoka wan nicaje wowihahaya.
 - 19 Wakiyedani nitawa optaye wotektehapi kin en wicaqu śni wo ;
Onśika nitawa optaye kin ohinniyan akiktonje śni wo.
 - 20 Wicotakuye kin he atonwan wo ;
Maka akan otpaza kin wicakipi ounyanpi kin ojudan.
 - 21 Kiyuśepi kin he išteca hdicu śni nunwe ;
Wicaśta onśika wahpanica ko nicaje yatanpi kta.
 - 22 Wakantanka najin wo ; oihdaka wo ;
Anpetu osan witkotkoka niyaśice cin he kiksuya wo.
 - 23 Tokaniyanpi ho kin he akiktonje śni wo ;
Takpe niupi oqoyapi ohinniyan wankan ye cin.

PSALM 75.

Dowan itancan kin kicagapi. Asaph tadowan. Waihangye síni wo. Woahiyaye wan.

- 1 Wakantanka, wopida unkeniciyapi ;
Unkiye wopida unkeyapi ;
Qa nicaje ikiyedán kin he niohan wakan oyakapi.
- 2 Tohan mniciyapi kta cajemdate cinhan,
Woowotanna on miye wamdaco kta.
- 3 Maka kin sído, qa tona akan tipi kin owasin ;
Can ipatan tawa kin hena tkeuwata. Sela.
- 4 Tona ihdatanpi kin, Ihdatanpi síni po, ewicawakiya ;
Qa wicašta síca, He hduwankan iyeyapi síni po.
- 5 He nitawapi hduwankan iyeyapi síni po ;
Qa tahu suta hduha iapi síni miye.
- 6 Wankan yeyapi kin he wiyohiyanpatanhan síni,
Qa wiyohpeyanhan síni ;
Qa hewoskan makoce kin eciyanhan síni.
- 7 Tuka Wakantanka wayaco yanka ;
De kun ehpeye kta, qa he wankan iyeye kta.
- 8 Jehowa nape ohna wiyatke wan ;
Qa miniša ipiga, pejihuta icahiyapi ;
Unkan hetanhan kaštan ece ;
Ceteta en hiyeye cin henana yahepapi kta ;
Maka akan wicašta síca owasin yatkanpi kta.
- 9 Tuka miye qe ohinniyan womdake kta ;
Jakob ta Wakantanka iwadowan kta.
- 10 Qa wicašta síca he kin owasin wakašpe kte :
Tuka wicašta owotanna he kin wankan icage kta.

PSALM 76.

Cadowankiyapi on dowan itancan kin kicagapi. Asaph tadowan. Woahiyaye wan.

- 1 Juda en Wakantanka sdoniyapi ;
Israel en iye caje kin tanka hinca.
- 2 Nakun tawokeya Salem en han ;

- Qa Zion en ounyan ece.
- 3 Hen itazipe wanhinkpe kin kawehwega ;
Wahacanka qa mazasagye qa okicize kin. Sela.
 - 4 Niye wiyatpa yaun, wakinihan hinca,
He akan wapatapi ece kin isanpa.
 - 5 Tona cante sutapi kin hena taninpi śni ;
Woiśtinma tawa iśtinmapi ;
Qa wicaśta waśakapi tuwedan nape iyekiyapi śni.
 - 6 Jakob ta Wakantanka, iyopewicayaye cin on,
Canpahmihma qa nakun śuktanka iśtinma tapi.
 - 7 Niye niśnana konicipapi kta ;
Qa tuwe nitokam najin kta he, śinyahda kinhan.
 - 8 Maħpiya eciyatanhan woyaco nahon wicayaya ;
Maka kin kokipe ça inina yanka ;
 - 9 Wakantanka wicayaco najin qehan :
Maka akan onśike cin owasin niwicaye kta. Sela.
 - 10 Awicakehan wicaśta śinhdapi kin niyatan kta ;
Qa śinhdapi ihe cin he ipiyagyeton kta.
 - 11 Jehowa Wakantanka nitawapi taku iwahoyapi qa hdajuju po ;
Tona ihdukśan yaunpi kin owasin ;
Tuwe kokipapi kte cin he taku kahipi kta iyececa.
 - 12 Iye wicaśta itancanpi taniya kin baksa ece :
Maka akan wicaśtayatapi kin kokipapi kta.

PSALM 77.

Dowan itancan Jeduthun etanhan. Asaph tadowan.

- 1 Miho kin Wakantanka ekta *yewaya*, qa cewakiye kta ;
Miho kin Wakantanka ekta *yewaye* kta :
Unkan anamagoptan kte.
- 2 Makakija anpetu kin en Itancan kin awakita ;
Hanyetu hehan minape yugan un, qa tasaka śni ;
Minagi wakihnapi cin śni.
- 3 Wakantanka weksuya, qa nihinmiciya ;
Awacin manka, unkan mitaniya iyokiśica hinca. Sela.
- 4 Miiśta iśtojuha sutaya yus yaun ;
Makaśtakapi, qa ia owakihi śni.
- 5 Anpetu wanakaja ekta ewacanmi ;

- Wanakaja tanhan waniyetu kin hena.
- 6 Hanyetu en mitadowan qon he weksuye kta ;
Micante on awacin waun kta ;
Qa mitaniya kin nina wiwanga ece.
- 7 Ohinniyan Itancan kin waakta kte śni he ;
Qa ake icimana wacantkiye kte śni he.
- 8 Towaonśida kin he ohinniyan owihanke he ;
Wicoicage qa wicoicage hehanyan, oie kin ayuśtan he.
- 9 Iyotan Waśake cin he waonśida akiktonja ;
Qa wocanniye on tocantekiye anakipta he. Sela.
- 10 Unkan hepa ; Makakije cin he dee ;
Iyotan Wankan un nape etapa waniyetu kin.
- 11 Jah ohan kin mdaotanin kta ;
Wanakaja tanhan niohan wakan kin hena weksuye kta.
- 12 Nakun niohan owasin awacanmi kta ;
Qa taku ecanon kin hena awacin waun kta.
- 13 Wakantanka, woowotanna en nitacanku :
Wanji waśaka tukte e Wakantanka iyecen tanka he.
- 14 Iyotan Waśaka wicohan wakan econ kin he niye ;
Oyate kin nitowaśake sdonye wicayakiya.
- 15 Niisto on nitaoyate opewicayakiton ;
Jakob qa Joseph cinca kin. Sela.
- 16 Wakantanka, mini kin wanniyakapi :
Mini kin wanniyakapi ; śkanśkanpi ;
Han, mini śbe cin cancan.
- 17 Maḥpiya śapa kin mini hdaśtanpi ;
Maḥpiya kin hotanin ;
Han, nitunwanhinkpe kin kinyan hiyaya.
- 18 Wakinyan nitawa ho kin tate iyumni en un ;
Wakanhdi maka kin iyoyamya ;
Maka kin cancan qa śkanśkan.
- 19 Miniwanca kin en nitacanku ;
Qa mini ota ohna cankuyaye ;
Hecen nioye kin sdonyapi śni.
- 20 Optaye wan iyecen nitaoyate yus awicade ;
Moses qa Aaron nape kin on.

PSALM 78.

Asaph tawa. Waonspekiyapi kta.

- 1 Mitaoyate, mitoope kin anagoptan po ;
Mii oie kin hena anohkiya miye.
- 2 Wicoie wakan wan on i wahdukawa kta ;
Wanakaja tanhan wiyukcanpi kin omdake kta.
- 3 Hena unkiye naunhonpi qa sdonunyanpi ;
Qa ate wicunyanpi unkokiyakapi qon ;
- 4 Hena iye cinca anawicunkihmanpi kte śni,
Wicoicage u kte cin,
Jehowa yatanpi kin owicunkiyakapi kta ;
Qa iye towaśake, qa wicohan wakan econ qon hena.
- 5 Unkan Jakob en wayuotanin wan ehde ;
Qa Israel en woope wan kaga ;
Hena hunkake wicunyanpi econ wicaśi,
Iye cincapi owicakiyakapi kta.
- 6 Hecen wicoicage u kte cin sonyapi kta ;
Wicacinca icagapi kte cin,
Hena najinpi qa iye cinca owicakiyakapi kta.
- 7 Hecen Wakantanka wacinyanpi kta ;
Qa Iyotan Waśaka ohan kin akiktonjapi kte śni ;
Tuka tawoahope kin opapi kta.
- 8 Hecen atewicayapi kin iyececapi kte śni ;
He wicoicage tahu suta qa wakize sa ;
Wicoicage cante hduwiyeye śni ;
Qa taniya kin Wakantanka ekta owotanna śni.
- 9 Ephraim cinca, wanhinkpe wotawe yuhapi kin,
Hena namnipi, kiczapi anpetu kin en.
- 10 Wakantanka wicotakuye tawa yuhapi śni ;
Qa tawoahope eciyatanhan mani wicadapi śni.
- 11 Tuka taku econ qon hena akiktonjapi ;
Qa iye ohan wakan wanyagwicakiye ciqon.
- 12 Atewicayapi wicitokam wicohan wakan econ ;
Egupta makoce kin en, Zoan tinta kin etu.
- 13 Miniwanca kin yukinukan qa ohna iyaye wicaya ;
Qa mini kin maya iyecen najin kiya.
- 14 Hehan anpetu icunhan mahpiya śapa wan on awicaya ;
Qa hanyetu osan peta iyoyanpa kin on.
- 15 Hewotahedan makoce kin en immija kin kaptuja ;

- Qa ośbe tanka etanhan iyecen yatkewicakiya.
- 16 Hecen imnija wan etanhan mini ihaha kiya ;
Qa wakpa iyecen mini kin hiyuya.
- 17 Hececa eśta nakun iye en wahtanipi ;
Hewoskan makoce kin en,
Iyotan Wankan kin i en hiyeyapi :
- 18 Qa iye cante en Wakantanka iyutanyanpi ;
Wipipi kta on woyute kidapi qehan.
- 19 Han, Wakantanka aiapi, qa heyapi ;
Iyotan Waśake cin hewoskan makoce kin en,
Wahna wotapi wan wiyeya ehde kta okihi he.
- 20 Iho, imnija kin apa, unkan mini hiyu ;
Qa etanhan wakpa wan kaduza :
Nakun aguyapi hiyuya okihi,
Qa taoyate kin tado wicaqu kta he.
- 21 Heon Jehowa nahon qa śinhda :
Unkan Jakob en peta wan ideyapi ;
Qa nakun Israel en wocanniye awicau :
- 22 Wakantanka wicadapi śni heon etanhan ;
Qa niwicaye cin he wacinyanpi śni.
- 23 Unkan wankan maħpiya śapa kin econ śi ;
Qa maħpiya tiyopa kin hduhdoka ;
- 24 Qa manna yutapi kta e ahinhe wicakiya ;
Qa maħpiya wamnaheza kin wicaqu.
- 25 Waśakapi taaguyapi kin wicaśta yutapi ;
Qa waneya imnahan yuhewicakiya.
- 26 Maħpiya kin ekta wiyohiyanpatanhan tate wan yekiya ;
Qa iye towaśake on tate itokagatanhan ukiya :
- 27 Qa maka mdu iyecen conica ahinhewicakiya ;
Qa taku kinyanpi kin miniwanca wiyaka iyececa.
- 28 Qa iye tahocoka kin cokaya ahinhpayeya ;
Tipi kin ihdukśan hiyeya.
- 29 Unkan yutapi qa imnanpi hinca ;
Taku cinpi qon he wicakahi nakaes.
- 30 Hinyanhin taku cinpi qon śicekidapi śni ;
Woyute nahanhin i ohnakapi ;
- 31 Unkan Wakantanka tocanniye kin en wicahi ;
Qa tona cepapi kin etanhan wicakte ;

- Qa Israel kahñigapi kin patuświcakiya.
- 32 Hececa ešta nakun wahtanipi ;
Qa wakanyan ohanyan ešta wicadapi śni.
- 33 Unkan anpetu tawapi kin takuśni en wicakiyusota ;
Qa waniyetu tawapi, wokakije en.
- 34 Wicakte qehan, hehan akitapi,
Qa hdicupi, qa hanhanna hinca Wakantanka on wiwangapi.
- 35 Nakun imnija tawapi qon Wakantanka hee e kiksuyapi ;
Qa Iyotan Waśaka, Iyotan Wankan kin opewicakiton kin hee.
- 36 Hececa ešta iye ipi on hnayanpi ;
Qa cejipi on oitonpi śni.
- 37 Qa ekta cante ecetu yuzapi śni ;
Qa wicotakuye tawa kin en wicakapi śni.
- 38 Tuka iye, Waonśida kin, woahntani kajuju, qa ihangwicaye śni ;
Nakun ijehan tocanniye anakipta ;
Qa tośinhda ocowasin hduhice śni.
- 39 Unkan hena wicacehpi heca kiksuya ;
Tateyanpa wan iyaye ça ake hdi kte śni.
- 40 Hewoskan makoce kin ekta i en hiyeyapi ;
Qa makoskan ijehan iyokiśinyapi.
- 41 Nakun namnipi qa Wakantanka iyutanyanpi ;
Qa Israel Taku Wakan tawapi Wanji aowehanhanpi.
- 42 Iye nape kin kiksuyapi śni,
Anpetu en wokakije etanhan ewicahdaku qon.
- 43 Egupta en wowakta tawa kin ehnaka ;
Qa iye ohan wakan kin, Zoan makoce kin en.
- 44 Nakun wakpa tawapi kin we kaga :
Qa mini wakpadan kin yatkan okihipi śni.
- 45 Tatawamduśka en hiyuya, unkan wicayajipapi ;
Qa hnaśka, unkan ihangwicayapi.
- 46 Unkan taku icañyapi kin wamduśkadan wicaqu ;
Qa wicohtani tawapi kin he psipsicadan qu.
- 47 Hastanyanka iyuwi yuhapi kin wasu on kte ;
Qa sakomin can kin, hewanke on.
- 48 Nakun tawanunyanpi kin wasu en onawicataka ;
Qa optaye yuhapi kin, peta ide kin en.
- 49 Iye tocanniye kata en au wicakiya ;
Wośinhda qa wocanniye qa wonihinciye ;
Ohnihde śicapi kin hena u wicaśi.

- 50 Iye tocanniye kin canku wan kiyumdaya ;
Hena nagipi wiconṭe ipiwicada śni ;
Qa taniyapi makośica en wicaqu.
- 51 Hecen Eguṭpa en tona tokapa kin owasin awicapa ;
Ham tawakeyapi ohna towaśakepi tokaheya kin hena.
- 52 Hehan tahinca optaye iyecen, iye taoyate kin awicahiyu
Qa hewoskan makoce kin en optaye iyecen yus awicaya.
- 53 Qa tanyan awicaya, unkan wikopapi śni ;
Tuka tokawicayapi kin hena miniwanca awicakahpa.
- 54 Hecen opapun wakan tawa kin en awicahi ;
Paha kin de en, iye nape etapa ehdaku qon he.
- 55 Nakun wicitokam oyatepi napewicaya ;
Qa ounyanpi kte cin iyuta wicaqu ;
Qa tawakeyapi ohna Israel wicoun oti wicakiya.
- 56 Tuka Wakantanka Iyotan Wankan kin
He iyutanyanpi qa śinhdayapi ;
Qa tawoahope kin kiciyuhapi śni.
- 57 Nakun namnipi, qa hunkake wicayapi iyecen wahnayan ohanyanpi ;
Icunonpa iyayapi, itazipa wahnaye sa iyececa.
- 58 Qa paha tawapi kin on śinhdayapi ;
Qa wakagapi bagopi kin on nawiziyapi.
- 59 Wakantanka he nahon, unkan śinhda ;
Qa Israel nina śicewicakidake.
- 60 Hecen Śilo en ounye cin he ayuśtan ;
Wakeya wicaśta ehna ti kicage ciqon :
- 61 Qa iye towaśake kin wayaka ahde kiya ;
Qa iye towitan kin toka nape kin en wicaqu.
- 62 Nakun taoyate mazasagye en onawicataka ;
Qa taku tawa hince cin he canniyeya.
- 63 Wicaśta kahṅigapi tawa kin hena peta huḅnahwicaya ;
Qa wikośkapi tawa kin hena wicayatanpi śni.
- 64 Wawayuśnapi tawa kin mazasagye on hinḅpayapi ;
Qa wiwazicapi kin hena ceyapi śni.
- 65 Hehan, wicaśta iśtinma se iyecen, Itancan kin kikta ;
Wicaśta waśaka miniśa on iyaśa kin iyececa.
- 66 Qa tokayapi kin heyata ehpewicaya ;
Wowiśtece owihanke kte śni wicaqu.
- 67 Nakun Joseph tawakeya kin akta śni ;
Qa Ephraim tawicoun kin kahṅige śni.

- 68 Tuka Juda tawicoun kin he hdahniga ;
Zion Paha kin de waštedake ciqon.
- 69 Qa tipi wakan tawa kin tewankantuya kaga ;
Maka kin iyecen owihankešniyan ekihde.
- 70 Nakun iye taokiye Dawid kahniga ;
Qa tahnca tipi kin etanhan ikikcu ;
- 71 Tawiye azinpi kin wicihektapatanhan ehdaku ;
Jakob iye taoyate kin wonwicaye kta ;
Qa Israel iye tawa hince cin.
- 72 Unkan iye cante ecetu kin on wonwicaya ;
Nakun iye nape wayupike cin on yus awicaye kta.

PSALM 79.

Asaph tadowan.

- 1 Wakantanka, Ikcewicašta makoce nitawa kin en hipi ;
Tipi wakan nitawa kin he yušapapi ;
Jerusalem paha seksen ehpeyapi.
- 2 Mašpiya okinyanpi kin yutapi kta e
Nitaokiye tancanpi kin wicaqupi ;
Wicašta wacantkiye nitawa cehipi kin maka wamanica wicaqupi.
- 3 Jerusalem ihdukšan mini iyecen we papsonpi ;
Qa tuwedan wicahe šni.
- 4 Tona ikiyedani unyakonpi kin hena unkaiapi :
Unkihdukšanpi kin hena pomnamnaunkiyapi qa wowihahaunyanpi.
- 5 Jehowa, tohanyan kta he ;
Ohinniyan canniniye kta he ;
Winayawizi kin he peta iyecen ide kta he.
- 6 Oyatepi sdonniyanpi šni kin
Hena nitocanniye awicakaštan wo ;
Qa wokiconze nicaje hoyekiyapi šni kin hena.
- 7 Jakob wanna temyapi ;
Qa tamaga kin ihangyapi.
- 8 Unkitokam unpi wahtanipi qon unkiyepi en kiksuye šni wo ;
Inahni wo, wacanyakiye cin he itkounkipapi nunwe ;
Nina iyotanhan iyeunkiyapi, heon etanhan.
- 9 Wakantanka niunkiyapi kin, ounkiya po ;

- Nicaje wowitan kin heon etanhan ;
 Nakun unkiyukca po, qa waunhtanipi kin kajuju wo ;
 Niye nicaje kin on etanhan.
- 10 Taku Wakan tawapi kin toki un he,
 Tokeca Ikcewicašta eyapi kta he :
 Nitaokiye we papsonpi tokiçonpi kin he,
 Unkištapi itokam, Ikcewicašta sdonyapi kte.
- 11 Kaška unpi comnihdazipi kin he nitokam u nunwe ;
 Niisto tanka kin eciyatanhan,
 Tona tapi kte cin hena niwicaya wo.
- 12 Itancan, tona ikiyeddan unyakonpi,
 Wowihaha on inihahapi kin he,
 Iye maku kin ohna, śakowin akihde wicakicu wo.
- 13 Hecen unkiye, nitaoyate qa tahinca wonwicayaye cin,
 Ohinniyān wopida unkeniciyapi kta ;
 Wicoicage qa wicoicage en niyatanpi kin owicunkiyakapi kta.

PSALM 80.

Asaph tadowan. Mnahcahca on dowan itancan kin kicagapi. Wayaotaninpi kta.

- 1 Israel wonwicaye cin, anagoptan ye ;
 Optaye wan iyecen Joseph yus ade cin ;
 Kerubim ehna idotanke, iyoyanpa wo.
- 2 Ephraim qa Benjamin qa Manasse itokam,
 Nitowaśake hduhica wo ;
 Qa niunkiyapi kta u wo.
- 3 Wakantanka, piya kiyotang unkiya po ;
 Qa niite hduwiyakpa, qa niunkiya miye.
- 4 Jehowa, Wakantanka Sabaoth,
 Tohanyan nitaoyate cekiyapi kin izinyaye kta he.
- 5 Ištamnihanpe aguyapi yunwicayakiya ;
 Qa ištamnihanpe ota hinca yatke wicayakiya.
- 6 Oyate ikiyeddan unyakonpi kin en woakinica unyakagapi ;
 Qa tokaunyanpi kin iye iyakitedan ihapi.
- 7 Wakantanka Sabaoth,
 Piya kiyotang unkiya po ;
 Qa niite hduwiyakpa, qa niunkiya miye.
- 8 Egupta etanhan hastanyanka iyuwi wan ayahdiyaku :

- Ikcewicašta kin heyata ehpewicayaye ça he huyahde.
- 9 Itokam wayakahinta ;
Unkan hutkan icage ça makoce ojudan.
- 10 Ohanzi kin he paha kin akahpa :
Qa adetka, hante ša Wakantanka tawa kin iyececa.
- 11 Adetka kin miniwanca kin iyahde ;
Qa hutkan, wakpa kin ekta.
- 12 Tokeca conkaške kin dujuju he :
Hecen tona en hiyayapi owasin yuksaksapi.
- 13 Taškoju etanhan kukuše mdoka kin yatakuni šni ;
Qa tinta wamanica kin etanhan yutapi ece.
- 14 Wakantanka Sabaoth, tokin yahdicun ;
Maḥpiya eciyatanhan ahitonwan, qa wanyaka,
Qa hastanyanka iyuwi kin de en hdi wo :
- 15 Qa nape nietapa huhde qon he hdusuta wo ;
Qa cinca niye icahyakiye cin he.
- 16 Peta on huhnaga ; kaksapi ;
Niite iyopewicaye cin on atakunipi šni.
- 17 Nietapa wicašta kin akan ninape un nunwe ;
Adam cinhintku niye yahduwašake cin.
- 18 Hehan unkiye ehpeunniyanpi kte šni :
Niye niunyakiyapi kta,
Unkan nicaje hoyeunkiyapi kta.
- 19 Jehowa, Wakantanka Sabaoth,
Piya kiyotang unkiya po ;
Niite hduwiyakpa, qa niunkiya miye.

PSALM 81.

Asaph tawa. Gittith on dowan itancan kin kicagapi.

- 1 Wakantanka wowašake unkitawapi kin
Taninyan idowan miye ;
Jakob ta Wakantanka iyuškinyan kahiyaya po.
- 2 Odowan ahियaya po, qa cancega apa po ;
Candowankiyapi wašte cotanka kici.
- 3 Wi teca kin en, mazayahotonpi yajo po ;
Wi mibe cin en, wounhanpi anpetu kin en.
- 4 Israel en woahope wanji dee ;

- Jakob ta Wakantanka toope kin.
- 5 Joseph en wayuotannin kin de kaga ;
Egupta makoce etanhan hinanpe cin he ehan :
Iapi wan owakahnige śni kin he nawahon.
- 6 Waqinpi kin etanhan tapete eweciyaku ;
Iye nape wakiśkokpa kin ayuśtanpi.
- 7 Wokakije en yapan, unkan ecihdaku ;
Nakun wakinyan hoton oinahbe etanhan aciyupta :
Woakinica mini kin ekta iyutanciya. Sela.
- 8 Mitaoyate, nahon wo, kinhan wahokonciye kta ;
Israel, anamayagoptan kta hecinhan :
- 9 Taku wakan tokeca niyepi en un kte śni ;
Qa ihnuhan oyate tokeca taku wakan
Tawa kin en makata ehpeniçiye cinhan.
- 10 Jehowa Taku Wakan nitawa,
Egupta makoce etanhan uniye cin he miye :
Nina i hdukawa wo, kinhan ojuwaye kta ce.
- 11 Tuka mitaoyate miho kin anagoptan śni ;
Qa Israel wicamicida śni.
- 12 Hecen iye cante hdusutapi kin en ehpewicawaya :
Iye tawacinpi kin en omanipi kta.
- 13 Tokin mitaoyate anamagoptanpi kinhan ;
Qa Israel mitacanku ohna manipi kta :
- 14 Ecadan tokawicayapi kin patuś wicawaye kta ;
Qa tona śicewicadapi kin minape awicawaknake kta tuka.
- 15 Jehowa śicedakapi kin hena iye en ihdaśkapi kta :
Tuka iye anpetu tawapi kin owihanke wanice kta.
- 16 Nakun aguyapi conica kin yunkiye kta :
Qa imnija etanhan tuhmaga canhanpi on imnaciye kta.

PSALM 82.

Asaph tadowan.

- 1 Iyotan Waśaka tomniciye kin en Wakantanka najin ;
Taku wakan kin wicehna wayaco yanka.
- 2 Tohanyan ecinśniyan wadacopi kta he ;
Qa wicaśta śica itepi kin yakinihanpi kta. Sela.
- 3 Onśika qa wamdenica kin hena wicakiciyukcan po ;

- Tuwe kakije ɔa wahpanica kin owotanna ecawicakicon miye.
- 4 Onśika qa wahpanica kin hdinape wicaya po ;
Wicaśta śica nape kin etanhan ehdaku miye.
- 5 Sdonyapi śni qa okahniħ wacinpi śni ;
Otpaza en manipi kte hinca :
Maka oahde kin owasin yuhohopi.
- 6 Taku wakan henicapi ce, miye epa ;
Owasin Iyotan Wankan un cinca kin niyepi.
- 7 Tuka awicakehan wicaśta iyecen niṭapi kta ;
Qa wicaśta itancanpi wanji iyecen nihinhpayapi kte.
- 8 Wakantanka inajin wo, maka kin hdaco wo :
Oyate iyuhpa tawawicaye kte cin he niye.

PSALM 83.

Psalm odowan. Asaph tawa.

- 1 Wakantanka, inina yaun śni nunwe :
Iyotan Waśaka, inina yanke śni qa owanji yanke śni wo.
- 2 Iho, tokaniyanpi kin hena hotonpi ;
Qa śicenidapi kin hena pa yuwankan ikikcupi.
- 3 Nitaoyate kin śicaya awicaiapi ;
Qa nawicayakihbe cin hena on wohdakapi ece.
- 4 Hena heyapi ; Upo, oyate kin he ihangwicunyanpi kte ;
Qa Israel caje kin icimana kiksuyapi kte śni ce.
- 5 Cante eciyatanhan witaya awacinpi ;
Niye on wicotakuye wan hduśtanpi.
- 6 Edom tawakeyapi, qa Iśmaeli kin ;
Moab, qa Hagari kin hena :
- 7 Gebal, qa Ammon, qa Amalek ;
Philistia, Turos en ounyanpi kin hena om :
- 8 Nakun Assur hena owicapa :
Hena Lot cinca isto owicakupi. Sela.
- 9 Midian en iyecen ecawicakicon wo ;
Sisera iyececa, Jabin iyececa, Kiśon wakpadan en.
- 10 Endor ekta ihangwicayapi qon :
Maga akan tacesdi iyececa icagapi.
- 11 Akicita tancanpi kin Oreb qa Zeeb iyecen wicakaga wo ;
Han, wicaśta itancanpi owasin, Zeba qa Zalmunna iyececapi.

- 12 Hena heyapi ; Wakantanka tamaga kin
Hena unkiye tawaunyanpi kta ce.
- 13 Wakantanka mitawa,
Hena tate iyumni iyececa wicakaga wo ;
Tateyanpa itokam aguyapi ha kin iyececa :
- 14 Peta contanka wan huhnage cin iyececa ;
Qa ide wan he aide kin iyececa :
- 15 Hecen tateyanpa nitawa on kuwa awicade kta ;
Qa tate iyumni nitawa on nihinciye wicayaye kta ;
- 16 Itepi kin wowištece on ojuwicaya wo :
Unkan, Jehowa, nicaje wicašta akitapi kte.
- 17 Ístecapi kta, qa nihinciyapi kta, owihanke wanica ;
Qa ite naşapi kta, qa atakunipi kte şni.
- 18 Unkan niye Jehowa eniciyapi kin sdonyapi kta ;
Nişnana Iyotan Wankan yaun, maka kin owancaya.

PSALM 84.

Gittith on dowan itancan kin kicagapi. Qora cinca tadowanpi.

- 1 Jehowa Sabaoth,
Nitawakeya kin nina wiciyokipi.
- 2 Jehowa tahocoka kin on,
Minagi cantokpani qa nakun niya şni te kta seca :
Micante qa micehpi Taku Wakan ni un kin hoyekiya ece.
- 3 Upijate hee kaeş tipi wan iyekiya,
Qa icapşinpşincadan hoşpi wan,
En cinca ekihnake kta ;
Jehowa Sabaoth, owayuşna nitawa kin hena,
Wicaştayatapi mitawa, qa mita Wakantanka.
- 4 Yati en ounyanpi kin hena cante waştepi ;
Hena ohinniyan niyatanpi kta. Sela.
- 5 Wicašta tuwe towaşake niye en un kin he cante waşte :
Canku tankapi kin iye cantepi ohna wanka.
- 6 Ístamnihanpe Kaksiza ohna yapi kinhan,
He miniyowe kagapi ;
Nakun magaju kin woyawaşte on akahpa.
- 7 Wowaşake etanhan wowaşake ekta yapi kta :
Zion en Wakantanka itokam ihdutanin kta.

- 8 Jehowa, Wakantanka Sabaoth,
Wocekiye mitawa nahon wo ;
Jakob ta Wakantanka, anagoptan ye. Sela.
- 9 Wakantanka, wahacanka unkitawapi wanyaka wo ;
Qa Sdayakiye ite kin atonwan wo.
- 10 Nitahocoka ohna anpetu wanjidan keś
Kektopawinge isanpa wašte :
Mita Wakantanka ti tiyopa kin en
Imunke kta wakahniga :
Qa wicowicaštaśni wakeya kin ohna wati kte śni.
- 11 Jehowa Wakantanka anpetu wi qa wahacanka kin heca ;
Jehowa wowaonśida wowitan ko wicaqu kta ;
Tona ecetuya manipi kin taku wašte ipiwicada kte śni.
- 12 Jehowa Sabaoth,
Wicašta wacinniye cin he cante wašte.

PSALM 85.

Dowan itancan kin kicagapi. Qora cinca tadowanpi.

- 1 Jehowa, makoce nitawa canteyakiya ;
Jakob wayaka unpi kin hdicu wicayakiya.
- 2 Nitaoyate taku śica econpi kin yecicajuju ;
Wahtanipi kin owasin ayakahpa. Sela.
- 3 Śinyahda kin ocowasin anayecipta ;
Nitocanniye kin ide śni yakiya.
- 4 Unkiyepi en hdicu wo, Wakantanka Wanikiya unkitawapi ;
Qa canniyeunyakiyapi kin anakipta wo.
- 5 Owihanke wanin canniyeunyayapi kta he ;
Nitocanniye wicoicage qa wicoicage ekta iyahdeyaye kta he.
- 6 Ake yahdicu qa niunyakiyapi kte śni he :
Kinhan, nitaokiye iniyuśkinpi kta.
- 7 Jehowa, nitowaonśida wanyagunkiya po :
Qa nitowiconi kin unyaqupi kte.
- 8 Jehowa Iyotan Waśake cin he taku eye cin he nawahon kta ;
Iye taoyate qa wicašta wacantkiye tawa kin wookiye on owicakiye kta :
Tuka ihnuhan wowitkotkoke cin ekta ihdoyapi kinhan.
- 9 Tona kokipapi kin henana wiconi tawa wicikiyedani un ;
Hecen makoce unkitawapi ohna wowitan ounye kta.

- 10 Wowaońsida qa wowicake itkokicipapi :
Woowotanna qa wookiye i ikiciputakapi.
- 11 Wowicake maka kin etanhan icaga ;
Qa woowotanna maħpiya eciyatanhan kun ahitonwan.
- 12 Nakun Jehowa taku wašte kin wicaqu kta ;
Qa makoce unkitawapi taku icahye kta.
- 13 Woowotanna iye itokam mani kta ;
Qa iye oye kin ohna aunhdepi kte.

PSALM 86.

Dawid tawocekiye.

- 1 Jehowa, ninoge ukiye a amayupta wo ;
Makakije a onmaśika, heon.
- 2 Minagi awanyaka ye, wacantkiye wanji he miye ;
Nitaokiye nikiya wo, Wakantanka mitawa he niye ;
Wacinniye cin heon.
- 3 Itancan, onśimakida wo ;
Anpetu osan hoyeciciye kta heon.
- 4 Nitaokiye nagi kin iyuśkinkiya wo ;
Itancan, niye ekta minagi wahdomda.
- 5 Niye, Itancan, niwašte qa wayakajuju ece ;
Qa tona hoyeniciyapi kin owasin,
Wocantekiye utkanna wicayeciyuha.
- 6 Jehowa, wocekiye mitawa nahon ye ;
Qa cewakiya ho kin he anagoptan wo.
- 7 Anpetu en makakije cinhan houciciye kta :
Unkan niye amayadupte kta.
- 8 Itancan, taku wakan ehna tuwedan iyenicece śni ;
Qa takudan niohan iyecece śni.
- 9 Itancan, oyate wicayakage cin owasin,
Hena nitokam upi qa ohodapi kta ;
Qa nicaje yaonihanpi kta.
- 10 Niye nitanka qa wowapetokeca ecanon ;
Niśnana Wakannitanka.
- 11 Jehowa, nitacanku onspemakiya ye ;
Nitowicake ohna mawani kta ;
Micante nicaje kokipe kta en iyakaśka wo.

- 12 Itancan, Wakantanka mitawa,
Micante ocowasin on, wopida eciciye kta ;
Qa nicaje mdaonihan kta, owihanke wanica.
- 13 Miye en nitowaonísida kin tanka ;
Qa Hades temahentu kin etanhan minagi edaku.
- 14 Wakantanka, wahanhaniçidapi kin takpe maupi ;
Qa wicašta wohitika omniciye kin minagi akitapi ;
Qa wicitokam niye enihdepi sní.
- 15 Tuka Itancan,
Taku Wakan waonísida qa wacantkiya kin he niye,
Wawacinkta yuza tanka,
Qa wowaonísida wowicake ko on winijice.
- 16 En mahdiyaku qa onsimakida wo ;
Nitowaśake kin nitaokiye qu wo ;
Qa nitaokiye win cinhintku kin nikiya wo.
- 17 Wowakta wašte wan makipazo wo ;
Hehan tona śicemadapi wanyakapi qa ístecapi kta :
Jehowa, niye omayakiye ça wacintonhnag mayaye cin heon.

PSALM 87.

Qora cinca tawapi. Psalm odowan.

- 1 Oahde tawa kin wowakan paha kin en un.
- 2 Zion tatiyopa kin hena Jehowa waštekidaka ;
Jakob en ounyanpi kin owasin isanpa.
- 3 Niye en wicoie wakan kin oyakapi,
Wakantanka totonwe kin. Sela.
- 4 Rahab qa Babel sdonmayanpi kin he omdake kta ;
Iho, Philistia qa Turos Kuś kici ;
De hen teca ni en tonpi ce.
- 5 Qa Zion on heyapi kta ;
Wicašta kin de qa kae hen tonpi ce :
Unkan iye Iyotan Wankan kin hdusuta kte.
- 6 Jehowa oyate owicawa kinhan wicayawa kta ;
De en teca ni en tonpi ce. Sela.
- 7 Unkan tona dowanpi, tona yajopi ko ;
Minihdoka mitawa owasin niye en un ce, eyapi kta.

PSALM 88.

Psalm odowan. Qora cinca tawapi. Dowan itancan kin kicagapi. Wowayazan kakişye cin on. Waonapekiyapi kta. Heman Ezrahi he kaga.

- 1 Jehowa, Wakantanka Wanikiya mitawa,
Nitokam anpetu hanyetu ko hoyewaye.
- 2 Wocekiye mitawa nitokam u nunwe ;
Hoyewaye cin he anohkiya wo.
- 3 Wokakije minagi imnahan un ;
Qa mitaniya Hades ikiyedani ayapi.
- 4 Woħa ekta iyayapi kin opeya mayawapi ;
Wicaşta wowaşake nice cin he iyemaceca.
- 5 Tapi kin opeya makiyuşkapi,
Wicaktepi wicahapi en wankapi kin iyececa,
Hena owihanke wanica wicayeksuye şni :
Qa hena ninape etanhan ehpewicayapi.
- 6 Woħa wan temahentu kin en omayahnaka ;
Otpaza tipi kin en, oşbe kin en.
- 7 Nitocanniye tkeya iyamahdaskica ;
Qa taja nitawa owasin on kakişmayaya. Sela.
- 8 Tona sdonmayanpi kin hena mitehanyan iyeyaya ;
Hena wahtemadapi şni yakaga ;
Onamatakapi, qa tankan waku owakihi şni.
- 9 Wokakije on miişta atakunişni ;
Jehowa, anpetu otoiyohi houciyiye ;
Minape ciciyugata ece.
- 10 Tapi kin hena wicoħan wakan ecawicayecon kta he ;
Wanagi hdinanpapi qa wopida eniciyapi kta he. Sela.
- 11 Wicahapi en nitowaonşida oyakapi kta he ;
Nitowicake kin wicotakunişni en.
- 12 Wicoħan wakan nitawa otpaza en sdonyapi kta he ;
Qa nitoowotanna, woakiktonje makoce kin en.
- 13 Tuka miye, Jehowa, hoyeciciya ;
Qa hanhanna eca mitawocekiye nitokam u kte.
- 14 Jehowa, tokeca minagi ayakta kte şni ;
Niite anamayakihbe kta he.
- 15 Homakşiyopa ehantanhan makakije a mae kta seca ;
Wonihinciye nitawa qin waun ;

- Token cante mduza tanin śni.
- 16 Nitocanniye miwankam iyaya ;
Wonihinciye nitawa ihangmayanpi ;
- 17 Mini iyececa, anpetu osan, aohdudemayanpi ;
Witaya ohomni imayayapi.
- 18 Waśtemadake a mitakuye kin mitehanyan iyewicayaya ;
Tona sdonmayanpi qon hena otpaza.

PSALM 89.

Waonspekiyapi kta. Ethan Ezrahi kin he tawa.

- 1 Jehowa towaonśida kin ohinniyan iwadowan kta ;
Wicoicage qa wicoicage hehanyan,
Mii on nitowicake omdake kta.
- 2 Woweonśida ohinniyan icahyapi kta ce, epe ciqon :
Maħpiya kin hena en nitowicake eyehde kta.
- 3 Wanji wakahnige cin he kici wicotakuye wakaga ;
Dawid mitaokiye kici iapi weciyasuta :
- 4 Owihanke wanica hehanyan nicinca sutaya ewahde kta ;
Qa wicoicage owasin hehanyan oiyotanke nitawa icahwaye kta. Sela.
- 5 Unkan, Jehowa, maħpiya kin niohan wakan oyakapi kta ;
Nakun nitowicake, oyate wakan mniciyapi kin en.
- 6 Tuwe maħpiya kin ekta Jehowa iyececa he ;
Waśakapi cinca kin Jehowa iyacinpica he.
- 7 Oyate wakan onahbeya mniciyapi kin en,
Taku Wakan nina kokipapi kta iyececa ;
Qa tona ihdukśan unpi kin isanpa kinihanpi kte.
- 8 Jehowa, Wakantanka Sabaoth,
Jah Iyotan Waśaka, tuwe iyeniceca he ;
Qa nitowicake nihdukśan un kin.
- 9 Miniwanca wankan ye cin he wowidagyaya ;
Taja wankan aya eca niye amdakedan yakaga ece.
- 10 Wicaktepi iyecen Rahab yakaśuśuja ;
Niisto waśaka on tokaniyanpi kin wicaduomdeca.
- 11 Maħpiya kin he niye nitawa,
Nakun maka kin nitawa ;
Makoce owasin qa woojudan kin
Hena niye yakaga.

- 12 Waziyata qa itokaga, hena niye yakaga ;
Tabor qa Hermon nicaje on iyuşkinpi kta.
- 13 Isto waşaka wan niyukan ;
Ninape waşaka, nape enitapa kin tehanwankantu.
- 14 Woowotanna qa woyaco oiyotanke nitawa oyanke kin hee ;
Wowaonşida qa wowicake niite itokam yapi kta.
- 15 Oyate wotanin waşte sdonye cin hena cante waştepi ;
Jehowa, niite iyoyanpa kin en omanipi kta.
- 16 Anpetu osan nicaje on iyuşkinpi kta ;
Qa nitoowotanna on wankan ihdoyapi kta.
- 17 Iye towaşakepi wowitan kin he niye,
Qa nitoyokipi kin en he wankan iyeunyeciciyapi kta.
- 18 Wahacanka unkitawapi kin he Jehowa tawa ;
Qa wicaştayatapi unkitawapi kin he
Israel Wakandapi kin he tawa.
- 19 Hehan wanji wacantkiye nitawa woyuotanin en oyakiya,
Qa heha ; Wanji Waşake cin akan wowaşake ewehnaka ;
Wanji oyate etanhan kahngapi kin wankan ewehde :
- 20 Dawid mitaokiyeye kin iyewaye ;
Wihdi wakan mitawa on sdawakiya :
- 21 Minape ohinniyan kici un kta ;
Nakun miisto yuwaşake kta.
- 22 Tokapi kin iyokişinyapi kte şni ;
Qa woahntani cincapi kakişyapi kte şni.
- 23 Unkan iye itokam tona tokayapi kin wicawakaşuşuje kta ;
Qa tona şicedapi kin awicawape kta.
- 24 Nakun mitowicake qa mitowaonşida kici un kta ;
Qa micaje on iye he kin wankan icage kta.
- 25 Qa iye nape kin miniwanca en ewahnake kta ;
Qa nape etapa kin mini tanka kin en.
- 26 Iye hoyemakiye kta ; Ateyaye cin he niye ;
Mita Wakantanka, qa imnija nimaye cin.
- 27 Unkan miye he micinca tokapa wakiye kta ;
Maka wicaştayatapi kin isanpa wankan un kta.
- 28 Ohinniyan mitowaonşida weciyuhe kta ;
Qa wicotakuye mitawa kici wicake kta.
- 29 Nakun iye cinca owihanke wanica mdusuta kta ;
Qa oiyotanke tawa kin mahpiya anpetu kin iyecece kta.
- 30 Iye cinca kin mitoope ehpeyapi kinhan ;

- Qa mitawoyaco ohna mani wacinpi śni ;
31 Taku omdake cin taku ikceka yawapi ;
Qa mitawoahope opapi śni kinhan :
32 Hehan taku śica econpi kin, icapsinte wan on,
Qa wahtanipi kin, apapi on iyopewicawaye kta :
33 Tuka mitowaonśida ewecihdaku kte śni ;
Qa wowicake mitawa kin en itonśni mićicage kte śni.
34 Wicotakuye mitawa taku ikceka wakage kte śni ;
Qa miiha taku enapeye cin mdatokeca kte śni.
35 Taku wanji mitowakan kin on wakonza ce ;
Dawid en itonśni owakihi śni :
36 Iye cinca kin owihanke wanice kta ;
Qa oiyotanke tawa anpetu wi mitokam iyecece kta.
37 Ohinniyan sutaya yanke kta, hanyetu wi iyececa ;
Qa maħpiya ekta wayuotanin wicaka. Sela.
38 Hececa ešta niye ehpeyaye ça ayakta śni ;
Sdayakiye ciqon he canniyeyaya :
39 Nitaokiye wicotakuye tawa yecaksa ;
Wateśdake tawa kin makata ehpeyaya :
40 Inatake tawa owasin dujuju ;
Conkaśke tawa kin woihangye yakaga :
41 Tona canku ohna hiyayapi owasin he ihangyapi ;
Tona ikiyedan unpi kin hena wahtedapi śni :
42 Tona śicedakapi nape etapa kin yuwankan iyeyaya ;
Tona tokayapi owasin iyuśkinwicayaya.
43 Nakun mazasagye tawa kin pe śni yakaga ;
Qa okicize en kici nayajin śni.
44 Toiyege kin ayuštanyakiya ;
Qa oiyotanke tawa kin makata ehpeyaya.
45 Kośka taanpetu kin duptecedan ;
Wowištece on akaħpeyeton. Sela.
46 Tohanyan kta ; Jehowa, ohinniyan nayakiħbe kta he ;
Peta iyecen nitocanniye ide kta he.
47 Miye ptenyedan wani kin he kiksuya wo ;
Tokeca Adam cinca owasin ituh yakaga he.
48 Wicašta tuwe ni un qa wiconęe wanyake kte śni ;
Hades nape etanhan nagi eihdaku kta he. Sela.
49 Itancan, otokahe ekta nitowaonśida kin tukte e he ;
Nitowicake en Dawid wahoyaye ciqon

- 50 Itancan, nitaokiye i en hdepi kin he kiksuya wo ;
Miikpi ohna oyate ota owasin wicamduha ;
- 51 Jehowa, tokaniyanpi i en iyeyapi qon he ;
On Sdayakiya oye kin i en iyeyapi qon.
- 52 Jehowa owihanke wanin yawaštepi nunwe.
Amen qa amen.

PSALM 90.

Wocekiye wan. Moses Wakantanka tawicašta tawa.

- 1 Itancan, niye otiunniyanpi,
Wicoicage qa wicoicage kin en.
- 2 He kin icage šni he itokam ;
Qa maka maga ko yakage šni he ehan ;
Otokahe wanica qa owihanke wanica,
Iyotan Wašaka kin he niye.
- 3 Maka mdu ee kaeš ekta wicašta hdicuyaya ;
Qa, Adam cinca hdicu miye, eha ece.
- 4 Waniyetu kektopawinge, niišta kin en,
Htanihan wanna henakeca he iyececa ;
Qa hanyetu en akicita onajin kin iyececa.
- 5 Okahbog iyewicayaya ;
Woištinma wan iyececapi ;
Hanhanna eca, wato iyecen, taninpi šni.
- 6 Hanhanna eca hca aya, qa hehan tanin šni ;
Htayetü hehan kašdapi qa šnija.
- 7 Nitocanniye kin on unsotapi ;
Qa šinyahda kin on kopeunhdapi ece.
- 8 Waunhtanipi kin nitokam eyahnaka ;
Woanaħbe unkitawapi kin niite iyoyanpa kin en.
- 9 Anpetu unkitawapi owasin nitocanniye en iyaya ;
Waniyetu unkitawapi wicotawacin wan iyecen enaunkiyapi.
- 10 Waniyetu unkitawapi anpetu kin
Hena waniyetu wikcemna šakowin,
Qa wowašake yuke cinhan, waniyetu wikcemna šahdogan ;
Hececa ešta wowašake kin he wokakije qa wicošice ;
Ihnuhanna atakuni šni, unkan kinyan unkiyayapi.

- 11 Nitocanniye wowaśake kin tuwe okahniga he ;
Qa śinyahda kin he konicipapi kin iyececa.
- 12 Hecen anpetu unkitawapi hdawa onspeunkiya po ;
Kinhan woksape ekta cante yeunkiyapi kta.
- 13 Jehowa hdicu wo ; tohanyan kta he :
Qa nitaokiyepi on tawacin hdutokeca wo.
- 14 Hanhanna eca nitowaonśida on imnaunyan po ;
Kinhan unkiyuśkinpi qa piundapi kta,
Anpetu unkitawapi owasin en.
- 15 Anpetu en kakiśunyanpi kin he iyecen wiyuśkinunkiya miye ;
Wanietu en taku śica wanunyakapi iyececa.
- 16 Niohan kin nitaokiye wanyagwicaya wo ;
Qa iye cinca kin, nitowitan kin.
- 17 Qa Jehowa Wakantanka unkitawapi
Towašte kin unkicipi un nunwe ;
Qa unnapepi ohan kin unkiciyusuta miye ;
Han, unnapepi ohan kin yuecetu wo.

PSALM 91.

- 1 Iyotan Wankan un toinahbe kin en,
Tuwe iyotanke cin he,
Iyotan Waśaka ohanzi tawa ihukuya iwanke kta.
- 2 Jehowa hewakiye kta ;
Wowinape mitawa, qa conkaśke mitawa,
Mita Wakantanka, he wacinwaye kta ce.
- 3 Wahmung ye cin wohmunke tawa kin
Etanhan, iye eniyaku kta ;
Makośica waihangye cin etanhan.
- 4 Iye śun kin on akahpenicaton kta ;
Qa tahupahu ihukuya wowinape iyeyaye kta ;
Towicake kin wahacanka qa maza makuakahpe.
- 5 Hanyetu wokokipe kin he koyakipe kte śni ;
Qa anpetu en wanhinkpe kinyan iyaye cin ;
- 6 Makośica otpaza en omani un ;
Qa wowayazan wiyotadhan eca wayutakuniśni kin.
- 7 Nicahda kektopawinge hinhpayapi kta ;
Qa nietapa ekta kektopawinge wikcemna ;
Tuka niye nikiyedani u kte śni.

- 8 Niišta ecedan on ekta eyatonwe kta ;
Qa wicašta śica tokiconpi kin wandake kta.
- 9 Jehowa, wowinape mitawa kin he niye :
Iyotan Wankan kin he otipi nicicaga :
- 10 Heon taku śica nihyahde kte śni ;
Qa makośica wan nitawakeya ikiyedan u kte śni.
- 11 Taohnihde kin niye on wahowicaye kta ;
Nitacanku owasin en awanniyakapi kta ;
- 12 Napapi ohna niyuhapi kta ;
Hecen inyan siha ibonito kte śni.
- 13 Mnaja qa wamduška si ayahde kta ;
Mnaja koška qa sintehda kin amayani kta.
- 14 Iye cantomahnaka, unkan ewehdaku kta ;
Micaje sdonye cin on wankan ewehde kta.
- 15 Hoyemakiye kta, kinhan amdupte kta :
Woiyokiśica en kici waun :
Ewehdaku qa mduonihan kta :
- 16 Anpetu hanskaska on imnawaye kta ;
Qa wiconi mitawa wanyagwakiye kta.

PSALM 92.

Anpetu wakan on woyatan odowan.

- 1 Jehowa yatanpi kin he wašte ;
Qa nicaje idowanpi kin, Iyotan Wankan yaun.
- 2 Hanhanna eca nitowaonśida oyakapi ;
Qa nitowicake, hanyetu kin en.
- 3 Candowankiyapi ikan wikcemna, qa cancega on ;
Cotanke on awacinpi kin he nakun.
- 4 Jehowa, niohan kin on iyuśkinmayaya ;
Ninape ohan kin on imduśkin kta.
- 5 Jehowa, niohan tanka hinca ;
Nitawacin kin temahentu hinca.
- 6 Wicašta wacintonśni kin he sdonye kte śni ;
Qa witkotkoke cin he de okahnige kte śni.
- 7 Wicašta śica peji iyecen icagapi ;
Qa woahani econpi kin owasin hca ayapi ;
Owihanke wanica yutakunipi kte śni heon.

- 8 Tuka, Jehowa owihanke wanica,
Iyotan Wankan kin he niye.
- 9 Iho, Jehowa, tokaniyanpi kin ,
Iho, tona tokaniyanpi kin atakunipi kte śni :
Woahtani econpi kin owasin enanakiya iyewicayapi kta.
- 10 Tuka tinta tatanka he kin iyecen,
He mitawa icahyaya :
Wihdi to on sdamayanpi.
- 11 Nakun tokamayanpi kin miišta wanwicayake kta ;
Tona wicohan śica econpi takpe maupi kin
Hena on minoge nahon kta.
- 12 Wicašta owotanna kin wazi can iyecen uye kta ;
Lebanon hante kin iyecen icage kta.
- 13 Jehowa ti kin en huhdepi ;
Wakantanka unkitawapi tahocoka ohna hcapi kta :
- 14 Pa skapi hehanyan waskuyeca icahyapi kta ;
Cepapi kta, qa toto unpi kta.
- 15 Jehowa ecetu kin he oyakapi kta ;
He imnija mitawa, qa woowotanua śni takudan en un śni.

PSALM 93.

- 1 Jehowa wicaštayatapi, wowitan kohdaka ;
Jehowa wowaśake kohdaka, ipiyagkiton ;
Nakun maka kin ehdepi, hecen yuhohopi kte śni.
- 2 Wanakajatanhan oiyotanke nitawa yusutapi ;
Niye otokahe niwanica.
- 3 Mini tanka kin wankan iyeiçiya ;
Jehowa, mini tanka kin ho hdawankan iyeya ;
Mini tanka kin taja wankan iyeya.
- 4 Mini ota ho kin isanpa ;
Miniwanca taja tanka kin isanpa ;
Jehowa wankan un kin he waśaka.
- 5 Taku odake cin hena wicakapi hinca ;
Wowakan yati kin oiyokipi ;
Jehowa, anpetu hanskaska hehanyan.

PSALM 94.

- 1 Jehowa, watokiçon Wakantanka ;
Watokiçon Wakantanka, iyoyanpa wo.
- 2 Maka Wayaco yaun, najin wo ;
Wahanhaniçidapi kin towicakiçon wo.
- 3 Jehowa, wicašta śica tohanyan kta he ;
Tohanyan wicašta śica iwakicipi kta he.
- 4 Iwaśicunpi, taku śica eyapi ;
Woahtani econpi kin owasin ihdatanpi.
- 5 Jehowa, nitaoyate wicakapanpi ;
Qa taku nitawa kakiśyapi ece.
- 6 Wiwazica qa tuwe oyate tokeca etanhan tewicayapi ;
Qa wamdenica kin tin wicaktepi.
- 7 Tuka heyapi ; Jah wanyake kte śni ;
Qa Jakob ta Wakantanka awacin kte śni ce.
- 8 Oyate en wacintonśni yaunpi, awacin po ;
Qa winitkotkokapi, tohan wacinksamya niohanpi kta he.
- 9 Tuwe wicanoge kage cin he wanahon kte śni he :
Qa tuwe wicašta kage cin he wawanyake kte śni he.
- 10 Tuwe oyatepi iyopewicaye cin he wicakaštate kte śni he :
Tuwe wicašta waonspewicakiye cin.
- 11 Wicašta tawacinpi kin Jehowa sdonya ece ;
Hena taku śni.
- 12 Jah, wicašta iyopeyaye cin he cante wašte ;
Qa nitoope eciyatanhan onspeyakiye cin :
- 13 Anpetu śice cin etanhan ozikiye yaye kta ;
Wicašta śica woħa wan wicakicapi kta hehanyan.
- 14 Jehowa taoyate kin awicayuŝtan kte śni ;
Qa taku tawa kin ehpekiye kte śni.
- 15 Tuka woyaco woowotanna en hdi kta ;
Qa tona cante ecetu kin owasin he pasipi kta.
- 16 Śicaya econpi kin on tuwe mici najin kta he ;
Woahtani econpi kin on tuwe micica kta he.
- 17 Jehowa omakiye śni unkanś,
Ecadan minagi woinina en un kta tuka.
- 18 Misiha naśduta ce, epe cinhan ;
Jehowa, nitowaonśida najin makiye kta.
- 19 Miye mahen mitawacin iyokiśica ota icunhan,
Wacintonhnake nitawa minagi iyuśkinkiye kta.
- 20 Woahtani oiyyotanke kin he nicica kta he ;

- Wicohan síca wope iyecen konze cin he.
- 21 Wicašta owotanna nagi kin takpe hipi ;
Qa wicawe taku iyaonpepica šni kin he yacopi.
- 22 Tuka Jehowa conkaške mitawa kin hee ;
Qa mita Wakantanka imnija wowinape waye.
- 23 Unkan iye wahtanipi kin iyahdewicaya ;
Qa taku síca econpi kin en ihangwicaye kta ;
Jehowa Wakantanka unkitawapi ihangwicaye kta.

PSALM 95.

- 1 U miye, Jehowa unkahiyayapi kte ;
Wiconi unkitawapi Imnija kin unkidowanpi kte.
- 2 Wopida yuha iye ite kin en unkupi kte ;
Wowiyuškin odowan on unkiyašapi kta.
- 3 Jehowa Taku Wakan Tanka ;
Qa taku wakan owasin iwankan Wicaštayatapi tanka.
- 4 Maka ošbe kin hena iye nape ohna hduha ;
Qa paha ipa kin hena iye tawa.
- 5 Miniwanca kin he tawa, qa iye kaga ;
Nakun maka puze cin he iye nape kaga.
- 6 U miye, patuš inaunjinpi qa ohoundapi kte ;
Jehowa Waicahye unkitawapi kin itokam,
Canpeška makehde unkanpi kte.
- 7 Wakantanka unkitawapi kin he iye ;
Qa makoce tawa oyate kin unkiyepi ;
Qa iye nape ohna tahin wanunyanpi kin :
Anpetu kin de iye ho kin nayahonpi kta hecinhan ;
- 8 Meribah iyecen cante hdutehipi šni po ;
Makoskan Massa anpetu kin iyececa.
- 9 Hunkakewicayayapi imayutanpi qehan ;
Imayukcanpi, nakun miohan wanyakapi.
- 10 Waniyetu wikcemna topa hehanyan wicoicage kin he iyokišinmayan ;
Unkan hepe ; Oyate kin de cante ekta nunipi ;
Qa mitacanku sdonyapi šni.
- 11 Hecen canmaniyen konza kewicawakiya ;
Woozi mitawa kin en opapi kte šni.

PSALM 96.

- 1 Jehowa odowan teca wan kahiyaya po ;
Maka kin ocowasin, Jehowa idowan po.
- 2 Jehowa kahiyaya po, iye caje yawašte po ;
Anpetu otoiyohi waniwicakiye cin he yaotanin po.
- 3 Ikcewicašta kin ehna iye towitan oyaka po ;
Oyate owasin en iye ohan wakan kin.
- 4 Jehowa tanka, qa nina yatanpi kte ;
Taku wakan owasin isanpa kokipapi kta iyececa.
- 5 Ikcewicašta taku wakan yuhapi kin owasin taku šni ;
Tuka Jehowa mahpiya kin kaga.
- 6 Iye itokam woyuonihan qa wowitan ;
Tipi wakan tawa ohna, wowašake qa wowašte.
- 7 Jehowa qu miye, oyate wicowazipi kin,
Wowitan qa wowašake Jehowa qu miye.
- 8 Iye caje towitan kin Jehowa kicu po ;
Wopida wošna wan icupi qa tahocoka kin en u po.
- 9 Wowakan oiyokipi kin en Jehowa ohoda po ;
Iye itokam, maka kin ocowasin, inihan miye.
- 10 Oyatepi ehna, Jehowa Wicaštayatapi ce, eya po ;
Nakun maka kin ehdepi, yuhohopi kte šni :
Oyate kin woecetu eciyatanhan wicayaco kta.
- 11 Mahpiya kin iyuškin, qa maka kin pida nunwe ;
Miniwanca qa wojudan kin hotanin nunwe.
- 12 Maga kin iyuškin kte, qa taku ohna un kin owasin ;
Hehan contanka can owasin wiyuškinyan dowan kta :
- 13 Jehowa itokam : He wanna u ;
Maka kin hdaco u ce :
Woowotanna on wicoicage kin yaco kta ;
Qa oyate kin, iye towicake eciyatanhan.

PSALM 97.

- 1 Jehowa Wicaštayatapi, maka kin iyuškin kte ;
Wita ota hince cin hena pidapi nunwe.
- 2 Ihdukšan mahpiya šapa qa otpaza ;
Oiyotanke tawa woowotanna qa woyaco akan han.
- 3 Iye ite kin itokam peta iyaya ;
Qa ihdukšan tokayapi kin hušnahwicaye kta.

- 4 Wakanhdi tawa makoce kin iyoyamya ;
Maka kin wanyaka qa cancan.
- 5 Jehowa itokam paha kin cansin iyecen sdoiyapi ;
Maka ocowasin Itancan tawa kin itokam.
- 6 Mahpiya kin hena iye toowotanna yuotaninpi ;
Qa oyate owasin iye towitan wanyakapi.
- 7 Tona okagapi wan okiyapi kin owasin istecapi kte ;
Tona takusni on ihdatanpi kin hena :
Iye en patuja po, taku wakan owasin.
- 8 Zion he nahon qa iyuskin ;
Qa Juda cunwintku wowiyuskin on iyasapi :
Jehowa, nitawoyaco kin hena on.
- 9 Niye, Jehowa, maka owancaya Iyotan Wankan yaun ;
Taku wakan owasin iwankam tehanwankantu.
- 10 Jehowa wasteyadakapi, taku sica sicedaka po ;
Wicashta wacantkiye tawa nagipi kin awanwicayaka ;
Wicashta sica napepi etanhan wicayukce kta.
- 11 Wicashta owotanna kin iyoyanpa owicakicijupi ;
Qa wowiyuskin, tona cante ecetupi kin on.
- 12 Owotanna yaunpi kin, Jehowa en iyuskin po ;
Qa iye towakan kiksuyapi kin he yatan miye.

PSALM 98.

Odowan.

- 1 Odowan teca wan Jehowa kahiyaya po ;
Wicohan wakan kin heca econ ece :
Nape etapa qa isto wakan kin on woohiye icicaga.
- 2 Jehowa wiconi tawa kin hduotanin :
Ikcewicashtha ista kin en toowotanna hduzamni.
- 3 Iye towaonsida qa towicake kin kiksuya,
Israel tiyohnaka kin on ;
Wakantanka unkitawapi waniwicakiye cin,
Maka ihanke kin owasin wanyakapi.
- 4 Maka kin ocowasin, Jehowa kahiyaya po ;
Iyasapi qa wiyuskinpi qa dowan po.
- 5 Candowankiyapi on Jehowa kahiyaya po ;
Candowankiyapi qa odowan ho kin on.

- 6 Mazayahotonpi tanka qa cotanka ho kin on,
 Jehowa Wicaštayatapi kin itokam iyaša po.
- 7 Miniwanca kin sa nunwe, qa wojudan kin ;
 Maka kin, qa tona en ounyanpi nakun.
- 8 Wakpa kin nape hdaskapapi nunwe ;
 Qa paha kin witaya iyuškinpi kte ;
- 9 Jehowa itokam :
 He maka kin hdaco u ce ;
 Woowotanna on wicoicage kin hdaco kta ;
 Qa oyatepi kin, wokonze eciyatanhan.

PSALM 99.

- 1 Jehowa Wicaštayatapi, oyate kin cancanpi ;
 Kerubim otahedan iyotanka, maka kin škanškan.
- 2 Zion en Jehowa tanka ;
 Qa oyate owasin iwankam tehanwankan yanka.
- 3 Nicaje tanka qa wowinihan kin he yatanpi kte ;
 He Wakan hinca.
- 4 Unkan wicaštayatapi towašake kin woyaco waštedaka ;
 Niye wicoecetu yahdusuta ;
 Jakob en woyaco qa woowotanna yakaga.
- 5 Jehowa Wakantanka unkitawapi yatanka po ;
 Qa iye siha oahe kin en makata ehpeiçiya po :
 Iye Wakan hinca heon.
- 6 Moses qa Aaron, wawayušna tawa kin ehna ;
 Qa Samuel tona caje hoyekiyapi kin om ;
 Hena Jehowa hoyekiyapi, unkan iye awicayupta ece.
- 7 Małpiya bosdata kin en owawicakiye :
 Woyaotanin tawa kin opapi, qa wokage wicaqu kin.
- 8 Jehowa Wakantanka unkitawapi, niye awicayadupte ;
 Iyotan Wašaka, niye wicayecicajuju ;
 Tuka wahtanipi kin hena towicayeciçon.
- 9 Jehowa Wakantanka unkitawapi yatanka po ;
 Qa iye paha wakan tawa kin ohna patuja po ;
 Jehowa Wakantanka unkitawapi kin he wakan nakaes.

PSALM 100.

Odowan wan. Wopida eyapi kta.

- 1 Maka kin ocowasin, Jehowa iyaśa miye.
- 2 Wowiyuśkin on Jehowa okiya po ;
Itokam dowanwan u miye.
- 3 Jehowa he Wakantanka e sonya po :
Iye unkagapi, qa unkiye unkićicagapi śni :
Taoyate qa tahnca tinta tawa kin en
Hena unkiyepi.
- 4 Tatiyopa kin en wopida eya u po ,
Woyatan yuha iye tahocoka ohna u miye ;
Wopida eciya miye ;
Iye caje kin yawašte po.
- 5 Jehowa wašte, towaonśida kin owihanke śni ;
Qa towicake kin he wicoicage qa wicoicage hehanyan.

PSALM 101.

Dawid tadowan.

- 1 Woweonśida qa woyaco on wadowan kta ;
Jehowa, niye icidowan kta.
- 2 Canku yuśtanpi wan ohna wacin waksape kta :
Tohan en mayahi kta he :
Cante ocowasin hduha wati ohna mawani kta.
- 3 Miiśta itokam wicoie śica ewehnake kte śni ;
Taku śica econpi kin hena śice wadaka ;
Miye en amaskape kte śni.
- 4 Wicacante pemni kin he amayuśtan kta ;
Taku śica sdonwakiye kte śni.
- 5 Tuwe takodaku nahmana aie cin he ihangwaye kta :
Tuwe iśta tanka qa wahanićida kin iyowinwakiye kte śni.
- 6 Makoce en tona wicakapi kin miiśta awicatonwan ;
Hena mici unpi kta ;
Tuwe canku yuśtanpi omani kin he omakiye kta.
- 7 Tuwe wohnyan econ kin he wati en onunye kte śni ;
Tuwe itonśni kin he miiśta itokam yanke kte śni.
- 8 Hanhanna eca, makoce kin en, tona śicapi
Owasin ihangwicawaye kta ;

Hecen Jehowa totonwe kin etanhan,
Tona sícaya econpi kin owasin ehpewicawaye kta.

PSALM 102.

Wocekiye wan. Tuwe iyotanhan iyekiye, kakija qa Jehowa itokam waśicahowaye cin he
tawa.

- 1 Jehowa, wocekiye mitawa nahon wo ;
Qa houwaye cin he en niu nunwe.
- 2 Niite anamakihibe śni wo ;
Makakija anpetu kin en anohmakiya wo ;
Houwaye anpetu kin en amayupta inahni wo.
- 3 Mitaanpetu kin śota iyaya ;
Qa mahuhu can śeca iyecen itkon.
- 4 Micante peji iyecen śniśyapi qa pus aya ;
Aguyapi hduta awektonja :
- 5 Waśicahowamda ho kin on,
Micehpi kin mahuhu en askapa.
- 6 Tinta mdega wan iyemaceca ;
Hinhankaga otiwota en iyecen waun.
- 7 Kiktahan waun, qa zitkadan wan
Tice ekta isnana un kin iyemaceca.
- 8 Anpetu osan tokamayanpi kin iyopemayanpi ;
Tona canniyemayanpi kin hena ośtemahdapi ece.
- 9 Aguyapi iyecen cahota wata ;
Qa wamdatke cin he ceyapi kici icahiwaya ;
- 10 Wośinhda qa wocanniye nitawa kin on etanhan :
Yuwankan imayacu qa ehpeamayaye cin heon.
- 11 Mitaanpetu ohanzi takinyan ye cin iyececa ;
Qa miye qe peji iyecen maśnija.
- 12 Tuka niye, Jehowa, owihanke wanin idotanke kta ;
Qa wokiksuye nitawa kin he wicoicage qa wicoicage hehanyan.
- 13 Niye nayajin kta, Zion onśiyakida kta ;
Tohan okiyapi kta wanna iyehantu,
Han, tohan iyehantu hince cinhan :
- 14 Tohan inyan tawa kin nitaokiye waśtedakapi ;
Qa watuśekśeca on iyokipipi kinhan.
- 15 Unkan Ikcewicaśta Jehowa caje kin kokipapi kta ;

- Qa nitowitan kin, maka wicaŕtayatapi owasin.
- 16 Jehowa Zion kage cin heon ;
Iye towitan en ihdutanin.
- 17 Onŕike tawocekiye ekta ihduhomni ;
Qa wocekiye tawapi kin ŕicedake ŕni.
- 18 Wicoicage u kte cin on de owapi kta ;
Qa oyate wan icage kte cin he Jah yatanpi kta.
- 19 Towakan paha kin etanhan eyokasin ;
Jehowa mahpiya etanhan maka kin ahitonwan ;
- 20 Kaŕka unpi comnihdazipi kin nahon kta ;
Wiconŕe cinca kin wicakiyukce kta.
- 21 Zion en Jehowa caje kin oyakapi kta ;
Qa iye yatanpi kin, Jerusalem en :
- 22 Oyatepi witaya mniciyapi kin en ;
Qa wokiconze kin, Jehowa ohodapi kta.
- 23 Canku ohna mitowaŕake kin kun ehpeya ;
Mitaanpetu kin yuptecedan.
- 24 Mita Wakantanka, mitaanpetu cokaya en, emayaku ŕni wo, epe kta :
Waniyetu nitawa wicoicage wicoicage hehanyan.
- 25 Otokahe ekta maka kin sutaya eyahde ;
Qa ninape taku kage cin mahpiya kin hee.
- 26 Hena awihnuni kta, tuka niye yani kta ;
Qa hena owasin ŕina iyecen kuke kta ;
Wokoyake iyecen hena dutokeca kta ;
Unkan yutokecapi kta.
- 27 Tuka he niye,
Qa waniyetu nitawa owihanke kte sni.
- 28 Nitaokiyeye cinca kin ounyanpi kte :
Qa iye cincapi kin nitokam wicayusutapi kte.

PSALM 103.

Dawid tawa.

- 1 Minagi, Jehowa yawaŕte wo ;
Qa taku mahen maun kin owasin, iye caje wakan kin.
- 2 Minagi, Jehowa yawaŕte wo ;
Qa taku waŕte econ kin owasin akiktonje ŕni wo.
- 3 He wayahtani owasin nicicajuju ;

- Waniyazan kin iyuhpa asniniyan :
- 4 Wicotakunišni etanhan nitaniya opekiton ;
Wowaonšida qa wocantekiye on watešdagnicaton.
 - 5 Taku wašte on nitaanpetu ojudan ya ;
Hecen koniška ihduteca, wamdi iyececa.
 - 6 Jehowa woowotanna ece econ,
Qa woyaco, tona kakišwicayapi owasin on.
 - 7 Iye tacanku kin Moses sdonyekiya;
Qa Israel cinca, iye ohan tanka kin.
 - 8 Jehowa wacantkiye ça waonšida ;
Tehan canteptanye šni, qa wawacinkta yuza tanka.
 - 9 Ohinniyan wicakige kte šni ;
Qa owihanke wanin canniye wicaye kte šni.
 - 10 Waunhtanipi kin iyecen ecaunkiconpi šni ;
Qa taku šica unkitawapi iyecen unqupi šni.
 - 11 Mašpiya kin maka iwankam tehanwankantu kin,
He iyecen iye towaonšida tona kokipapi kin iwankam wašake hinca.
 - 12 Wiyohiyanpa etanhan wiyohpeyata hehanyan ;
Ihehanyan waunhtanipi kin yutokan ehpeunkiciciyapi
 - 13 Ateyapi wan iye cinca onšiwicakida kin iyececa,
Jehowa tona kokipapi kin onšiwicakida ece.
 - 14 Token unkiagapi kin he sdonya ;
Maka mdu heuncapi he kiksuya.
 - 15 Wicašta taanpetu kin hena wato iyececa ;
Tinta wahca kin he iyecen hca aya :
 - 16 Tate oniya wan iwankam iyaya,
Unkan en un šni ;
Qa tohe kin icimana sdonkiye kte šni.
 - 17 Tuka Jehowa towaonšida otokahe wanica,
Qa owihanke wanice kta, tona kokipapi kin on ;
Qa toowotanna kin cincapi sanpa cincapi kin en :
 - 18 Tona wicotakuye tawa kiciyuhapi ;
Qa tawoahope econpi kta on kiksuyapi kin hena.
 - 19 Jehowa mašpiya kin en oiyotanke ekihde ;
Qa tokiconze kin taku owasin wowidagya.
 - 20 Ohnihde wakan tawa, Jehowa yawašte po ;
Wowašake itancanpi, iye oie ecen ecanonpi ;
Iye oie ho kin anayagoptanpi kta.
 - 21 Taobe kin owasin, Jehowa yawašte po ;

Taokiyenyanpi, iye tawacin ecen ecanonpi.
22 Taku kage cin owasin, Jehowa yawašte wo ;
Tokiconze owanka kin owasin ohna :
Minagi, Jehowa yawašte wo.

PSALM 104.

1 Minagi, Jehowa yawašte ye :
Jehowa, mita Wakantanka, niye nitanka hinca :
Woyuonihan qa wotanka koyahdaka.
2 Šina wan iyecen iyoyanpa hdoin :
Ozanpi wan iyecen mašpiya kin hdumdaya.
3 Mini tanka on tipi içicaga ;
Mašpiya šapa kin canpahmihma ya ;
Tate hupahu kin on icimani ece.
4 Tateyanpa kin hena ohnihde wicakaga ;
Peta ide kin taokiye ya ece.
5 Maka kin tohe akan sutaya ehde ;
Hecen owihanke wanica yutokanpi kte šni.
6 Miniwanca on wokoyake iyecen ayakahpa ;
Mini tanka kin paha iwankam hiyeya.
7 Yakišica hehan najicapi ;
Wakinyan nitawa hoton kin on napapi.
8 Paha iyecen wankan yapi ;
Kaksiza iyecen kun ipi ;
Owanka kin de yecage cin ekta.
9 Oicago wan yakaga, sanpa yapi kte šni ;
Ake maka kin apašbog hiyu kte šni.
10 Kaksiza kin en minihdoka inanpe ya ;
Hena paha kin otahedan kaduza ece.
11 Tinta wamanica owasin etanhan mini yatkanpi :
Hen šonšonna itu unpi kin ipuza enakiyapi.
12 Iwankam mašpiya okinyanpi kin otipi ;
Can adetka ehna hotonpi ece.
13 Wankan tipi tawa etanhan he kin amagajuya :
Niohan etanhan taku icage cin on maka kin imnahan
14 Wato kin he woteca icašwicakiciya ;
Qa waskuyeca, wicašta woju kin on ;
Hecen maka kin etanhan aguyapi hinanpe ye kta.

- 15 Qa miniśa wicaśta cante iyuśkinkiya,
Wihdi isanpa ite kin iyehkiye kta ;
Qa aguyapi wicacante yusuta ece kin he.
- 16 Jehowa can tawa kin imnahan ;
Lebanon hante iye oju kin hena.
- 17 Hena en zitkadan hoĥpi kagapi ;
Hoka wacantkiye cin he wazi en otipi.
- 18 He tehanwankantu kin tatokadan tawapi ;
Qa imnija kin hitunkasan wowinape yapi.
- 19 Makoncage on hanyetu wi kin kicaga :
Anpetu wi tohan iyaye kte cin he sdonkiya.
- 20 Otpaza yakaga, unkan ecen hanyetu ;
Hehan contanka wamanica owasin hinanpapi.
- 21 Mnaja cinca taku iyahpayapi kta ahotonpi ;
Qa Wakantanka woyute kidapi ece.
- 22 Wi hinanpa, hehan witaya hdipi ;
Qa waśunpi kin en hdiwankapi ece.
- 23 Hehan wicaśta wicohtani ekta ya ;
Qa htayetu hehanyan wicoĥan econ ece.
- 24 Jehowa, nioĥan kin hena ota ĥinca ;
Woksape on hena owasin yakaga :
Wowijice nitawa on maka kin ojudan.
- 25 Miniwanca kin de tanka qa oĥdakinyan hanska ;
Hen taku śkanśkan yukan, qa yawapica śni ;
Taku niyake un cikciśtinna tankinyanyan koya.
- 26 He ohna wita wata kin ohnihdapi :
Unkteĥi kin de ohna śkate kta yakaga.
- 27 Hena owasin niye wacinniyampi :
Tohan iyehantu eca woyute wicayaqu ece kta.
- 28 Niye wawicayaqu, hena pahipi ;
Ninape yahdumdaya, taku waśte on imnanpi ece.
- 29 Niye niite nayakihbe, hena nihinciyapi :
Woniya ewicayeciyaku, hena tapi ;
Qa maka mdu ekta hdapi.
- 30 Nitaniya yeyaśi, hena icagapi :
Qa makoce ite kin duteca ece.
- 31 Jehowa towitan kin owihanke wanice kte :
Jehowa iye oĥan kin on ihduśkin nunwe.
- 32 He maka kin en etonwan, unkan cancan :

- Paha kin yutan, unkan hena izitapi.
- 33 Tohanyan wani kin Jehowa iwadowan kta ;
Waun kin hehanyan mita Wakantanka wakahimdamde kta.
- 34 Iye awacin waun kin he skuye kta :
Jehowa en imduŕkin kta.
- 35 Wahtanipi sa maka kin etanhan owihankepi kta ;
Qa wicaŕta ŕica icimana en unpi kte ŕni.
Minagi, Jehowa yawaŕte wo.
Jah yatan miye.

PSALM 105.

- 1 Jehowa wopida eciya po,
Iye caje hoyekiya miye ;
Iye ohan tanka oyatepi ehna oyaka po.
- 2 Iye idowan po, odowan kahiyaya miye ;
Iye tawowapetokeca kin owasin awacin po.
- 3 Iye caje wakan kin itan miye ;
Tona Jehowa akitapi kin hena cante waŕtepi kta.
- 4 Jehowa ode miye, qa iye towaŕake kin ;
Ohinniyan ite kin akita miye.
- 5 Wicohan wakan econ qon hena kiksuya po ;
Iye tawowapetokeca, qa woyaco iye i kin etanhan.
- 6 Abraham iye taokiye etanhan micagapi ;
Jakob cinca wicakahnige ciqon.
- 7 Jehowa Wakantanka unkitawapi kin he iye ;
Tawoyaco kin maka kin owancaya un.
- 8 Wicotakuye tawa kin he ohinniyan kiksuya ;
Wicoie econ wicaŕi qon, wicoicage kektopawinge hehanyan :
- 9 Abraham kici hduŕtan qon he ;
Qa Isaak en wokonze eciya :
- 10 Nakun Jakob he wokage kiciyusuta ;
Israel en wicotakuye owihanke wanica.
- 11 Niye Kanaan makoce kin ciŕu kta,
Makoce iyutapi nitawapi kta ce, eya.
- 12 Hinyaŕin wicayawapi waŕakadan ;
Tonana hinca, qa en unhdaka unpi.
- 13 Qa oyate kin wicehna ihdaka yapi ;
Wokiconze wan etanhan oyate tokeca ekta.

- 14 Tuwedan kakišwicaya iyowinkiye šni ;
Qa iyepi on wicaštayatapi iyopewicaya :
- 15 Sdawicawakiye cin hena owicayutanpi šni po ;
Qa waayate mitawa taku šica ecawicakiconpi šni po.
- 16 Hehan makoce kin he en wicaakihan wan u ší ;
Aguyapi sagye kin owasin kaksa.
- 17 Wicitokam wicašta wan ye ší ;
Joseph wowidake kta e wiyopeyapi :
- 18 Wicaške on siha kiunniyanpi ;
Iye nagi mazasapa kin en u.
- 19 Oie kin he ecetu hehanyan,
Jehowa taku eye ciqon he iyutanye.
- 20 Wicaštayatapi kin he ye wicaši, qa kiyukca ;
Oyatepi itancan kin hee, qa kiciyuhdoka.
- 21 Iye ti kin ohna itancan kaga ;
Qa wowijice tawa kin owasin tawakiya.
- 22 Tohan iyokipi kinhan akicita tancan wicakaške kta ;
Qa hunkayapi wicayuhe cin ksapa wicakage kta.
- 23 Hehan Israel Egupta en ahiti ;
Qa Jakob Ham makoce kin en ounyan.
- 24 Unkan taoyate kin nina wicahduota ;
Qa tokayapi kin isanpa wicayuwašake.
- 25 Hehan cante wicayutokeca, taoyate šice wicadakapi kta ;
Taokiye wicaye cin hnayan wicakuwapi kta.
- 26 Moses iye taokiye kin ye ší ;
Qa Aaron kahnige ciqon he.
- 27 Iye tawowapetokeca oie kin wicakipazopi :
Qa tohan wakan, Ham makoce kin en.
- 28 Otpaza ye ší, qa otpaza kaga ;
Unkan iye oie kin kizapi šni.
- 29 Mini tawapi kin he we kaga ;
Qa hogan tawapi kin wicakte.
- 30 Makoce tawapi hnaška ota icaħya ;
Wicaštayatapi yuhapi wankan tipi kin ohna.
- 31 Ecen eya, unkan hoponkadan hiyupi ;
Qa heya, makoce tawapi owancaya.
- 32 Magaju kte cin he wasu wicaqu ;
Peta ide kin makoce tawapi owancaya.
- 33 Hastanyanka iyuwi qa suken can tawapi kin hena apa ;

- Qa tamakocepi ihdukšan can kin kawega.
- 34 Ecen eya, unkan psipsicadan tanka hiyupi ;
Psipsicadan nakun, qa hena yawapica śni :
- 35 Qa tamakocepi kin en wato owasin yaśdapi ;
Qa tamagapi en taku icage cin temyapi.
- 36 Nakun tamakocepi en tona tokapapi owasin wicakte ;
Iye towaśakepi tokaheya icage cin owasin.
- 37 Hehan mazaska mazaskazi ko yuha hinapewicaya :
Unkan wicowazi tawa kin en wanjidan hustake śni.
- 38 Iyayapi qehan Egupta iyuśkin :
Nina kowicakipapi, heon etanhan.
- 39 Woakahpe kta on mahpiya śapa hdumdaya ;
Qa peta wan, hanyetu en iyojanjan kta.
- 40 Kidapi, unkan wakiyedani u wicakiya :
Qa mahpiya aguyapi on imnawicaya.
- 41 Imnija wan kahdoka, unkan mini hiyu ;
Hopuza en wakpa wan hiyaya.
- 42 Iye oie wakan qon he kiksuya heon ;
Taokiye Abraham taku eciye ciqon.
- 43 Qa iye taoyate iyuśkinyan hinanpe wicaya ;
Tona wicakahnige cin hena iyakiśapi.
- 44 Qa makoce Ikcewicaśta tawapi qon he wicaqu :
Unkan oyatepi htanipi qon he yuhapi.
- 45 Hecen iye tawoahope kin opapi kta ;
Qa toope kin hena yuhapi kta.
Jah yatan miye.

PSALM 106.

- 1 Jah yatan miye.
Jehowa wopida eciya po ;
Iye waśte, heon etanhan ;
Qa towaonśida kin owihanke wanica.
- 2 Jehowa tohan tanka kin tuwe oyake kta he ;
Iye yatanpi ocowasin tuwe nahonwicaye kta he.
- 3 Tona wokonze opapi kin hena cante waśtepi ;
Tuwe ohinniyann woowotanna econ kin.
- 4 Jehowa, nitaoyate cantewicayakiye cin iyecen miksuya ye ;
Nitowiconi kin hiyumakiya wo.

- 5 Tona yakahniga wowašte yuhapi kin wanmdake kta ;
Nitaoyate wiyuśkinpi kin on imduśkin kta ;
Woaihpeye nitawa kin en wowitan miçiye kta.
- 6 Hunkakewicunyanpi om waunhtanipi ;
Pemniyan unkohanyanpi, śicaya econkupi.
- 7 Egupta en niohan wakan kin
Hunkakewicunyanpi okahnigapi śni ;
Nitowaonśida untkana kin kiksuyapi śni ;
Tuka wawakipajinpi, mde kin ekta, Mde Śa kin en.
- 8 Heca ešta iye caje kin on niwicakiya ;
Towaśake sdonyewicakiye kta e heon.
- 9 Nakun Mde Śa kin kiśica, unkan pus aya ;
Hecen ośbe kin ehna iyaye wicaya, hopuza iyececa.
- 10 Qa waśicedake nape kin etanhan ewicayaku ;
Qa toka nape kin etanhan opewicakiton.
- 11 Unkan tokawicayapi kin mini awicakahpa ;
Etanhan wanjidan ešta okaptapi śni.
- 12 Hehan oie kin wicadapi ;
Iye yatanpi kin ahiyayapi.
- 13 Koyahanna iye ohan kin akiktonjapi ;
Iye tawawahokonkiye kin akipepi śni.
- 14 Tuka hewotahedan wocantiheye wan cantiheyapi ;
Qa hopuza en Wakantanka iyutanpi.
- 15 Unkan taku kidapi qon he awicayupta ;
Tuka wicotamaheca nagipi en ye śi.
- 16 Nakun otiwita en Moses inakiwizipi ;
Qa Aaron, Jehowa yuwakan kin he.
- 17 Hehan maka kin ihduhdoka, qa Dathan napca ;
Qa Abiram tona om un ko awicakahpa.
- 18 Unkan ośpaye kin hena peta wicahuhnaga ;
Ide wan śicapi kin hena huhnahwicaya.
- 19 Horeb en ptejicadan wan kagapi ;
Qa taku śdoya kagapi kin itokam patujapi.
- 20 Hecen iye towitanpi kin hdutokecapi,
Tatanka wato yute cin ouncage iyececa.
- 21 Wakantanka niwicaye ciqon he akiktonjapi ;
Egupta en wicohan tanka econ qon :
- 22 Wowapetokeca Ham makoce kin en ;

- Mde Śa ekta taku wowinihan.
- 23 Hehan ihangwicaye kta, keya ;
Moses iye kahnige ciqon he itokam,
Otahedan najin śni unkanś ;
Tocanniye yutokan iyeye kta, on waihangye kte śni.
- 24 Qa makoce wiciyokipi kin he aktapi śni ;
Iye oie kin wicadapi śni :
- 25 Tuka tawakeyapi ohna wihnupi ;
Jehowa ho kin he anagoptanpi śni.
- 26 Hehan hena on nape hdugata ;
Tintoskan ihpaye wicakiye kta :
- 27 Qa cincapi oyatepi wicehna hinhpaye wicaye kta ;
Qa makoce tokeca ekta iyewicaye kta.
- 28 Unkan Baal Peor en ikoyagiçiyapi ;
Qa tapi taku wakiyuśnapi kin yutapi.
- 29 Hecen taku śica econpi kin on iyokiśinyapi :
Unkan makośica iyowicahpaya.
- 30 Hehan Phinehas inajin qa wayaco :
Unkan makośica kin anaptapi.
- 31 Unkan he woowotanna kiciyawapi ;
Wicoicage qa wicoicage ekta owihanke wanica.
- 32 Nakun Woakinica mini kin ekta śihdayapi :
Hecen iyepi on Moses taku śica akipa :
- 33 Iye taniya kin kipajinpi :
Unkan iha on ecinśniyan ia.
- 34 Oyatepi kin ihangwicayapi śni ;
Jehowa kewicakiye ciqon iyececa.
- 35 Tuka oyatepi kin om icicahiyapi,
Qa wicohan tawapi onspeiçiyapi :
- 36 Qa wakagapi tawapi ohodapi ;
Unkan hena e wohmunke yapi kin ee.
- 37 Han, cinhintkupi qa cunwintkupi kin,
Taku wakan śica wawicakiyuśnapi.
- 38 Hecen wicawe taku iyaonpepicaśni papsonpi,
Cinhintkupi qa cunwintkupi we kin,
He Kanaan wakagapi kin wawicakiyuśnapi ;
Hecen makoce kin wicawe on yuśapapi.
- 39 Nakun iye ohanpi kin on ihduśicapi ;
Qa śicaya econpi kin on wawicihahapi içicagapi.

- 40 Unkan Jehowa iye taoyate canniyewicaya ;
Qa woaihpeye tawa kin wahtekida sni.
- 41 Hehan Ikcewicašta napepi kin en wicaqu .
Unkan tona śicewicadapi kin hena wowidake wicayapi :
- 42 Qa tokawicayapi kin śicaya wicakuwapi :
Hecen napepi kin ihukuya patujapi.
- 43 Iye ijehan wicakiyukca ;
Tuka wakiconzapi on kipajinpi ;
Hecen wahtanipi kin on atakunipi sni.
- 44 Tuka iyokiśicapi kin he wanyaka,
Śicahowayapi nahon qehan.
- 45 Qa iyepi on wicotakuye tawa kin he kiksuya ;
Qa towaonśida untkanna on tawacin hdutokeca.
- 46 Qa wayaka wicayuhapi owasin itokam,
Hena onśiwicadapi kta wicaqu.
- 47 Jehowa Wakantanka unkitawapi, niunkiya po ;
Qa Ikcewicašta etanhan ake unhduwitaya po :
Nicaje wakan kin unyatanpi kta ;
Nitowitan kin en unkihdatanpi kta.
- 48 Jehowa Israel ta Wakantanka kin yawaštepi nunwe ;
Otokahe wanintanhan qa owihanke wanica.
Unkan wicašta owasin, Amen, eyapi.
Jah yatan miye.

PSALM 107.

- 1 Jehowa wopida eciya po, iye wašte kin heon ;
Towaonśida kin he owihanke wanica :
- 2 Tona Jehowa opewicakiton kin hena eyapi kta ;
Tona toka nape kin etanhan opewicakiton kin.
- 3 Qa makoce tokeca etanhan wicahduwitaya ;
Wiyohianpa tanhan qa wiyohpeya tanhan,
Waziyatanhan qa miniwanca etanhan.
- 4 Makoskan onunipi, hewoskan canku ohna ;
Otonwe en ounyanpi kte cin iyeyapi sni.
- 5 Wotektehdapi, nakun ipuzapi ;
Tanmahen tanhan nagipi hanyanpi.
- 6 Hehan iyokiśicapi en Jehowa hoyekiyapi :

- Unkan wicokakije etanhan ewicayaku ;
- 7 Qa canku owotanna ohna cankuye wicaya ;
Otonwe en ounyanpi kta he ekta yapi kta.
- 8 Jehowa wopida eciyapi kte,
Iye towaonśida kin on,
Qa wowapetokeca Adam cinca ecawicakicon kin hena on.
- 9 Wicanagi cantokpani kin he immaya ece ;
Qa nagi wotektehda kin he taku wašte on ojuya.
- 10 Tona otpaza qa wiconṭe ohanzi en iyotankapi ;
Wokakije mazasapa ko on wicakaśkapi :
- 11 Hena Iyotan Waśaka oie kin kipajinpi ;
Qa Iyotan Wankan tawowahokonkiye kin aktapi śni :
- 12 Hecen wicohtani on cante onśika wicakaga :
Hicahanpi qa waokiye wanica.
- 13 Hehan iyokiśicapi en Jehowa hoyekiyapi :
Unkan wicokakije etanhan ewicayaku :
- 14 Otpaza qa wiconṭe ohanzi etanhan iwicacu ;
Qa on wicakaśkapi kin hena yuksa.
- 15 Jehowa wopida eciyapi kta, towaonśida kin on ;
Qa wowapetokeca Adam cinca ecawicakicon kin hena on :
- 16 Mazaśa tiyopa kin kaptuptuja heon ;
Qa mazasapa inatake kin kaksaksa.
- 17 Witkotkopi kin, wahtanipi canku kin on,
Qa taku śica econpi kin on, kakiśiṭiyapi.
- 18 Iye nagipi woyute owasin hitihdapi ;
Qa wiconṭe tiyopa kin ikiyedani yapi.
- 19 Hehan iyokiśicapi en Jehowa hoyekiyapi :
Unkan wicokakije etanhan ewicayaku :
- 20 Iye oie kin ukiye ṭa asniwicaya ;
Qa wicotakuniśni etanhan hdinanpe wicaya.
- 21 Jehowa wopida eciyapi kte, towaonśida kin on,
Qa wowapetokeca Adam cinca ecawicakicon kin hena on :
- 22 Qa wopida wośnapi wayuśnapi kte ;
Qa dowanpi on iye ohan kin oyakapi kte.
- 23 Tona miniwanca ekta wita wata ohna yapi,
Qa mini ota kin ohna wicohan econpi kin ;
- 24 Hena Jehowa ohan kin wanyakapi ;
Qa ośbe kin en wowapetokeca econ kin.
- 25 Hehan ecen eya, unkan tate wohitika wan uye ;

- Qa taja kin wankan icu.
- 26 Mahpiya ekta wankan yapi ;
Kuya wošbe kin ekta ipi ;
Šicaya unpi kin on nagipi nihinciyapi.
- 27 Ithomnipi qa kacegya manipi, witkopi iyececa ;
Qa wacinksapapi qon iyuhpa taninšni iyaya.
- 28 Hehan iyokišicapi en Jehowa hoyekiyapi ;
Unkan wokakije etanhan hinanpe wicaya.
- 29 Tate wohitika qon he amdakedan kaga :
Unkan taja tawapi kin inina hiyeya.
- 30 Hehan owanji yukanpi on pidapi :
Hecen oihunni cinpi qon en awicahi.
- 31 Jehowa wopida eciyapi kte, towaonšida kin on ;
Qa wowapetokeca Adam cinca ecawicakicon kin hena on.
- 32 Nakun oyate mniciyapi kin en yatankapi kte ;
Qa hunkayapi omniciye kin en idowanpi kte.
- 33 Wakpadan kin hena tintoskan ee kiya ;
Qa minihdoka kin hopuza kaga :
- 34 Waskuyeca makoce wan miniskuya icu kiya ;
Tona en ounyanpi šicaya econpi kin he on.
- 35 Tintoskan kin he miniyowe kiya ;
Qa hopuza kin he minihdoka eepi kaga :
- 36 Qa hen wotektehdapi kin ewicahnaka ;
Unkan otonwe en ounyanpi kte cin he kagapi :
- 37 Qa maga ojupi, qa hastanyanka iyuwi huhdepi ;
Qa woicage waskuyeca icaŋyapi.
- 38 Nakun wicayawašte, hecen nina ihduotapi ;
Qa tawanuyanpi kin wicayutonna šni.
- 39 Hena wanistinna ayapi qa patuš unpi tuka qon ;
Wokakije, wowayazan qa woiyokišice kin on.
- 40 Wicaštayatapi wowahteda šni wicakaga ;
Qa canku codan makoskan onuniwicaya.
- 41 Tuka wahpanicapi kin wokakije etanhan ewicayaku ;
Qa optaye iyececa wicowazi wicakaga.
- 42 Wicašta ecetupi wanyakapi qa iyuškinpi kta ;
Qa woahtani owasin iohmus icu kta.
- 43 Tona wacinksapapi qa dena awacinpi kinhan,
Hena Jehowa towaonšida kin iyukcanpi kta.

PSALM 108.

Psalm odowan. David tawa.

- 1 Wakantanka, micante wiyeya un ;
Wadowan qa mdatan kta, mitowitan kin he on.
- 2 Cotanka candowankiyapi ko kikta miye ;
Miye qe anpao kin mduhice kta.
- 3 Jehowa, oyatepi ehna ciyatan kta ;
Oyate kin en ciyaonihan kta.
- 4 Maḥpiya iwankapatanhan nitowaonśida kin tanka ;
Qa nitowicake kin maḥpiya śapa iyahde.
- 5 Wakantanka, maḥpiya isanpa niyawankantuyapi nunwe ;
Qa maka kin ocowasin iwankam nitowitan.
- 6 Waśtewicayadake cin hena ewicayakupi kta,
Heon ninape etapa on niunkiyapi qa unkayupta po.
- 7 Wakantanka iye towitan en wohdaka ;
Wimduśkin kta ; Śekem wapamni kta ;
Sukoth kaksiza kin imdute kta ce.
- 8 Gilead he mitawa, Manassa mitawa ;
Ephraim nakun mapa wowaśake kin ;
Juda woope kaga mitawa kin hee :
- 9 Moab woyujaja koka mitawa kin hee ;
Edom akan mitahanpe ehpewaye kta ;
Philistia on wimduśkin kta.
- 10 Tuwe otonwe aconkaśkapi kin en amaye kta he ;
Tuwe Edom en amai kta he.
- 11 Wakantanka ehpeunyanpi qon hee kte śni he ;
Qa Wakantanka ozuye unkitawapi om ye śni qon.
- 12 Toka kin etanhan ounkiya miye :
Wicaśta akantu waehdakupi kin he taku śni.
- 13 Wakantanka eciyatanhan wowaśake unkicagapi kta ;
Qa iye tokaunyanpi kin nawicapce kta.

PSALM 109.

Dowan itancan kin kicagapi. Dawid tadowan.

- 1 Wakantanka mdatan ece kin,

- Inina yanke ūni ye.
- 2 Wicai ūca qa wicai wahnayan amahdukawapi ;
Wicaceji itonūni on amaiapi.
 - 3 Nakun ūcedakapi wicoie on aohdudemayanpi ;
Qa taku on etanhan ūni makizapi.
 - 4 Wacanwakiye cin on toka mayanpi ;
Tuka miye qe wocekiye en waun.
 - 5 Waūte on taku ūca iyamaonpapi ;
Qa woūcedake, wocantekiye kin on.
 - 6 Wicaūta ūca wan iye awanyagkiya wo ;
Qa etapa eciyatanhan Satan inajin nunwe.
 - 7 Tohan yacopi kinhan ūca yawapi kte ;
Qa tawocekiye kin he woahtani kte.
 - 8 Anpetu tawa kin tonnana kte ;
Qa toawanyake kin tuwe tokeca icu kte.
 - 9 Cinca kin wamdenicapi kta ;
Qa tawicu kin wiwazice kta.
 - 10 Qa cinca kin onuniyan unpi qa wo dapi nunwe ;
Qa tihuha kin ehna waakitapi kte.
 - 11 Taku tawa kin owasin icazokiye cin he iyahpaye kte ;
Qa tohtani kin oyate tokeca kipi kte.
 - 12 Tuwedan katinyan onūkida kte ūni ;
Qa wamdenica tawa kin tuwedan cantewicakiye kte ūni.
 - 13 Tona etanhan icage cin hena awihnunipi kte ;
Wicoicage iyokihe en cajepi pajujupi nunwe.
 - 14 Iye atewicaye wahtanipi kin Jehowa kiksuye kte ;
Qa hunku taku ūca econ kin he kajujupi ūni nunwe.
 - 15 Hena ohinniyan Jehowa itokam wanke kte ;
Hecen kiksuyapi kin maka kin etanhan icu kte.
 - 16 Iye wowaonūda econ kta kiksuye ūni heon ;
Nakun wicaūta onūka qa wahpanica kin ūcaya kuwa ;
Qa wanji cante kaūjapi kin kte kta tuka.
 - 17 Tuka wayaūcapi kin he waūtedaka, hecen akipa ;
Qa wayawaūtepi kin he waūtedake ūni, hecen he itehan iyeyapi.
 - 18 Unkan wokoyake iyecen wayaūcapi kohdaka ;
Hecen mini iyecen tan mahen hiyu ;
Qa wihdi iyecen huhu kin en hiyohi.
 - 19 Wokoyake un kin he iyecen kohdake kta ;
Qa ipiyaka iyececa ohinniyan ipiyagkiton kte.

- 20 Tona tokamayanpi Jehowa etanhan wokajuju tawapi kin dee ;
Qa tona minagi taku síca eciyapi kin hena.
- 21 Tuka niye, Jehowa, Itancan,
Nicaje eciyatanhan ecamicon wo ;
Nitowaonśida wašte, heon makiyuśka wo.
- 22 Miye makakije ça onmaśika ;
Qa mahentanhan cante mapahdokapi.
- 23 Ohanzi wan takinyan ye cin iyecen mataninśni.
Qa psipsicadan iyecen kaham iyemayanpi.
- 24 Akihanpi on hupahu wamaśake śni ;
Qa śin manica on michepi son aya.
- 25 Nakun miye wowihahamayanpi ;
Wanmayakapi, pomnamnamakiyapi.
- 26 Jehowa, Wakantanka mitawa, omakiya wo ;
Nitowaonśida eciyatanhan nimayan wo.
- 27 Unkan ninape kin he dee sdonyapi kta ;
Jehowa niye hecanon kin.
- 28 Hena wayaśicapi kta, tuka niye wadawašte kta :
Hena najinpi qa ístecapi kta ;
Tuka nitaokiye iyuśkin kta.
- 29 Tona tokamayanpi wonihinciye koyakapi kta ;
Qa wowištece kin he śina iyecen inpi kta.
- 30 Mii on Jehowa nina wopida ewakiye kta ;
Qa wicota ehna, mdatan kta.
- 31 Iye wicašta onśike cin etapa eciyatanhan najin kta ;
Tona nagi yacopi kin etanhan eyaku kta.

PSALM 110.

Dawid tadowan.

- 1 Jehowa Itancan mitawa kin heciya ;
Mietapa ekta iyotanka wo,
Tona tokaniyanpi siha oahde nitawa wakage kta hehanyan.
- 2 Nitowaśake icapsinte kin Jehowa Zion etanhan hiyuye kta :
Tokaniyanpi kin cokaya wicaštayatapi yanka wo.
- 3 Nitowaśake anpetu kin en, nitaoyate waihduśnapi,
Wowakan wiciyokipi kin on ;
Anpao tamni kin etanhan,

- Koniśka cu kin he yahduha.
- 4 Jehowa wakonza, qa tawacin hdutokeca kte śni ;
Niye wawayuśna owihanke wanica henica kta,
Melkizedek touncage kin eciyatanhan.
- 5 Itancan kin nietapa ekta yanke cin,
Iye tocanniye anpetu kin en,
Wicaśtayatapi katpa iyewicaya.
- 6 Ikcewicaśta ehna wayaco kta ;
Wicaśta tapi on ojuya ;
Maka ohdakinyan hehanyan pa wicakahuge.
- 7 Canku ohna minihdoka kin etanhan yatke kta :
Heon etanhan pa yuwankan icu kta.

PSALM 111.

- 1 Jah yatan miye.
Micante ocowasin on Jehowa mdatan kta ,
Wicaśta ecetu takodakiciyapi qa omniciye kin en.
- 2 Jehowa ohan kin hena tankinyanyan ;
Tona iyokipipi owasin hena akitapi ece.
- 3 Iye ohan kin woyuonihan qa wotanka ;
Qa toowotanna kin owihanke wanica.
- 4 Iye ohan wakan kin wokiksuye kicaga :
Jehowa waonśida qa wacantkiya.
- 5 Tona kokipapi kin woyute wicaqu ;
Wicotakuye tawa kin ohinniyan kiksuye kta.
- 6 Iye tohtani wowaśake kin taoyate owicakiyaka ;
Ikcewicaśta tamakoce kin wicaqu kta.
- 7 Iye nape taku econ kin hena wowicake qa wokonze :
Tawawahokonkiye kin owasin wicakapi :
- 8 Owihanke wanica hehanyan yusutapi ;
Wowicake qa woowotanna on econpi.
- 9 Iye taoyate woehdaku wicaqu ;
Wicotakuye tawa kin owihankeśniyan hdusuta :
Iye caje kin wakan qa wokokipe.
- 10 Woksape otokahe Jehowa kokipapi kin hee ;
Tona heconpi kin hena owasin wayupikapi :
Iye yatanpi kin he owihanke wanice kta.

PSALM 112.

- 1 Jah yatan miye.
Wicašta Jehowa kokipe cin he cante wašte ;
Tawoahope kin on iyuškin hinca.
- 2 Iye cinca maka akan wašakapi kta ;
Tona ecetupi wicoicage kin he yawaštepi kta.
- 3 Woyuha qa wowijice iye ti kin ohna ;
Qa toowotanna kin owihanke wanice kta.
- 4 Otpaza en wicašta ecetu iyoyanpa awicahinanpa ;
Waonšida qa wacantkiya qa owotanna.
- 5 Wicašta wacantkiye ça wawicaqu kin he wašte ;
He wokonze on tohan kin hduštan kta.
- 6 Awicakehan ohinniyan yuhohopi kte šni :
Wicašta owotanna kin owihankešniyan kiksuyapi kta.
- 7 Taku šica nahonpi kin on kopehda kte šni ;
Cante yusutapi, Jehowa wacinyan un.
- 8 Iye cante kin yusutapi, wakokipe kte šni ;
Tokawicaya awicatonwe kte cin hehanyan.
- 9 Ituwicakihan, wahpanicapi taku wicaqu ;
Toowotanna kin owihanke wanice kta :
Iye he kin wowitan on wankan un kta.
- 10 Wicašta šice cin he wanyake ça šinhda kta ;
Hi hdakinskinze ça skan kta :
Wicašta šica taku cin kin he awihunni kta.

PSALM 113.

- 1 Jah yatan miye.
Yatan po, Jehowa taokiye kin ;
Jehowa caje kin he yatan miye.
- 2 Jehowa caje kin yawaštepi nunwe ;
Detanhan qa owihanke wanica.
- 3 Wi hinanpe cin hetanhan, iyaye cin hehanyan,
Jehowa caje kin yatanpi nunwe.
- 4 Jehowa tehan wankan un, oyate owasin iwankam ;
Iye towitan mahpiya kin iwankam.
- 5 Jehowa Wakantanka unkitawapi,
Tehanwankantu kiyotanke cin he tuwe iyececa he :

- 6 Temahentuya etonwe cin hee ;
Maḥpiya en qa maka kin en.
- 7 Wahpanica kin watuśekśeca etanhan eyaku ;
Onśike cin tacesdi paha kin etanhan yuwatikan eyaku kta ;
- 8 Wicaśta itancanpi kin om iyotanke kiye kta ;
Iye taoyate itancanpi kin om.
- 9 Winohinca cinca ton śni ti kin
He iyuśkinyan cinca hduha iyotanke kiya.
Jah yatan miye.

PSALM 114.

- 1 Israel Egupta etanhan hinanpe çehan ;
Jakob ti kin oyate wan śa iapi kin hetanhan ;
- 2 Juda he tipi wakan tawa kin icaga ;
Tokiconze kin Israel hee.
- 3 Mini tanka kin he wanyake çā najica ;
Jordan he nakun namni ;
- 4 Paha kin hena tamdoka iyecen ipsicapi ;
Qa pajodan kin tacinca kin iyececapi.
- 5 Mini tanka, tonikeca on nayajica he ;
Jordan, tokeca nayamni he.
- 6 Paha kin, tokeca tamdoka iyecen iyapsicapi he ;
Pajodan, tokeca tacinca iyenicecapi he.
- 7 Maka kin, Itancan kin itokam, cancan wo ;
Jakob ta Wakantanka kin itokam.
- 8 He imnija kin minihdoka kaga ;
Wanhi inyan kin he miniyowe ee kiya.

PSALM 115.

- 1 Unkiyepi śni, Jehowa, unkiyepi śni ;
Tuka nicaje wowitan qu wo ;
Nitowaonśida on, nitowicake kin on.
- 2 Tokeca Ikcewicaśta heyapi kta ;
Wanna Taku Wakan tawapi tokiya un he.
- 3 Tuka Wakantanka unkitawapi maḥpiya ekta yanka ;
Token iyokipi kin owasin econ ece.
- 4 Wakagapi tawapi kin hena mazaska qa mazaskazi ;

- Wicašta nape taku kage cin hena.
- 5 Hena i yukanpi, tuka iapi šni ;
Išta yukanpi, tuka wawanyakapi šni :
- 6 Noge yukanpi, tuka winahonpi šni ;
Poge yukanpi, tuka taku omnanpi šni :
- 7 Nape yukanpi, tuka wiyuzapi šni ;
Siha yukanpi, tuka manipi šni ;
Nakun dote eciyatanhan ho enapeyapi šni.
- 8 Tona kagapi kin hena ís iyececapí kta ;
Tona hena wacinyanpi kin owasin.
- 9 Israel, niye Jehowa wacinyan wo ;
Owicakiye ça wahacanka tawapi kin he iye.
- 10 Aaron ti kin, Jehowa wacinyan wo ;
Owicakiye ça wahacanka tawapi kin he iye.
- 11 Jehowa koyakipapi kin, Jehowa wacinyan po ;
Owicakiye ça wahacanka tawapi kin he iye.
- 12 Jehowa unkiye unkiksuyapi ; wayawašte kta ;
Israel ti kin wicayawašte kta ;
Aaron ti kin wicayawašte kta.
- 13 Tona Jehowa kokipapi kin hena wicayawašte kta ;
Cistinpidan tankinkinyanpi om.
- 14 Jehowa niyuotapi nunwe ;
Niyepi qa nakun nicincapi kin.
- 15 Jehowa eciyatanhan niyawaštepi ;
Małpiya qa maka kage cin hee.
- 16 Małpiya małpiya kin he Jehowa tawa ;
Tuka maka kin Adam cinca wicaqu.
- 17 Tona ɽapi kin hena Jah yatanpi šni ;
Tona woinina ekta yapi kin owasin nakun.
- 18 Tuka unkiye Jah unyawaštepi kta ;
Detanhan qa owihanke wanica.
Jah yatan miye.

PSALM 116.

- 1 Jehowa waštewadaka,
Miho qa mita wocekiye nahon kin heon.
- 2 Iye anohmakiye cin heon,
Mitaanpetu kin en, hoyewakiye kta.

- 3 Wiconṭe icaške kin aohdudemayan ;
Qa Hades wowayazan kin mayuze ;
Wokakije woiyokiśica ko iyewaye.
- 4 Hehan Jehowa caje kin hoyewakiye kta :
Jehowa, ceciciya ce, minagi ehdaku wo.
- 5 Jehowa wacantkiye ɕa owotanna ;
Qa Wakantanka unkitawapi kin he waonśida.
- 6 Jehowa ksapapi śni kin hena awanwicayaka :
Miye kun ehpemayanpi, unkan nimayan.
- 7 Minagi, woozi nitawa ekta hdicu wo ;
Jehowa tanyan ecanicon kin heon etanhan.
- 8 Niye wiconṭe etanhan minagi edaku ;
Miišta kin ceyapi etanhan,
Misiha hicahanpi etanhan edaku.
- 9 Jehowa itokam mawani kta,
Wiconi makoce kin en.
- 10 Wicawada, heon iwaa :
Nina makakija qon.
- 11 Nihinmiciye cin en hepa ;
Wicašta owasin itonpi śni ce.
- 12 Jehowa taku ota maqu kin,
Taku on wecicajuju kta he.
- 13 Wiconi miniyatke kin iwacu kta,
Qa Jehowa caje kin hoyewakiye kta.
- 14 Jehowa taku iwahowaye cin wecicajuju kta,
Iho, iye taoyate owasin wicitokam.
- 15 Tona wacantkiye tawa kin hena tapi kin
He Jehowa išta kin en tehika.
- 16 Tokin, Jehowa, nitaokiye miyen ;
Nitaokiye, nitaokiyewin cinhintku kin miyen :
Makaškapi kin mayakidukca.
- 17 Wopida wośna wan waciciyuśna kta ;
Qa Jehowa caje kin hoyewakiye kta :
- 18 Jehowa taku iwahowaye cin wecicajuju kta,
Iye taoyate owasin wicitokam :
- 19 Jehowa ti hocoka kin en ;
Jerusalem, niye cokaya.
Jah yatan miye.

PSALM 117.

- 1 Oyate owasin, Jehowa yatan miye ;
Wicašta hiyeye cin owasin, he idowan po.
- 2 Towaonśida kin unkiyepi en tanka hinca ;
Qa Jehowa towicake kin he owihanke wanica.
Jah yatan miye.

PSALM 118.

- 1 Jehowa wopida eciya po, iye wašte heon ;
Towaonśida kin he owihanke wanica.
- 2 Tokin Israel heyapin ;
Iye towaonśida kin he owihanke wanica.
- 3 Tokin Aaron ti kin heyapin ;
Iye towaonśida kin he owihanke wanica.
- 4 Tokin tona Jehowa kokipapi kin heyapin ;
Iye towaonśida kin he owihanke wanica ce.
- 5 Wokaške etanhan Jah hoyewakiya ;
Owanka tanka en Jah amayupta.
- 6 Jehowa mici un ; wakowakipe kte śni ;
Wicašta akantu taku ecamicon okihi he.
- 7 Jehowa mici un, tona omakiyapi kin ehna ;
Hecen tona śicemadapi kin awicawatonwe kta.
- 8 Jehowa wacinyanpi kin he wašte,
Wicašta wacinwicayapi kin isanpa.
- 9 Jehowa wacinyanpi kin he wašte ;
Wicaštayatapi wacinwicayapi kin isanpa.
- 10 Ikcewicašta owasin aohdudemayanpi ;
Tuka Jehowa caje kin on bawicawaške kta.
- 11 Aohdudemayanpi, han, aohdudemayanpi ;
Tuka Jehowa caje kin on bawicawaške kta.
- 12 Tuhmaga iyececa aohdudemayanpi ;
Wapepeka ide kin iyececa bowicasnipi ;
Tuka Jehowa caje kin on bawicawaške kta.
- 13 Wacayape, mahinhpaye kta on camayapa ;
Tuka Jehowa omakiya.
- 14 Mitowaśake qa mitadowan kin Jah hee ;
Nakun he wanikiya mitawa.

- 15 Wiconi qa wowiyuśkin ho kin he
Wicaśta owotanna tawakeya kin ohna :
Jehowa nape etapa kin he wowaśake kaga.
- 16 Jehowa nape etapa hduwankan icu ;
Jehowa nape etapa kin he wowaśake kaga.
- 17 Maṭe kte śni, tuka wani kta ;
Qa Jah ohan kin omdake kta.
- 18 Awicakehan Jah nina iyopemayan ;
Tuka wiconṭe ekta yemaye śni.
- 19 Woowotanna tiyopa kin makiyuhdoka ye ;
Hena ohna hibu kta, Jah wopida ewakiye kta.
- 20 Jehowa tatiyopa kin he dee ;
Ohna wicaśta owotanna tin hiyupi kta.
- 21 Amayadupta, heon wopida eciciye kta ;
Qa wiconi mitawa kin he niye.
- 22 Inyan wan ticagapi aktapi śni qon
He oise pa kin icaga ce :
- 23 He Jehowa eciyatanhan,
Qa unkiśtapi kin en taku wowinihan.
- 24 Jehowa anpetu kage cin he dee ;
En unkiyuśkinpi qa piundapi kta.
- 25 Ceunniciyapi, Jehowa, dehan niunkiya po ;
Ceunniciyapi, Jehowa, dehan wapi unyan po.
- 26 Tuwe Jehowa caje on u kin he yawaśtepi :
Jehowa ti kin etanhan unniyawaśtepi.
- 27 Jehowa Iyotan Waśaka qa iyoyanpa unqupi :
Wośnapi kin he haḥonta on kaśka po,
Owayuśna he kin en.
- 28 Iyotan Waśaka mitawa kin he niye,
Heon ciyatan kta ;
Wakantanka mitawa, icidowan kta.
- 29 Jehowa wopida eciya po ;
Iye waśte kin heon etanhan ;
Towaonśida kin he owihanke wanica.

PSALM 119.

ALEPH.

- 1 Canku ohna ecetupi kin hena cante waśtepi ;

- Tona Jehowa toope omanipi kin hena.
2 Tawoyaotanin opapi kin hena cante waštepi ;
Tona cante ocowasin on akitapi kin hena :
3 Nakun taku śica econpi śni ;
Tuka iye tacanku kin ohna manipi.
4 Woonspe nitawa yakonza ;
Awicakehan ounpapi kta e heon.
5 Tokin mitacanku yusutapin,
Wokage nitawa owape kta heon.
6 Hehan imaštece kte śni,
Nitawoahope owasin en ewatonwe cinhan.
7 Cante ecetu kin on wopida eciciye kta ;
Woyaco owotanna nitawa onmaspe kinhan.
8 Wokage nitawa owape kta ;
Tokin ocowasin ehpeamayaye śnin.

BETH.

- 9 Kośka wan taku on tacanku kpakinte kta,
Hecen nioie eciyatanhan hduhe kta he.
10 Micante ocowasin on acicita ;
Nitawoahope etanhan wanuni śni nunwe.
11 Taku ehe cin he cante mahen nawahman ;
Hecen wacicihtani kte śni.
12 Jehowa, niye niyawaštepi nunwe ;
Nitoope kin onspemakiya ye.
13 Nii wayaco kin owasin,
Hena miiha on omdaka.
14 Nitawoyaotanin canku kin ohna imduśkin ;
Wowijice owasin on iyececa.
15 Wowahokonkiye nitawa awacin waun kta ;
Qa nitacanku ekta ewatonwe kta.
16 Wokage nitawa en iyuśkin miçiye kta ;
Nioie kin awektonje kte śni.

GIMEL.

- 17 Nitaokiyeye miye wani kta maqu wo ;
Kinhan nioie awanmdake kta.
18 Išta mayukawa wo, kinhan ewatonwe kta ;
Nitoope eciyatanhan wicohan wakan.
19 Maka akan unhdaka waun :
Nitawoahope kin anamakiħbe śni wo.
20 Ohinniyan minagi nitawoyaco

- Cantokpani on kaśuśujapi.
- 21 Wahanhaniçidapi kin hena iyopewicayaya,
Wicayaśicapi kin ;
Hena nitawoahope etanhan nunipi.
- 22 Waaiapi qa śicedakapi kin yutokan iyemiciciya wo ;
Nitawoyaotanin awacanmi kin heon.
- 23 Wicaśta itancanpi nakun iyotankapi qa amaiapi :
Tuka nitaokiye wokage nitawa awacin yanka.
- 24 Nakun woayaotanin nitawa wowiyuśkin waye ;
Wicaśta waonspemakiye cin hena ee.
- DALETH.
- 25 Minagi maka mdu en askamiçiya :
Nioie eciyatanhan nimayan wo.
- 26 Mitacanku kin owahdaka ;
Unkan amayadupta ;
Wokage nitawa onspemakiya wo.
- 27 Nitawoonspe ocanku kin okahnihmayan ye ,
Kinhan niohan wakan kin awacanmi kta.
- 28 Woiyokiśica on minagi ceya un ;
Nioie eciyatanhan najin makiya wo.
- 29 Woitonśni canku kin yutokan iyemiciciya wo ;
Qa nitoope kin he ionśimakida ye.
- 30 Wowicake canku kin he wakahniga ;
Nitawoyaco kin hena mitokam ewahnaka.
- 31 Nitawoyaotanin sutaya mduza ;
Jehowa, iśtenmaye śni wo.
- 32 Nitawoahope canku kin ohna waimnanke kta ;
Cante mayakidutanka kta, heon etanhan.
- HE.
- 33 Jehowa, wokage nitawa canku ohna amayan wo ;
Kinhan, owihanke hehanyan owape kta.
- 34 Okahnihmayan wo, kinhan nitoope awacanmi kta ;
Qa cante ocowasin on owape kta.
- 35 Nitawoahope canku ohna mani mayan wo ;
He en wimduśkin ece.
- 36 Nitawoyaotanin ekta cante yemayan ye ;
Qa wowijice ekta śni.
- 37 Takuśni wanyakapi etanhan iśta mayuhomni wo :
Nitacanku ohna nimakiya wo.
- 38 Nitaokiye nioie kin kiciyusuta wo ;

He on konicipapi kta.

39 Wowištece mitawa kowakipe cin he miciyutokan wo ;
Woyaco nitawa kin wašte, heon etanhan.

40 Iho, nitawoonspe kin cantowakpani hinca ;
Nitoowotanna kin en nimayan wo.

VAU.

41 Nakun, Jehowa, nitocantekiye en mau nunwe ;
Nitowiconi, nioie kin eciyatanhan.

42 Hecen tuwe taku iyamaonpe cin amdupte kta ;
Nioie wacinwaye cin heon etanhan.

43 Nakun mii etanhan wowicake oie kin
Ocowasin ehdaku śni wo ;
Woyaco nitawa ape waun kin heon.

44 Hecen nitoope kin ohinniyan ahowape kta ;
Owihanke wanica, qa owihanke wanica.

45 Unkan makoce tanka wan omawani kta ;
Nitawowahokonkiye awakite cin heon.

46 Nakun wicaštayatapi wicitokam
Nitawoyaotanin caje mdate kta ;
Qa imaštece kte śni.

47 Nakun nitawoahope en iyuśkin miçiye kta ;
Hena waštewadake hinca.

48 Nitawoahope waštewadake cin hena on,
Nape wankan yewaye kta ;
Qa wokage nitawa awacin manke kta.

ZAIN.

49 Nioie kin nitaokiye kiciksuya wo ;
Wacinye mayakiye cin heon.

50 Makakija en wacintonhnagmaye cin he dee ;
Qa nioie kin he kinimakiya.

51 Wahaniçidapi kin hena nina imahahapi ;
Tuka nitoope amduştan śni.

52 Jehowa, nitawoyaco wanakaja kin hena weksuya ;
Qa cante wašte miçicaga.

53 Wicašta śicapi on nina śinwahda ;
Nitoope ehpeyapi kin heon.

54 Wokage nitawa odowan mitawa kin hee ;
Ounhdaka tipi mitawa ohna.

55 Jehowa, hanyetu icunhan nicaje weksuya ;
Qa nitoope ahowapa ece.

56 Nitawoonspe owape cin he on,
De mduha ece qon.

CETH.

57 Jehowa, taku mitawa kin he niye ;
Nioie kin mduhe kta, kepa.

58 Nitocantekiye micante ocowasin on awakita ;
Nioie eciyatanhan onśimakida wo.

59 Mitacanku kin awakicanmi ;
Qa nitawoyaotanin ekta misiha hdicu wakiya.

60 Woonspe nitawa mduhe kta e,
Heon inawahni qa mdutehan śni.

61 Wicaśta śica ikan tawapi mihduksan hiyeya ;
Tuka nitoope awektonje śni.

62 Ciyatan kta hanyecokaya imdotanke kta,
Nitoowotanna woyaco kin hena on.

63 Tona konicipapi kin owasin kodawicawaya ;
Qa tona nitawoonspe opapi kin hena.

64 Jehowa, nitowaonśida on maka kin ojudan ;
Wokage nitawa kin onspemakiya wo.

TETH.

65 Jehowa, nitaokiye taku wašte ecayecon,
Nioie kin eciyatanhan.

66 Wiyukcanpi wašte qa wookahnige onspemakiya wo ;
Nitawoahope wicawada kin heon.

67 Makakije śni he ehan wanuni ;
Tuka nakaha iyae cin he owape.

68 Niye niwašte qa taku wašte ecanon ece ;
Wokage nitawa onspemakiya wo.

69 Wahaniçidapi kin hena woitonśni amakagapi ;
Miye qe micante ocowasin on nitawoonspe kin owape kta.

70 Iye cantepi kin wasna iyecen cepa ;
Miye qe nitoope on imduśkin.

71 Kakiśmayanpi kin he wašte ;
He on wokage nitawa onspemiçiciye kta.

72 Nii woope kin he miciwašte,
Mazaska qa mazaskazi kektopawinge isanpa.

YOD.

73 Ninape makage ça icahmayan ;
Onspemakiya wo, kinhan nitawoahope onmaspe kta.

74 Tona konicipapi kin hena wanmayakapi qa wiyuśkinpi kta ;

- Nioie wacinwaye cin heon etanhan.
- 75 Jehowa, nitawoyaco kin hena woowotanna sdonwaya ;
Qa wowicake on kakiśmayaya.
- 76 Tokin nitowaonśida wacintonhnagmayen :
Nitaokiye taku eyakiye ciqon iyececa.
- 77 Wacanyakiye cin he mahiyohi kte, hecen wani kta ;
Nitoope kin he wowiyuśkinwaye, heon.
- 78 Wahaniçidapi kin ístecapi nunwe,
Woitonśni on mayapemnipi, heon :
Miye qe nitawoonspe awacin manke kta.
- 79 Tona konicipapi kin hena miye en maupi kte ;
Qa tona nitawoyaotanin sdonyapi kin hena.
- 80 Wokage nitawa en micante zanika un nunwe ;
Hecen imaštece kte śni.

KAPH.

- 81 Wiconi nitawa on minagi niyaśni iyaya ;
Nioie kin on ape waun.
- 82 Iyae cin on ísta manaka ;
Hecen, Tohan cante wašte mayakage kta he, epa.
- 83 Wojuha wan śota en un kin iyemaceca ;
Wokage nitawa kin hena awektonje śni.
- 84 Nitaokiye taanpetu kin tonakeca he ;
Tona śicaya makuwapi kin tohan wicadaco kta he.
- 85 Wahaniçidapi kin hena woħa miçapi ;
Hena nitoope kin eciyatanhan śni.
- 86 Nitawoahope kin owasin wowicake ;
Woitonśni on śicaya makuwapi ; niye omakiya wo.
- 87 Ísnikaeś makoce kin etanhan ihangmayanpi śni ;
Tuka nitawoonspe kin amduśtan śni.
- 88 Nitowaonśida eciyatanhan nimayan wo :
Kinhan nii taku yaotanin kin owape kta.

LAMED.

- 89 Jehowa, nioie owihanke wanica,
Maħpiya kin ekta yusutapi.
- 90 Wowicake nitawa kin he wicoicage qa wicoicage hehanyan :
Maka kin dusuta, unkan ecen han.
- 91 Nitawoyaco on anpetu kin dehan hena ecen un ;
Hena owasin wowidagyaye cin heon.
- 92 Nitoope kin he wowiyuśkinwaye śni unkanś,
Makakije cin en matakuni kte śni tuka.

- 93 Nitawoonspe kin ohinniyan awektonje kte śni ;
Hena en kinimayakiya nakaes̄.
94 Tawamayaya, nimayan wo ;
Nitawoonspe kin awakite cin heon.
95 Wicaśta śica ihangmayan iyapepi ;
Nitawoyaotanin kin hena owakahnige kta.
96 Woecetu kin owasin ihanke kin wanmdaka ;
Nitawoahope ohdakinyan tanka hinca.

MEM.

- 97 Nitoope waśtewadake hinca :
Anpetu osan he awacin manka.
98 Nitawoahope ksapa makaga,
Tokamayanpi kin isanpa ;
He ohinniyan mitawa nakaes̄.
99 Waonspemakiyapi owasin isanpa,
Wacinksamya miohan ;
Nitawoyaotanin kin hena awacin waun.
100 Wicahincapi kin isanpa wowakahniga ;
Nitawoonspe wapatan kin heon.
101 Canku śica owasin etanhan misiha ewehdaku ;
Nioie mduhe kta heon etanhan.
102 Nitawoyaco kin icunonpa mde śni ;
Niye onspemayakiye cin heon.
103 Micaka en nioie kin skuye hinca ;
Tuhmaga canhanpi mii kin ohna he isanpa.
104 Wowahokonkiye nitawa etanhan wookahniga mduha ;
Heon woitonśni canku owasin śice wadaka.

NUN.

- 105 Nioie misiha kin en petijanjan hee ;
Qa mitacanku ohna iyoyanpa kin.
106 Wakonza, nakun ecen ecamon kta ;
Woyaco owotanna nitawa kin ahowape kta.
107 Miye nina hin makakija ;
Jehowa, nioie eciyatanhan kinimayan wo.
108 Jehowa ceciciya, mii taku itunicihan kin
Hena iyonicipi nunwe ;
Qa nitawoyaco kin hena onspemakiya wo.
109 Minagi ohinniyan minape ohna yanka ;
Tuka nitoope kin he awektonje śni.

- 110 Wicašta śica mahmunkapi kta ;
Tuka nitawoonspe etanhan wanuni śni.
- 111 Nitawoyaotanin kin hena ohinniyan mitawa kta ;
Micante towiyuśkin kin hena ee.
- 112 Wokage nitawa ecamon kta e cante ekta yewaye ;
Ohinniyan qa owihanketa hehayan.
SAMEK.
- 113 Tona cante nonpa kin hena śicewadaka ;
Tuka nitoope kin he waštewadaka.
- 114 Wowinape mitawa qa wahacanka mitawa kin he niye ;
Nioie kin he ape manka.
- 115 Śicaya ecanonpi kin, micuni po :
Kinhan mita Wakantanka tawoahope kin wapatan kta.
- 116 Wahomayaye cin eciyatanhan najin makiya wo ;
Kinhan wani kta ;
Qa wacinwaye cin on imaštece kte śni.
- 117 Sutaya mayuza wo, kinhan tanyan waun kta ;
Qa ohinniyan wokage nitawa en ewatonwe kta.
- 118 Tona wokage nitawa etanhan nunipi kin
Hena owasin wahtewicayada śni ;
Wohnaye tawapi kin he wowištece.
- 119 Ginginca iyececa, maka akan
Wicašta śica owasin ihangwicayaya ;
Heon nitawoyaotanin kin hena waštewadaka.
- 120 Kocicipe cin heon micehpi cancan ;
Qa nitawoyaco kin hena kowakipa
AYIN.
- 121 Woyaco qa woowotanna ecamon ece ;
Tehiya makuwapi kin en ehpemaye śni wo.
- 122 Taku wašte on nitaokiye acakśin wo ;
Wahaniçidapi kin hena makiyuśepi śni nunwe
- 123 Nitowiconi kin on išta mamdeze śni ;
Qa nakun nitoowotanna oie kin on.
- 124 Nitocantekiye eciyatanhan nitaokiye ecakicon wo ;
Qa wokage nitawa onspemakiya wo.
- 125 Nitaokiye kin he miye, waokahnihmayan wo ;
Qa nitawoyaotanin kin sdonyemakiya wo.
- 126 Jehowa wanna ohanye kta iyececa ;
Nitoope kin kicaksapi heon.
- 127 Heon etanhan nitawoahope waštewadaka ;

- Mazaskazi isanpa, han mazaskazi hinca.
- 128 Heon etanhan nitawoonspe owasin owotanna wadaka
 Woitonśni canku otoyohi śicewadaka
 PE.
- 129 Nitawoyaotanin kin hena wowinihan ;
 Heon etanhan minagi hena ahopa.
- 130 Nioie yuzamnipi kin he iyoyamya ece ;
 Tona wacinton śni kin hena wokahnihwicaya.
- 131 Mii wahdukawa qa niya śni maṭa nun seca ;
 Nitawoahope cantowakpani, heon etanhan.
- 132 Miye ekta ihduhomni qa cantemakiya wo :
 Tona nicaje waśtedakapi kin iyececa.
- 133 Nioie kin on mioye kin yasuta wo ;
 Qa taku śica takudan wowidagmaye śni nunwe.
- 134 Wicaśta wakakiśye cin etanhan opemakiton wo ;
 Hecen nitawoonspe kin ahowape kta.
- 135 Niite kin nitaokiye aojanjanya wo ,
 Qa wokage nitawa onspemakiya ye.
- 136 Miiśta etanhan mini wakpadan kaduza ;
 Nitoope opapi śni kin heon etanhan.
 TSADI.
- 137 Jehowa, niye oniwotanna ;
 Qa nitawoyaco kin hena ecetu.
- 138 Nitawoyaotanin kin woowotanna eyehde,
 Qa wowicake hinca.
- 139 Wacantawahde kin he mahdusota ;
 Tokamayanpi nioie akiktonjapi kin heon.
- 140 Nioie kin ecedan hinca ;
 Heon nitaokiye he waśtedaka.
- 141 Miye macistinna qa wahtemadapi śni ;
 Tuka nitawoonspe awektonje śni.
- 142 Nitoowotanna kin he woowotanna owihanke śni ;
 Qa nitoope kin he wowicake.
- 143 Wonihinciye qa wokakije mayuzapi ;
 Nitawoahope kin hena wowiyuśkinwaye.
- 144 Nitawoyaotanin kin ohinniyan owotanna ;
 Okahnihmayan wo, kinhan wani kta.
 QOPH.
- 145 Micante ocowasin on hoyeciciya ;
 Jehowa amayupta wo ;

- Wokage nitawa kin hena owape kta.
- 146 Houciciya ce, nimayan wo ;
Kinhan nitawoyaotanin awacanmi kta.
- 147 Anpao kin en nitokam wau qa houciciya :
Nioie kin on ape waun.
- 148 Miišta hankiktapi kin kawicapa ;
Nioie kin awacanmi kta heon.
- 149 Nitocantekiye eciyatanhan ho namakihon wo ;
Jehowa, nitawoyaco kin on nimayan wo
- 150 Tona taku śica kuwapi kin hena kiyedan unpi ;
Tuka nitoope kin itehanyan unpi.
- 151 Jehowa, niye kiyedan yaun ;
Qa nitawoahope kin owasin wowicake.
- 152 Wanakajatanhan nitoope kin on sdonwaya ;
Hena otokahe wanin tanhan yahduŝtan.
REŚ.
- 153 Mitokakije wanyake a emayaku wo ;
Nitoope awektonje śni, heon etanhan.
- 154 Woakinica mitawa amicinica qa opemakiton wo ;
Nioie kin eciyatanhan nimayan wo.
- 155 Wanikiyapi kin he wicašta śica itehan un ;
Wokage nitawa odepi śni kin heon.
- 156 Jehowa, wocantekiye nitawa kin hena ota ;
Nitawoyaco kin on kinimakiya wo.
- 157 Śicaya makuwapi qa tokamayanpi kin hena otapi ;
Tuka nitawoyaotanin kin amduŝtan śni.
- 158 Wahtanipi sa wanwicamdaka qa wamayazan ;
Hena nioie opapi śni kin heon.
- 159 Jehowa, nitawoonspe waŝtewadake cin he wanyaka ye ;
Nitocantekiye eciyatanhan nimayan wo.
- 160 Nioie otokahe kin he wowicake ;
Qa nitoowotanna woyaco kin owasin owihanke wanica.
ŚIN.
- 161 Ituh wicašta itancanpi śicaya makuwapi ;
Tuka micante nioie kin kokipa.
- 162 Taku ehe cin on wimduŝkin ;
Tuwe woyuha tanka iyeye cin iyececa.
- 163 Woitonśni śicewadake a wahtewada śni ;
Nitoope kin he waŝtewadaka.
- 164 Anpetu eca śakowin akihde ciyatan ece ;

- Nitoowotanna woyaco kin hena on.
 165 Nitoope waštedakapi kin hena wookiye ota yuhapi ;
 Qa takudan ibowicato kte śni.
 166 Jehowa, nitowiconi kin ape waun ;
 Qa nitawoahope kin ecamon ece.
 167 Minagi nitawoyaotanin kin patan ;
 Qa hena nina waštewadaka ece.
 168 Nitawoonspe qa nitawoyaotanin kin mduha ;
 Miohan owasin nitokam hiyeye cin heon.
 TAU.
 169 Jehowa, waceye cin nitokam ikiyedana u nunwe ;
 Nioie eciyatanhan okahnihmayan wo.
 170 Mitawocekiye nitokam u nunwe ;
 Nioie kin on makiyuška wo.
 171 Miiha woyatan hiyuye kta ;
 Wokage nitawa onspemayakiye kta heon.
 172 Miceji iyae cin ayupta nunwe ;
 Nitawoahope kin owasin owotanna ce.
 173 Ninape omakiya un nunwe ;
 Nitawoonspe kin hena wakahniga heon.
 174 Jehowa, waniyakiye cin he cantowakpani ;
 Qa nitoope kin he wowiyuškinwaye.
 175 Minagi ni un nunwe, kinhan niyatan kta ;
 Qa nitawoyaco kin omakiya nunwe.
 176 Tahinca wan taniński iyecen wanuni ;
 Nitaokiye okide wo ;
 Nitawoahope awektonje śni, heon etanhan.

PSALM 120.

Oicimani odowan.

- 1 Makakija en Jehowa hoyewakiya :
Unkan iye amayupta.
- 2 Jehowa, woitonński iha etanhan minagi eyaku wo ;
Wohnayan ceji kin etanhan.
- 3 Taku niču kta he, wohmayan ceji kin ;
Qa taku sanpa yuhenicije kta he.
- 4 Wicašta wašaka tiwanhinkpe pe hinca,

- Genista petaga koya.
- 5 Hehehe, miye Mešek en ounwaye ;
Kedar tawakeyapi kin ohna wati.
 - 6 Tuwe wookiye sícedake cin he
Minagi wanna tehan kici ti.
 - 7 Miye wookiye wacin, tuka iwaa eca,
Hena e kicizapi kta.

PSALM 121.

Oicimani odowan.

- 1 Paha kin ekta miišta wankan yewaya :
Omakiyapi kin he tokiyatanhan u he.
- 2 Omakiyapi kin he Jehowa eciyatanhan,
Mahpiya maka ko kage cin he.
- 3 Nisiha naśdute kta iyowinkiye kte śni :
Tuwe awanniyake cin he ístinbe kte śni.
- 4 Iho, Israel Waawanyake tawa kin
He ħba kte śni qa ístinbe kte śni.
- 5 Waawanyake nitawa kin Jehowa hee ;
Nietapa ekta ahanziniye cin Jehowa hee.
- 6 Anpetu eca anpetu wi kin kiunniniye kte śni ;
Qa hanyetu wi kin, hanyetu icunhan.
- 7 Taku śica owasin etanhan Jehowa awanniyake kta ;
Ninagi awanyake kta.
- 8 Tankan de ça tin yahdi eca,
Jehowa awanniyake kta,
Detanhan qa owihanke wanica.

PSALM 122.

Oicimani odowan. Dawid tawa.

- 1 Jehowa ti kin ekta unyanpi kta ce,
Emakiyapi kin on imduşkin.
- 2 Jerusalem, nitat iyopa kin en
Unsihapi iyahanpi.
- 3 Otonwe wan icikoyagya he cin

- He iyececa Jerusalem kagapi.
- 4 Heciya wicowazipi wankan yapi ece ;
Jah tawicowazi kin, Israel yaotaninpi kta ;
Jehowa caje yatanpi kta heon.
- 5 Hen woyaco oiyotanke kin hdepi ;
Dawid tiyohnaka oiyotanke tawapi.
- 6 Jerusalem wookiye kin icekiya po ;
Tona waštenidapi kin hena wookiye yuhapi nunwe.
- 7 Wookiye conkaške nitawa mahen un nunwe ;
Qa woozi içiyapi tipi waštešte nitawa mahen.
- 8 Mihunkawanji qa mitakuye on,
Wookiye mahen niun nunwe, epe kta.
- 9 Jehowa Wakantanka unkitawapi ti kin on,
Tanyan yaun kta awakite kta.

PSALM 123.

Oicimani odowan.

- 1 Maḥpiya kin en yakidotanke cin
Niye ekta miišta wankan yewaye.
- 2 Wan, wicašta taokiye wicayuhapi napepi kin ekta išta yeyapi ;
Winyan taokiye yuhe cin nape ekta etonwan ece ;
He iyecen unkištapi
Jehowa Wakantanka unkitawapi ekta etonwanpi,
Onśiunkidapi kte cin hehanyan.
- 3 Onśiunkida po, Jehowa onśiunkida po ;
Wowahtedaśni on nina iunmnanpi ;
- 4 Tona owanji yukanpi kin hena
Wahtedapiśni on unnagipi imnan hinca ;
Wahaniçidapi wowahtedaśni kin he.

PSALM 124.

Oicimani odowan. Dawid tawa.

- 1 Jehowa unkicipi un śni unkanś ;
Hecen Israel eyapi kta ;
- 2 Unkicipi un kin Jehowa ee śni unkanś,

- Wicašta akantu anauntanpi qehan ;
3 Hehan niyake naunpcapi kta tuka,
Wocantahdeunyanpi ide qehan :
4 Hehan mini kin unkiwankam iyaye kta,
Wakpa wan unnagipi iwankam iyaye kta ;
5 Hehan unnagipi iwankam,
Mini ipiga kin iyaye kta tuka.
6 Iye hipi kin on unyahtakapi kta unqupi śni-
Heon Jehowa yawaštepi kte.
7 Unnagipi ihduške,
Zitkadan wan wicašta wahmunke etanhan he iyececa ;
On hmunkapi kin yuhdecapi,
Unkan unkiye unkiyucapi.
8 Ounkiyapi kin he Jehowa caje kin en un ;
Małpiya qa maka kage cin he.

PSALM 125.

Oicimani odowan.

- 1 Jehowa wacinyanpi kin hena,
Zion Paha kin iyececapi ;
Yuhohopi śni, ohinniyan han.
2 Paha kin Jerusalem ihdukšan hiyeya ;
Qa Jehowa iye taoyate wicihdukšan un,
Detanhan qa owihanke wanica.
3 Wicošice can sagye kin wicašta owotanna
Tamakoce kin akan wanke kte śni ;
Hecen wicašta owotanna taku śica
Ekta nape yeyapi kte śni.
4 Jehowa, tona wašte taku wašte ecakicon wo ;
Qa tona cante ecetu kin hena.
5 Tuka tona canku pemni ekta icunom yapi kin,
Hena wicohan śica econpi kin om Jehowa iyaye wicaye kta.
Israel wookiye kici un nunwe.

PSALM 126.

Oicimani odowan.

- 1 Zion hdicu kin en Jehowa ihdohdi qehan,
Wihanmnanpi kin iyeuncecapi.
- 2 Hehan ihapi on i unkojupidan ;
Qa uncejipi wowiyuŝkin on :
Hehan Ikcewicaŝta ehna heyapi ;
Jehowa taku tanka ecawicakicon ce.
- 3 Jehowa taku tanka ecaunkiconpi ;
On unkiye piundapi.
- 4 Jehowa, unhdicupi kin en ihdoku wo,
Itokah wakpadan kin iyececa.
- 5 Tona ceya wojupi kin
Hena wiyuŝkinyan wamnayanpi kta.
- 6 Ceya ye kta, wojupi opahte yuha ye kta ;
Wiyuŝkinyan ku kta,
Aguyapi pahtapi hduha ku kta.

PSALM 127.

Oicimani odowan. Solomon tawa.

- 1 Tipi kin Jehowa kage ŝni kinhan,
He en tona kagapi kin ituya ŝkanpi.
Jehowa otonwe kin awanyake ŝni kinhan,
Waawanyake kin ituya kiktahan un.
- 2 Ituh hanhanna hin yektapi ;
Tehan oziniçiyapi ŝni ;
Wicohtani woyute yatapi kta.
Waŝtekidake cin hecen woŝtinma qu ece.
- 3 Iho, wicacınca Jehowa taku wicaqu kin hee ;
Wicatamni oicage cin he wokajuju ee.
- 4 Wanhinkpe wicaŝta waŝaka nape ohna,
Wicakoŝka cinca kin hena iyececa.
- 5 Tuwe hena on wanju okikju kinhan,
Wicaŝta kin he cante waŝte hinca :
Hena iŝtecapı kte ŝni ;
Tiyopa kin ohna toka om wohdakapi kta.

PSALM 128.

Oicimani odowan.

- 1 Jehowa kokipapi kin otoiyohi cante wašte ;
Iye tacanku ohna manipi kin hena.
- 2 Ninape ohtani kin he yahdute cinhan,
Cante niwašte hinca, qa tanyan nanke kta.
- 3 Nitawin hastanyanka iyuwi waicage cin he iyececa,
Tipi nitawa mahen ;
Nicinca kin hena Oliwe ojupi kin iyececapi,
Wahna wotapi nitawa ihdukśan.
- 4 Wanyaka wo, wicašta Jehowa kokipe cin,
He hecen yawaštepi kta.
- 5 Jehowa Zion etanhan niyawašte kte ;
Qa Jerusalem towašte kin wandake kta,
Yani kin anpetu owasin.
- 6 Nakun nicinca cinca kin wanyahdake kta.
Israel wookiye kici un nunwe.

PSALM 129.

Oicimani odowan.

- 1 Komaška ehantanhan ota kakiśmayanpi ce ;
Israel eye kta iyececa ;
- 2 Komaška ehantanhan ota kakiśmayanpi,
Tuka maktepidan śni.
- 3 Maħyumdupi kin mitapete ayumdupi ;
Cankuyetonton hanskaska kagapi.
- 4 Jehowa owotanna ;
Wicašta śica ikan tawa kin he bapsaka.
- 5 Tona Zion śicedakapi kin hena
Owasin ištecapi qa hekta hdicuyapi kta.
- 6 Tipi akan wato icage cin he iyececapi kta ;
He yujunpi śni itokam śnija ece.
- 7 He on aguyapi bakse cin nape okikju śni ;
Qa tuwe pahte cin he maku en ohnaka śni.
- 8 Nakun tona en hiyayapi kin heyapi śni ;
Jehowa tawoyawašte en niunpi nunwe ;

Jehowa caje on unniyawaŝtepi ce, eyapi ŝni.

PSALM 130.

Oicimani odowan.

- 1 Jehowa, woŝbe kin etanhan, houçiciya ece.
- 2 Itancan miho kin nahon ye ;
Wocekiye mitawa ho kin anohkiya wo.
- 3 Jah, woah̄tani cajeyakiyate cinhan,
Itancan, tuwe en najin okihi kta he.
- 4 Tuka wokajuju kin he niye duha ;
Hecen konicipapi kta.
- 5 Jehowa ape waun, minagi ape un ;
Qa iye oie kin wacinwaye.
- 6 Minagi Itancan kin akipe ;
Anpao kta ape unpi kin isanpa ;
Anpao kta ape unpi kin hena.
- 7 Israel, Jehowa wacinyan wo ;
Jehowa wowaonŝida hduha ;
Qa wopekironpi untkanna kici un.
- 8 Unkan iye Israel opekiron kta,
Wahtani owasin etanhan.

PSALM 131.

Oicimani odowan. Dawid tawa.

- 1 Jehowa, micante wahaniçida ŝni,
Qa miiŝta wankantuye ŝni ;
Nakun taku tanka kin en opimiçiyeye ŝni,
Qa taku miwankam hiyeye cin.
- 2 Awicakehan minagi wahduwah̄badan,
Qa wahduinina ;
Tuwe hunku azin ehpeye cin iyececa ;
Azin enakiya wanji minagi iyececa.
- 3 Israel, Jehowa wacinyan wo ;
Detanhan qa owihanke wanica.

PSALM 132.

Oicimani odowan.

- 1 Jehowa, Dawid on kiksuya wo,
Tawokakije kin owasin.
- 2 He Jehowa ekta iciconza ;
Awicakehan Wanji Waśaka Jakob tawa kin heciya ;
- 3 Wakeya ohna wati kin en wahde kte śni ;
Ohehdepi akan manke cin en mde kte śni ;
- 4 Miišta woiştinma waqu kte śni ;
Qa miištojuha, owicagunga ;
- 5 Jehowa owanka wan iyeweciye śni ;
Tipi wan Wanji Waśaka Jakob tawa kin on.
- 6 Iho, Ephrata en he naunhonpi ;
Can wojupi kin ohna iyeunyanpi ce.
- 7 Iye ti kin en unkupi kta ;
Iye siha hde kin en canpeśka makehde inaunjinpi kta.
- 8 Jehowa najin wo, woozi nitawa kin en ;
Niye qa nitowaśake can koka kin.
- 9 Wawayuśnapi nitawa woowotanna koyakapi kte ;
Qa wicaśta wacantkiya nitawa iyaśapi nunwe.
- 10 Dawid nitaokiye kin on etanhan,
Sdayakiye cin ite kin hduhomni śni wo.
- 11 Jehowa wowicake eciyatanhan Dawid heciya ;
Etanhan namni kte śni ;
Nitancan etanhan icage cin he
Oiyotanke nitawa akan iyotangwakiye kta ce.
- 12 Nicinca wicotakuye mitawa patanpi kinhan ;
Qa mitawoyaotanin onspewicawakiye cin hena ;
Hehan nakun iye cinca kin ohinniyan
Oiyotanke kin akan nici iyotankapi kta.
- 13 Jehowa Zion hdaħniga ;
Ohna ti kta cin kin heon.
- 14 Ohinniyan woozi mitawa kin he dee ;
Den manke kta, wahdaħniga heon etanhan.
- 15 Tawoyute woyawaśte on mdawaśte kta ;
Wahpanicapi tawa kin hena
Aguyapi on imnawicawaye kta.

- 16 Nakun wawayuśnapi tawa kin
Hena wiconi koyagwicawaye kta ;
Qa wicaśta wacantkiya tawa kin
Hena iyaśapi, iyaśapi kta.
- 17 Hen Dawid he wan icañweciye kta ;
Petijanjan wan Sdawakiye cin piweciya.
- 18 Tona tokawicaye cin wowiśtece koyagwicawaye kta.
Tuka iye akan tawateśdake kin hca kta.

PSALM 133.

Oicimani odowan. Dawid tawa.

- 1 Wanyaka wo, hunkawanjinkiciyapi
Nakun witaya tipi kin
He waśte qa wiciyokipi hinca.
- 2 He wihdi waśte kin iyececa, pa akan,
Putinhin ekta kaduza, Aaron putinhin tawa ;
Qa taonhdohda okagege kin ekta iyahde.
- 3 Hermon cu kin iyececa,
Zion paha kin ahinhe cin hee :
Hen Jehowa woyawaśte wan u śi ;
Owihanke wanin wiconi kin hee.

PSALM 134.

Oicimani odowan.

- 1 Iho, Jehowa taokiye kin owasin,
Jehowa yawaśte miye ;
Hanyetu eca Jehowa ti kin ohna nayajinpi kin.
- 2 Oyanke wakan kin ekta nape kiyugata po ;
Qa Jehowa yawaśte miye.
- 3 Jehowa Zion etanhan niyawaśte kta ;
Tuwe mañpiya maka ko kage cin he.

PSALM 135.

Jah yatan miye.

- 1 Jehowa caje kin he yatan po ;
Jehowa taokiye yaunpi, he idowan po.
- 2 Tona Jehowa ti kin ohna nayajinpi kin ;
Wakantanka unkitawapi ti hocoka en yaunpi :
- 3 Jah yatan miye ; Jehowa wašte ;
Iye caje kin idowan po, he oiyokipi nakaes.
- 4 Jehowa Jakob hdahniga ;
Israel tawaye kte cin heon.
- 5 Jehowa tanka hinca he sdonwaya ;
Qa Itancan unkitawapi taku wakan owasin isanpa.
- 6 Jehowa taku cin kin owasin econ ece ;
Mahpiya kin ekta qa maka akan ;
Miniwanca qa wošbe owasin en.
- 7 Maka ihanke etanhan opo wankantkiya iyayeya ;
Magaju kin wakanhdi kicaga ;
Mazopiye tawa etanhan tate kin hiyu kiya.
- 8 Egipta en tokaheya tonpi kin wicakaštaka ;
Wicašta qa nakun wanunyanpi kin.
- 9 Wowapetokeca qa taku wowinihan,
Egipta, niye en ukiye ciqon ;
Pharoh qa taokiye kin owasin en.
- 10 Oyate ota wicakaštaka,
Qa wicaštayatapi wašakšaka wicakte :
- 11 Sihon, Amori wicaštayatapi kin ;
Qa Og, Bašan wicaštayatapi ;
Qa Kanan wokiconze kin owasin :
- 12 Qa makoce tawapi qon yuhapi kta wicaqu ;
Israel iye taoyate yuhapi kta.
- 13 Jehowa, nicaje kin he owihanke wanica :
Jehowa, niksuyapi kin he
Wicoicage qa wicoicage hehanyan.
- 14 Jehowa iye taoyate kin hdaco kta ;
Qa iye taokiye kin hena on ihduhomni kta
- 15 Ikcewicašta taku wakan tawapi kin
Hena mazaska qa mazaskazi ;
Wicašta nape on kagapi.
- 16 I yukanpi, tuka iapi šni ;
Išta yukanpi, tuka wawanyakapi šni ;

- 17 Noge yukanpi, tuka winahonpi síni ;
Nakun ipi ohna oniya wanica.
- 18 Tuwe hena kage cin hena iyececapi ;
Nakun tona wacinyanpi kin owasin.
- 19 Israel tiyohnaka, Jehowa yawašte po ;
Aaron tiyohnaka, Jehowa yawašte po.
- 20 Lewi tiyohnaka, Jehowa yawašte po ;
Jehowa koyakipapi kin, Jehowa yawašte po.
- 21 Jehowa Zion etanhan yawaštepi nunwe,
Jerusalem en ounye cin.
Jah yatan miye.

PSALM 136.

- 1 Jehowa wašte, hecen wopida eciya po ;
Towaonśida kin he owihanke wanica.
- 2 Taku wakan ta Wakantanka kin wopida eciya po ;
Towaonśida kin he owihanke wanica.
- 3 Itancanpi kin en Itancan kin wopida eciya po ;
Towaonśida kin he owihanke wanica.
- 4 Tuwe ísnana taku tanka wowinihan econ kin ;
Towaonśida kin he owihanke wanica.
- 5 Tuwe woksape on mahpiya kage cin ;
Towaonśida kin he owihanke wanica.
- 6 Tuwe maka kin mini akan yumdaya ;
Towaonśida kin he owihanke wanica.
- 7 Tuwe iyoyanpa tanka kage cin ;
Towaonśida kin he owihanke wanica.
- 8 Anpetu wi anpetu en ounye kte cin ;
Towaonśida kin he owihanke wanica.
- 9 Hanyetu wi wicanhpi ko hanyetu en ounyanpi kta ;
Towaonśida kin he owihanke wanica.
- 10 Tuwe Egipta en tokaheya wicatonpi wicakaštake ciqon ;
Towaonśida kin he owihanke wanica.
- 11 Qa wicacokaya tanhan Israel ewicahdaku ;
Towaonśida kin he owihanke wanica.
- 12 Nape waśake ça isto hdugate cin on ;
Towaonśida kin he owihanke wanica.
- 13 Tuwe Mde śa kin yukinukan ehnaka ;

- Towaonśida kin he owihanke wanica.
- 14 Qa cokaya Israel iyayeye cin ;
Towaonśida kin he owihanke wanica.
- 15 Tuka Pharo qa ozuye tawa kin Mde śa kin en ehpewicaya ;
Towaonśida kin he owihanke wanica.
- 16 Tuwe iye taoyate hewotahedan yus awicaye cin ;
Towaonśida kin he owihanke wanica.
- 17 Tuwe wicaśtayatapi tanka wicakaśtaka ;
Towaonśida kin he owihanke wanica.
- 18 Qa wicaśtayatapi waśaka wicakte ;
Towaonśida kin he owihanke wanica.
- 19 Sihon, Amori wicaśtayatapi kin ;
Towaonśida kin he owihanke wanica.
- 20 Qa Og, Baśan wicaśtayatapi kin ;
Towaonśida kin he owihanke wanica.
- 21 Qa tamakocepi kin yuhapi kta wicaqu ;
Towaonśida kin he owihanke wanica.
- 22 Iye taokiye Israel yuhe kta ;
Towaonśida kin he owihanke wanica.
- 23 Tuwe unwahpanicapi en unkiksuyapi ;
Towaonśida kin he owihanke wanica.
- 24 Qa tokaunyanpi kin etanhan eunhdakupi ;
Towaonśida kin he owihanke wanica.
- 25 Tuwe ceĥpi ton owasin woyute wicaqu ;
Towaonśida kin he owihanke wanica.
- 26 Maĥpiya ta Wakantanka kin wopida eciya po ;
Towaonśida kin he owihanke wanica.

PSALM 137.

- 1 Babel tawakpa kin icahda,
Hen unkiyotankapi, nakun unceyapi,
Zion unkiksuyapi qehan.
- 2 He cokaya cohwanjica kin en,
Candowankiyapi unkitawapi otkeunyanpi.
- 3 Hen wayaka unyuhapi dowanpi oie kin unkidapi ;
Qa waunkipi kin hena wowiyuśkin dapi ;
Zion tadowan etanhan unkiqidowan po, eyapi.
- 4 Token Jehowa tadowan kin,

- Makoce tokeca en, unkahiyayapi kta he.
- 5 Jerusalem aciktonje cinhan,
Minape etapa kin akiktonja nunwe :
- 6 Miceji macaka en askapa nunwe,
Ciksuye śni kinhan ;
Mitowiyuśkin tokapa ekta
Jerusalem ewahnake śni kinhan.
- 7 Jehowa, Edom cinca kin ekta,
Jerusalem taanpetu kin kiksuya wo :
Yujuju po, yujuju po,
Taku ahdehe cin hehanyan, eyapi.
- 8 Babel cunwintku, ihangyapi kte cin,
Tuwe ecaunyeconpi kin iyecen
Ninicajuju kinhan he cante wašte kta.
- 9 Tuwe hokśiyopa nitawa iyawicahpaya,
Qa inyan en ehpewicaye cinhan, he cante wašte kta.

PSALM 138.

Dawid tawa.

- 1 Micante ocowasin on wopida eciciye kta ;
Taku wakan kin wicitokam icidowan kta.
- 2 Tipi wakan nitawa ekta canpeśka makehde inawajin kta ;
Qa nicaje mdatan kta, nitowaonśida qa nitowicake on :
Nioie kin nicaje ocowasin isanpa tanka yakaga heon.
- 3 Anpetu en hoyewaya, hehan amayadupte ;
Minagi en wowaśake on waditag mayaya.
- 4 Jehowa, maka wicaśtayatapi owasin niyatanpi kta ;
Nii oie kin nahonpi kinhan.
- 5 Qa Jehowa tacanku ohna dowanpi kta ;
Jehowa towitan kin he tanka nakaes.
- 6 Jehowa tehanwankantu ešta kun unpi kin awicatonwan ;
Tuka wahaničidapi kin tehantanhan sdonwicaya.
- 7 Wokakije cokaya mda ešta nimayaye kta ;
Tokamayanpi śinhdapi kin ekta nape yahdugate kta ;
Qa ninape etapa on nimayaye kta.
- 8 Jehowa taku miciyuśtan kta :
Jehowa, nitowaonśida kin he owihanke wanica :

Ninape taku kage cin ehpeye śni wo.

PSALM 139.

Dowan itancan kin kicagapi. Dawid tadowan.

- 1 Jehowa, mayadukcan qa sdonyaya ;
- 2 Imdotanka nawajin ko sdonyaya ;
Mitawacin tehantanhan oyakahniga.
- 3 Omawani qa imunke cin wapetogyaton ;
Qa miohan kin owasin tanyan idukcan.
- 4 Miceji en wicoie wanjidan ešta,
Iho, Jehowa, niye ocowasin sdonyaya.
- 5 Miheyata qa mitokam aohdudemayaya,
Qa ninape amayahnaka.
- 6 Wosdonye kin he okañniñ owakihi śni ;
Tehan wankantu, hecen owakihi kte śni.
- 7 Nitaniya etanhan toki mde kta he ;
Qa niite etanhan toki nawajin kta he.
- 8 Wankan mahpiya ekta mde cinhan, hen niye yaun ,
Qa Hades en owinśwatón kinhan, inyun, niye.
- 9 Anpao hupahu kin wakamdage kta ;
Miniwanca ihanke kin en ounwaye kta :
- 10 Heciya ešta ninape amayan ;
Qa nape nietapa kin mayuza.
- 11 Awicakehan otpaza amahinhpaye kta, epa ešta ;
Hehan hanyetu kin mihdukśan iyoyanpa.
- 12 Otpaza hee kaeś aotpasniye śni ;
Qa hanyetu kin anpetu iyecen iyojanjan :
Otpaza kin he iyoyanpa kin iyececa.
- 13 Mitapakśin kin niye yakaga ;
Ina tamni mahen akañpemayaton.
- 14 Wowinihanyan makagapi heon ciyatan kta ;
Niohan kin hena wowinihan ;
Qa he minagi tanyan sdonya.
- 15 Woinahbe en makagapi qehan,
Mahuhu kin ananicihmanpi śni,
Maka ośbe kin en makazontapi qehan.
- 16 Wiyapemni waun qon ništa wanmayaka,

- Qa mitaanpetu icage kte cin,
 Hinahin wanica ehan,
 Owasin nitawowapi kin en owapi.
- 17 Unkan Iyotan Waśaka nitawacin kin hena nina tewahinda ;
 Hena yuwitayapi kin tanka hinca.
- 18 Hena mdawa kta, tuka wiyaka kin isanpa ota :
 Wekta qa hinahin cici waun.
- 19 Wakantanka, awicakehan wicaśta śica yakte kta :
 Heon we wicaśta yaunpi kin, amayuśtan po.
- 20 Hena taku śica on cajeniyatapi ece :
 Tokaniyanpi kin ikcekceya cajeniyatapi.
- 21 Jehowa, tona śicenidapi kin hena śicewicawada kte śni he ;
 Qa tona nicipajinpi kin hena wahtewicawada kte śni he.
- 22 Wośicedake wowicake on śicewicawadaka ;
 Hena tokawicawaya iyececa.
- 23 Wakantanka, imayukcan qa micante sdonya wo ,
 Imayute qa micanteoze kin sdonya wo.
- 24 Qa wokakije canku wan en maun kinhan wanyaka wo :
 Qa canku owihanke wanice cin en amayan wo.

PSALM 140.

Dowan itancan kin kicagapi. Dawid tadowan.

- 1 Jehowa, wicaśta śice cin etanhan emayaku wo ;
 Wicaśta wohitika etanhan mayakpatan kta.
- 2 Hena cante mahen wicohan śica awacinpi ;
 Anpetu osan wokicize on mniciyapi ece.
- 3 Ceji hdumanpi, wamduśka iyececa ;
 Ihapi mahen sintehda tage yukan. Sela.
- 4 Jehowa, wicaśta śica nape etanhan emayaku wo ;
 Wicaśta wawicaki sa etanhan mayakpatan kta ;
 Hena mioye yutehi wacinpi.
- 5 Wahaniçidapi kin hena,
 On hmunkapi wan emaonpapi, hahonta nakun ;
 Canku icahda wohmunke wan ehnakapi ;
 Qa mazahtakiyapi emaonpapi. Sela.
- 6 Wakantanka mitawa kin he niye, Jehowa ewakiya ;
 Jehowa, wocekiye mitawa ho kin nahon wo.

- 7 Jehowa Itancan, wowaśake wanimakiye cin ;
Kicizapi anpetu kin en pa akañpemayaton.
- 8 Jehowa, wicaśta śica taku cin kin ayupte śni wo ;
Taku awacin kin ecetu śni kiya wo ;
Wahaniçidapi kta. Sela.
- 9 Tona mihdukśan hiyeye cin
Hena iha taku wayuśice cin pa ahdañpapi kta.
- 10 Petaga aihpewicayapi kta ;
Peta en iyewicaye kta, qa mini śma en :
Hecen ake najinpi kte śni.
- 11 Wicaśta iwakan kin hena
Makoce kin en yusutapi śni nunwe :
Taku śica wicaśta wawicaki sa ihangya kuwa kta.
- 12 Jehowa wicaśta onśika wonwotanna,
Qa wicaśta wahpanica kin woyaco ecakicon kta sdonwaya.
- 13 Wicaśta owotanna ecedan nicaje yatanpi kta ;
Wicaśta ecetupi kin nitokam iyotankapi kta.

PSALM 141.

Dawid tadowan.

- 1 Jehowa, houçiciya, en mau inañni ye ;
Ceciciya eca maho kin nahon wo.
- 2 Woçekiye mitawa azintonpi kin nitokam un nunwe ;
Minape yugatapi htayetu woñnapi kin iyececa.
- 3 Jehowa, mii kin en akicita najin wicaśi wo ;
Miiha tiyopa kin awanyaka ye.
- 4 Wicoie śica wan ekta micante yekiye śni wo ;
Wicaśta woahntani econpi kin om,
Wicośice en htawani kte śni.
Qa woyute wašte yuhapi kin wate kte śni.
- 5 Wowaonśida on wicaśta owotanna amape ;
Qa iyopemayan ; he ihapi ee kta,
Mapa tehinda kte śni ;
Tuka nakun iye kakijapi kin en cewakiye kta.
- 6 Wayaco tawapi kin hena inyan en ehewicayapi :
Unkan mioie nahonpi, hena skuya nakaes.

- 7 Tuwe maka yumdu qa yuksaksa iyececa,
Huhu unkitawapi Hades i kin en kada ehpeyapi.
- 8 Jehowa Itancan, miišta kin niye ekta yanke ;
Wowacinye mitawa kin he niye ;
Minagi papson šni wo.
- 9 Mazahtakiyapi emaonpapi kin etanhan imacu wo ;
Qa wohtani econpi wohmunke tawapi etanhan.
- 10 Wicašta šica wohmunke iye tawapi en ehpeiçiyapi nunwe ;
Tuka miye qe sam imdamde kta.

PSALM 142.

Dawid tawoonspe, makoħdoka en un qehan. Wocekiye wan

- 1 Miho kin on Jehowa hoyewakiya ;
Miho kin on Jehowa cewakiya.
- 2 Iye itokam taku awacanmi wakpapon ;
Itokam woiyokišice mitawa owahdaka.
- 3 Mahentanhan mitaniya ktepidan ;
Tuka mitacanku kin niye sdonyaya ;
Canku ohna mde cin en wohmunke wan emakionpapi.
- 4 Etapa tanhan etonwe ça wanyaka wo ;
Unkan tuwedan sdonmaye šni ;
Wowinape takudan mduhe šni ;
Tuwedan minagi ekta etonwe šni.
- 5 Jehowa, niye houciçiya :
Wiconi makoce kin en taku mitawa,
Wowinape mitawa kin he niye, epa.
- 6 Waceye cin he nahon wo, nina makakija ;
Tona šicaya makuwapi etanhan emayaku wo ;
Hena mikapeya wašakapi nakaes.
- 7 Wicakaška tipi kin etanhan minagi icu wo,
Hecen nicaje mdatan kta :
Tanyan ecamiyecon kinhan,
Wicašta owotanna mihdukšan hiyeye kta.

PSALM 143.

Dawid tadowan.

- 1 Jehowa, wocekiye mitawa nahon wo ;
Onsiya hoyewaye cin he anohkiya ye :
Nitoowotanna eciyatanhan nitowicake on amayupta wo.
- 2 Qa nitaokiye kici woyaco akite sni wo ;
Niye nitokam ni unpi kin tuwedan owotanna sni.
- 3 Toka kin he minagi sicaya kuwa ;
Wiconi mitawa makata ehpeya ;
Wanakaş tapi kin iyecen otpaza en ounye makiya.
- 4 Heon mahentanhan mitaniya aopaskicapi ;
Mahentanhan micante atakuni sni.
- 5 Anpetu wanakaja kin hena weksuya ;
Niohan kin owasin awacanmi ;
Ninape taku kage cin hena awacin waun.
- 6 Minape ciciyugata ;
Maka puze cin iyecen minagi nitokam wanka. Sela.
- 7 Inahni wo, Jehowa amayupta wo ;
Minagi atakuni sni.
Niite inahbe makiye sni wo ;
Okinni wicahapi ekta yapi kin iyemacece kta.
- 8 Hanhanna eca wocantekiye nitawa nahon mayan wo ;
Niye wacinciya, heon :
Canku ohna mde kte cin he sdonye mayan wo ;
Niye ekta minagi wahdomda, heon etanhan.
- 9 Tokamayanpi kin etanhan emayaku wo ;
Jehowa, niye en inawahbe.
- 10 Nitawacin ecamon kta onspemakiya wo ;
Taku Wakan mitawa kin he niye :
Nitaniya kin he waşte ;
Makoce omdaya en amayan nunwe.
- 11 Jehowa, nicaje on etanhan nimayaye kta ;
Nitoowotanna on minagi wokakije etanhan inape yaye kta.
- 12 Nakun nitowaonşida on tokamaye cin ihangyaye kta ;
Qa tona minagi iyokişinyapi kin owasin atakunişni iyewicayaye kta ;
Nitaokiye kin he miye, heon etanhan.

PSALM 144.

Dawid tawa.

- 1 Jehowa, Imnija mitawa, yawaštepi nunwe ;
He minape zuyapi onspekiya ;
Qa minapsukaza, kiczapi kin.
- 2 Wacanmakiye ça conkaške mitawa,
Wowinape mitawa qa emahdaku ece ;
Wahacanka mitawa qa tuwe wacinwaye cin,
Mitaoyate mihukuya hiyuye cin he.
- 3 Jehowa, wicašta kin taku he, on sdonyaye kta ;
Qa wicašta cinhintku, unkan en yahi kta he.
- 4 Wicašta kin taku śni iyececa ;
Taanpetu kin ohanzi wan hiyaye cin iyececa.
- 5 Jehowa, maħpiya nitawa hduhukuye ça kun u wo ;
He kin hena yutan wo, kinhan hena izite kta.
- 6 Wakanhdi hdutanin qa wicakamdeca wo ;
Wanhinkpe nitawa hiyuye ça yuśinye wicaya wo.
- 7 Wankantanhan ninape hiyukiya wo ;
Makiyuśka qa mini ota etanhan imacu wo ;
Toka cinca nape kin etanhan.
- 8 Hena ipi wohmayan iapi ece ;
Qa nape etapa tawapi kin he nape itonśni.
- 9 Wakantanka, odowan teca wan cicahiyaye kta ;
Candowankiyapi ikan wikcemna on icidowan kta.
- 10 He wicaštayatapi wanikiyapi wicaqu ;
Iye taokiye Dawid isan śice cin etanhan icu ece.
- 11 Makiyuśka qa toka cinca nape kin etanhan imacu wo ;
Hena ipi kin wohmayan iapi ece ;
Qa nape etapa tawapi kin he nape itonśni.
- 12 Hecen unkcinkśipi kośkapi ehan
Taku ojupi tanka icage cin iyececapi kta ;
Unkcuncśipi kin tipi wakan oise
Inyan ayuco bagopi kin iyececapi kta.
- 13 Dotopiye unkitawapi kin ocaje owasin on ojudan kta :
Tahinca unkitawapi kin kektopawinge cinca tonpi kta,
Qa kektopawinge yuotapi canku unkitawapi ohna.
- 14 Tatanka unkitawapi yuśakapi kta ;
Yuksapi wanica qa yujujupi wanica ;
Qa canku unkitawapi ohna ceyapi wanice kta.
- 15 Oyate wan hecen unpi kin he cante waštepi :
Oyate Taku Wakan tawapi kin

Jehowa hee hecinhan he cante waštepi.

PSALM 145.

Dawid tawa. Woyatan.

- 1 Wakantanka, Wicaštayatapi mitawa ciyawankantuya kta ;
Qa nicaje mdawašte kta, ohinniyan qa owihanke śni.
- 2 Anpetu owasin ciyawašte kta ;
Qa nicaje iwadowan kta,
Ohinniyan qa owihanke śni.
- 3 Jehowa tanka qa nina yatanpi kta iyececa ;
Qa tanka kin he iyukanpica śni.
- 4 Wicoicage wicoicage iyahdeya taku ecanon kin yatanpi ;
Qa niohan waśaka oyakapi kta.
- 5 Wotanka nitawa wowitan oiyokipi kin he,
Qa wicoie wowinihan nitawa awacanmi kta.
- 6 Nakun niohan wakan wokokipe kin he oyakapi ;
Unkan miye wotanka nitawa mdaotanin kta.
- 7 Nitowašte tanka wokiksuye kin he yatanpi ;
Qa nitoowotanna kin on iyaśapi ece.
- 8 Jehowa waonśida qa wacantkiya ;
Tehan canteptanye śni qa tocantekiye tanka.
- 9 Owasin ekta Jehowa wašte ;
Qa tocantekiye taku kage cin owasin en un.
- 10 Jehowa, taku icahyaye cin owasin niyatanpi ;
Qa wicašta wacantkiya nitawa kin hena niyawaštepi kta.
- 11 Nitokiconze wowitan kin he oyakapi ;
Qa nitowaśake kin cajeyatapi ece.
- 12 Tohan tanka kin wicašta cinca sduyewicayapi kta ;
Qa tokiconze wotanka wowitan kin.
- 13 Nitokiconze kin he wokiconze owihanke wanica ocowasin ;
Qa wicašta niyatapi kin he wicoicage qa wicoicage en.
- 14 Tona hicahanpi owasin Jehowa najin wicakiya ;
Qa patujapi kin hena owasin wicayubosdata.
- 15 Taku išta yuke cin owasin niye anipepi ;
Unkan iyehantu eca woyute wicayaqu ece.
- 16 Ninape yahdumdaya,
Qa taku ni un kin owasin imna wicayaya.

- 17 Tacanku owasin en Jehowa owotanna ;
Qa ohan owasin en wacantkiya.
- 18 Jehowa tona hoyekiyapi kin owasin wicikiyedani un ;
Tona wowicake en hoyekiyapi kin owasin.
- 19 Tona iye kokipapi taku cinpi kin ecetuye kta ;
Qa nakun hoyeyapi kin nahon, qa niwicaye kta.
- 20 Tona waštedapi kin hena owasin Jehowa wicapatan ;
Tuka šicapi kin hena owasin ihangwicaye kta.
- 21 Jehowa yatanpi kin he mii cajeyate kta ;
Qa wicacehpi owasin iye caje wakan kin he yawaštepi kta ;
Ohinniyan qa owihanke wanica.

PSALM 146.

- 1 Halleluya :
Minagi, Jehowa yatan wo.
- 2 Tohanyan wani kin hehanyan
Jehowa mdatan kta ;
Tohanyan en waun hehanyan
Mita Wakantanka iwadowan kta.
- 3 Wicaštayatapi wacinwicayapi šni po ;
Adam cinca kin, en wanikiyapi wanica.
- 4 Taniya kin iyaya, hehan maka ekta hda ;
Anpetu kin he en tawacin kin atakuni šni.
- 5 Jakob ta Wakantanka tuwe okiye cin he cante wašte ;
Ta Wakantanka Jehowa he wacinye cinhan.
- 6 He mahpiya qa maka kin kaga ;
Miniwanca qa taku ohnaka kin owasin :
He wowicake ohinniyan kpatan.
- 7 Tona šicaya wicakuwapi kin on woyaco econ ece ;
Wotektehdapi kin hena aguyapi wicaqu ;
Kaška unpi kin hena Jehowa wicayukca.
- 8 Ištagongapi kin hena Jehowa išta wicakiyukawa ;
Pakopi kin hena Jehowa wicayuowotanna ;
Wicašta owotanna kin hena Jehowa wašte wicadaka.
- 9 Jehowa tona oyate tokeca kin hena awanwicayaka ;
Wamdenica qa wiwazica kin owicakiya ece :
Tuka wicašta šica tacanku kin yupemni.
- 10 Jehowa owihanke wanin wicaštayatapi un kta ;

Zion, nita Wakantanka ohinniyan qa ohinniyan kta.
Halleluya.

PSALM 147.

- 1 Halleluya.
Wakantanka unkitawapi idowanpi kin he wašte ;
He wiciyokipi, heon yatanpi kin he wicimdeza.
- 2 Jehowa Jerusalem piya kaga ;
Israel enanakiya iyayapi kin hena mnawicakiya.
- 3 Tona cante kicaksapi kin okiziwicaya ;
Qa capapi kin pawicakihta ece.
- 4 Wicanhpi kin tonakeca ešta hena yawa ;
Owasin cajeyata ece.
- 5 Itancan unkitawapi kin tanka, qa towaśake kin ota ;
Qa tookahnige kin he yawapica śni.
- 6 Wahpanicapi kin hena Jehowa najin wicakiya ;
Śicapi kin hena makata ehpewicaya ece.
- 7 Wopida odowan on Jehowa ayupta po ;
Candowankiyapi on Wakantanka unkitawapi kahiyaya po.
- 8 He mahpiya kin mahpiya śapa on akahpa ;
Maka kin magaju kicaga ;
Qa he kin peji oicahya ece.
- 9 Woteca kin woyute wicaqu ;
Kangi cinca nakun, ceyapi kinhan.
- 10 Śuktanka towaśake kin he iyokipi śni ;
Wicašta huha kin hena on iyuśkin śni.
- 11 Tona kokipapi kin hena Jehowa iyokipi ;
Tona iye towaonsida apepi kin hena.
- 12 Jerusalem, Jehowa yatan wo ;
Zion, Wakantanka nitawa idowan wo.
- 13 Nitatiyopa ihupa kin hena yusuta ;
Nicokaya nicinca kin wicayawašte.
- 14 Nihdukśan wookiye kaga ece ;
Aguyapi śin kin on imnaniyan.
- 15 Taku eye cin he maka kin ekta ye śi ;
Iye oie kin dus inyanka ece.
- 16 Wa kin he hiyuya, tahinca hin iyececa ;
Hewanke kin cahota iyecen kada ece.

- 17 Wasu tawa kin onśpaśpa iyecen ehpeya ;
Osni tawa itokam tuwe najinhan najin okihi he.
- 18 Iye oie kin ye śi, qa hena span kiya ;
Tate tawa ukiya eca mini kaduza ece.
- 19 Iye oie kin Jakob okiyaka ;
Tawoahope qa tawoyaco kin, Israel en.
- 20 Oyate kin owasin hecen ecawicakicon śni ;
Qa tawoyaco kin hena sdonyapi śni.
Halleluya.

PSALM 148.

- 1 Halleluya.
Maħpiya kin etanhan Jehowa yatan po ;
Tehanwankantu ekta he yatan miye.
- 2 Taohnihdewicaye cin owasin, he yatan po ;
Wicobe tawa iyuhpa, he yatan miye.
- 3 Anpetu wi qa hanyetu wi, he yatan po ;
Iyoyanpa wicanhpi owasin, he yatan miye.
- 4 Maħpiya maħpiya kin, he yatan po ;
Qa mini, maħpiya iwankam un kin nakun.
- 5 Hena Jehowa caje kin yatanpi kte ;
Iye ecen eya, unkan kagapi, heon etanhan.
- 6 Qa hena yusuta, owihanke śni hehanyan ;
Woope wan wicaqu, unkan he acakśinpi śni.
- 7 Maka kin etanhan, Jehowa yatan miye ;
Hogan tankinyanyan qa ośbe kin owasin.
- 8 Peta qa wasu, wa qa śota ;
Tateiyumni iye oie econ ece kin :
- 9 He kin hena, qa paha owasin ;
Waskuyeca can, qa hante owasin :
- 10 Wamanica, qa woteca owasin ;
Watutka, qa taku kinyan un kin :
- 11 Maka wicaśtayatapi, qa oyate owasin ;
Wicaśta itancanpi, qa maka akan wayaco owasin :
- 12 Kośka, qa nakun wikośka ;
Wicahinca qa hokśiyopa om :
- 13 Hena Jehowa caje kin yatanpi kte ;
Iye caje kin ecedan yatankapi ece ;

- Towitan kin maka qa mahpiya kin iwankam.
- 14 Unkan iye taoyate he wan icahwicakiciya ;
Wicašta wacantkiya tawa owasin on wowitan kin hee ;
Israel cinca kin on, oyate wan iye ikiyedon unpi.
Halleluya.

PSALM 149.

- 1 Halleluya.
Jehowa odowan teca wan kahiyaya po ;
Towitan kin, wicašta wacantkiya mniciyapi kin en.
- 2 Waicahye cin on Israel iyuşkin nunwe ;
Zion cinca Wicaştayatapi tawapi kin on içidowanpi kte.
- 3 Wacipi kin on iye caje kin yatanpi nunwe ;
Cancega cotanka ko on idowan miye.
- 4 Jehowa iye taoyate kin on iyuşkin ;
Onşiiçidapi kin hena wiconi koyagwicaya ece.
- 5 Wowitan on wicašta wacantkiya iyuşkinpi kte ;
Towinjapi akan dowanpi nunwe.
- 6 Iyotan Waşaka yatanpi kin dotepi ohna un ;
Qa napepi ohna mazasage anog ope kin.
- 7 Hecen Ikcewicašta ehna watokiçonpi kta ;
Qa oyatepi kin kakişwicayapi kta.
- 8 Wicaştayatapi wicayuhapi mazaicicahiha on wicakaşkapi kta ;
Qa tona wicakinicapi kin hena maza icaşke on.
- 9 Hena en woyaco owapi kin yuştanpi kta ;
Wowitan kin de wicašta wacantkiya tawa owasin yuhapi.
Halleluya.

PSALM 150.

- 1 Halleluya.
Tipi wakan tawa ohna Wakantanka yatan po ;
Wowaşake mahpiya tawa kin ohna idowan po.
- 2 Wicohan tanka econ kin on yatan miye ;
Iyotan tanka kin iyececa idowan po.
- 3 Mazayahotonpi on yatan miye ;
Cotanka candowankiyapi ko on yatan po.
- 4 Cancega wacipi ko on he yatan miye ;

Candowankiyapi cotanka ko on yatan po.

- 5 Mazasnasna hotanka on yatan po ;
Mazasnasna wiyuŝkin on he yatan miye.
- 6 Taku niya un kin owasin Jah yatan po.
Halleluya.